

प्रेरितन क काम

लूका क लिखी भइ दूसर किताबे क जानकारी

1 हे थियुफिलुस, मई आपन पहिली किताबे में ओन सबइ कामे क बारे में लिखेउँ ह जेका सुरु स ईसू किहेस ह अउर ²उ दिना तलक उ प्रेरितन* क जेनका उ चुनेस जब ताई उ पवित्तर आत्मा क आदेस क अनुसार उ सरगे में ऊपर नाहीं उठाइ लीन्ह गवा। ³आपन मउत क पाछे उ आपन क ठोस प्रमाण लइ के ओनके समन्वा परगट भवा कि उ जिअत बा। उ चालीस दिना तलक ओनके अगवा परगट होत रहा अउर परमेस्सर क राज्य क बारे में ओनका बतावत रहा। ⁴फिन एक दाई ओनके संग खइया क खात रहा तउ उ ओनका हुकुम दिहेस, “यरूसलेम क जिन तजा अउर मुला जेकरे बारे में तोसे कहयों कि, परमपिता क सपथ पूरा होइ तलक जोहत रहा। ⁵काहेकि यूहन्ना तउ पानी स बपतिस्मा दिहेस, मुला अब तनिक दिना क पाछे पवित्तर आत्मा स बपतिस्मा दीन्ह जाइ।”

ईसू क सरगे में लइ जावा जाब

⁶तउ जब उ प्रेरितन आपुस में भेटेन, उ पचे पूछेन, “पभू! का तू इहइ समइ प इब्राएल क राज्य क फिन स लिआइ देब्या?”

⁷उ ओनसे कहेस, “उ बेलन या तिथियन का जानब तोहार काम नाहीं, जेका परमपिता खुद आपन अधिकार स तय किहे अहइ। ⁸मुला जब पवित्तर आत्मा तोह प आइ, तोहका सक्ती मिलि जाइ। अउर यरूसलेम में, समूचइ यहूदिया अउर सामरिया में अउर धरती क छोर तलक तू पचे मोर साच्छी होब्या।”

⁹एतना कहे क पाछे ओनकइ लखत लखत ओका सरगे में ऊपर उठाइ लीन्ह गवा। अउर फिन एक बादर ओका आँखी स ओझल कइ दिहेस। ¹⁰जब उ जात रहा तउ पचे आँखी पसारि के ओका निहारत रहेन। तबहिं फउरन सफेद कपड़ा पहिरिके दुइ मनई ओकरे समन्वा आइके ठाड़ भएन।

¹¹अउर बोलेन, “अरे गलीली मनइयो! तू पचे हुवाँ ठाड़ भवा टकटकी काहे लगाए बाट्या? इ ईसू तोहरे बीच स सरगे में ऊपर उठाइ लीन्ह गवा, जइसे तू ओका

सरगे में जात देख्या, वइसे ही उ फिन वापिस लौटि आई।”

एक नवा प्रेरित क चुना

¹²फिन उ प्रेरितन जैतून नाउँ क पर्वत स, यरूसलेम लौटि आएन जउन यरूसलेम स कउनो एक किलोमीटर दूर रहा। ¹³अउर हुवाँ पहुँचिके ऊपर क उ कमरा में गएन जहाँ उ पचे ठहरा रहेन। इ पचे रहेन-पतरस, यूहन्ना, याकूब, अन्द्रियास, फिलिप्पुस, थोमा, बरतुलमै अउर मत्ती, हलफई क बेटवा याकूब, समौन जेलोतेस अउर याकूब क बेटवा यहूदा।

¹⁴एनके संग कछू स्त्रियन, ईसू क महतारी मरियम अउर ईसू क भाई भी रहेन। इ सबइ आपन क एक संग पराथना में चित लगाए राखत रहेन।

¹⁵फिन इ दिनन में पतरस भाई-बंद क बीच खड़ा होइके, जेकर गनती कउनो एक सउ बीस रही, कहेस,

¹⁶“मोरे भाइयो, ईसू क गिरफतार करावइ वाले मनइयन क अगुआ यहूदा क बारे में, पवित्तर सास्तर क उ लेख जेका दाऊद आपन मुँहे स पवित्तर आत्मा बहोत पहिले ही कहे रही, ओकर पूर होब जरुरी रहा। ¹⁷उ हम पचन में गना गवा रहा अउर इ सेवा में ओकर हाथ रहा।”

¹⁸इ मनई जउन धन ओका ओकरे नीचपना क कामे बरे मिला रहा, उ धने स एक तु खेत मोल लिहेस मुला उ पहिले तउ मूँडे क बल भहरान अउर फिन बदन फाटि गवा अउर ओकर अँतड़ी बाहेर निकरि आइ। ¹⁹अउर सबइ यरूसलेम क बसइयन क एकर पता लग गवा। यह बरे ओनकइ भाखा में उ खेत क हकलदमा कहा गवा जेकर अरथ अहइ “लहू क खेत।” ²⁰पतरस कहेस, “काहेकि भजन संहिता में इ लिखा बा,

‘ओकर घर उजरि जाइ अउर ओहमाँ रहइ क कउनो में बचइ।’

भजन संहिता 69:25

अउर,

‘ओकर मुखियई कउनो दूसर मनई लइ लेइ।’

भजन संहिता 109:8

प्रेरितन चेलन जेनका ईसू आपन खास मदद करइया चुनेस।

21-22 यह बरे इ जरूरी अहइ कि जब पर्भू ईसू हमरे बीच रहा तउ जउन मनइयन हमरे संग सदा रहेन, ओहमों स कउनो एक क चुना जाए। कहइ क मतलब उ समइ स लइके जब स यूहन्ना मनइयन क बपतिस्मा देब सुरु किहेस अउर जब तलक ईसू क हमरे बीच स उठाइ लीन्ह गवा रहा। इ मनइयन में स कउनो एक क ओकरे फिन स जी उठइ क हमरे संग साच्छी होइ चाही।”

23 यह बरे उ पचे दुइ मनई क नाउँ दिहेन। एक यूसुफ जेका बरसबा कहा जात रहा (यूसुतुस नाउँ स जाना जात रहा) अउर दूसर मत्तियाह। 24 फिन उ पचे इ कहत भवा पराथना करइ लागेन, “पर्भू! तू सबहि क मनवा क जानत ह, हमका बतावा कि इ दुइनउँ में स तू केका चुन्या ह 25 जउन एक प्रेरित क तरह सेवा करइ बरे इ ओहदा क लइ लेई जेका आपन उठर पर जाइ बरे ओहदा छोड़के चला गवा रहा!” 26 फिन उ पचे एकरे बरे पर्ची नाएन अउर पर्ची मत्तियाह क नाउँ क निकरी। इ तरह गियारह प्रेरितन क दल में गना गवा।

पवित्र आतिमा क अवाई

2 जब फिलिस्तीन क दिन आवा तउ उ पचे एक ठउर प बटुरा रहेन। 2 तबइ हुवाँ एकाएक अकासे स खउफनाक आँधी क सब्द आवा। अउर जउन घरे में उ पचे बइठा रहेन, ओहमों समाइ गवा। 3 अउर आगी क उठत लपट जइसी जीभ हुवाँ समन्वा देखेइ देइ लाग। अउर ओनका आगी क उठत लपट जइसी जिभिया देखेइ लागिन। उ सबइ बँटी भइ जीभ एक क ऊपर आइ ठहरिन। 4 उ पचे पवित्र आतिमा स भावित भएन। अउर आतिमा स दीन्ह गए सामर्थ क अनुसार उ सबइ दूसर भाखन में बोलइ लागेन।

5 हुवाँ यरूसलेम में अकास क तरे सबहिं देसन स आवा भएन यहूदी भगत रहत रहेन। 6 जबहिं इ सब्द क अवाज सुनि गई तैसहिं एक भीड़ बटुर गइ। उ पचे अचरज में पड़ा रहेन काहेकि हर कउनो ओनका आपन भाखा में बोलत सुनेस।

7 उ पचे अचम्भा में घबड़ियाइके बोलें, “इ सबइ बोलवइया मनइयन गलीली नाहीं अहईं। 8 फिन हम पचन में स हर कउनो ओनका आपन मातृभाखा में बोलत भवा कइसे सुनत अहइ? 9 हुवाँ पारथी, मेदी अउर एलामी, मेसोपोटामिया क बसइया, यहूदिया अउर कप्पूदूकिया, पुनुस अउर एसिया 10 फ्रुगिया अउर पंफालिया मिग्र अउर कूरेने सहर क निअरे लिबिया क कछु पहँटा क मनइयन, रोम स आवा भएन सैलानी, 11 जेहमाँ जन्मा भवा यहूदी अउर यहूदी धरम क मनइयन, क्रेती अउर अरबी लोग हम सबइ परमेस्सर क अचरज कारजन क आपन आपन भाखा में सुनत अहईं।” 12 उ पचे सबइ अचम्भा में पड़िके भउचक्का होइके आपुस में पूछइ लागेन, “इ का होत अहइ?” 13 मुला दूसर मनइयन प्रेरितन क मसखरी

करत भए बोलें, “इ सबइ कछू जिआदा दाखरस पिए बाटेन।”

पतरस क गोहराउब

1814 फिन गियारह प्रेरितन क संग पतरस खड़ा भवा अउर ऊँची अवाज में मनइयन क गोहराइ क कहइ लाग, “यहूदी भाइयो अउर यरूसलेम क सबहिं बासिंदा, एँकर अरथ मोका बतावइ द्या। मोरे बचन क धियान स सुना। 15 इ पचे पिए नाहीं अहईं, जइसा की तू पचे बूझत अहा। काहेकि अबहिं तउ भिन्सारे क नौ बजा अहइ। 16 मुला इ बात अहइ जेकरे बारे में योएल नबी कहे रहा:

17 परमेस्सर कहत ह: आखिरी दिना में अइसा होइ कि मई सबहिं मनइयन प आपन आतिमा उडेल देब फिन तोहार पूत अउर बितिया भविस्सवाणी करइ लगीहीं। अउर तोहार जवान मनई दर्सन पइहीं अउर तोहार बुढ़वा लोग सपना देखिहीं।

18 हाँ, उ दिना मई आपन नउकर अउर नउकराती प आपन आतिमा उडेर देब अउर उ पचे भविस्सवाणी करिहीं।

19 मई ऊपर अकासे में अचरज कारजन अउर तरखाले भुइयों प चीन्हा देखाउब खून, आगी अउर धुआँ क बादर।

20 सूरज अँधियारा में अउर चंदा रकत में बदल जाइ, अउर तब पर्भू का दिव्य अउर महान दिन आइ।

21 अउर तब हर उ कउनो क बचाव होइ जउन पर्भू क नाउँ पुकारी।’

योएल 2:28-32

22 “ओ इम्राएलियो! इ बचन क सुना: नासरी ईसू एक ठु अइसा मनई रहा जेका परमेस्सर तोहरे समन्वा अद्भुत कारज, अचरज कारजन अउर अद्भुत चीन्हन क साथ जेका परमेस्सर आपन खुद किहे रहा तोहरे बीच ओका परगट किहेस। जइसा कि तू खुद जानत ह। 23 ई मनई तोहका कउनो तय कीन्ह भइ योजना अउर पहिले क गियान क अनुसार तोहरे हवाले कीन्ह गवा रहा अउर तू पचे ओका अधर्मियन क हाथे पकड़वाइके क्रूस प चढ़वाया अउर खीला ठोंकवाइके मरवाइ दिहा। 24 मुला परमेस्सर मउत क दुःखे स अजाद कराइके फिन जिआइ दिहेस। काहेकि ओकरे बरे इ होइवाला नाहीं रहा कि मउत ओका राखि पावत। 25 जइसा कि दाऊद ओकरे बारे में कहेस ह:

‘मई हमेसा पर्भू क आपन समन्वा देखेउँ ह। उ मोरे दाहिन कइती बिराजत अहइ, काहेकि मई दुग न पावउँ।’

- 26 एहसे मोर हिरदय खुस अहइ अउर मोर बाणी आनंद में बा; मोर देह भी आसा में जिई।
 27 तू मोर आतिमा क अधोलोक में न छोड़ब्या। तू आपन पवित्तर जन क नास क अनुभव न होइ देब्या।
 28 तू ही मोरी जिन्नगी क राह क गियान कराइ दिहा ह। अउर तू ही आपन हाजिरी स मोका आनन्द स पूरा कइ देब्या।

भजन संहिता 16:8-11

29⁴मोरे भाइयन, मई पतिआइके आदि मनई दाऊद क बारे में तू पचन्स कहि सकत हउँ कि ओकर मउत होइ गइ अउर ओका माटी दइ दीन्ह गइ। अउर ओकर कब्र हमरे हियँ आजु तलक मौजूद बा।³⁰मुला काहेकि उ एक नबी रहा अउर जानत रहा परमेस्सर सपथ खाइके ओका बचन दिहेस ह कि उ ओकरे वंस में स कउनो एक क सिंहासन प बइठाई।³¹यह बरे अगवा जउन होइ क बाटइ, ओका दाऊद लखत भए उ जब इ कहे रहा कि:

‘ओका अधोलोक में नाहीं छोरा गवा अउर न ही ओकरे देह स सड़ब गलब क अंजाद लगाएस।’

तउ उ मसीह क पुनरुत्थान क बारे में ही कहे रहा।³²इहइ ईसू क परमेस्सर पुनरुत्थान कइ दिहेस। इ सच्चाई क हम पचे साच्छी अही।³³परमेस्सर क दाहिन हाथे कइँती सबन ते उँचका ओहवा पाइके ईसू पिता स सपथ क अनुसार पवित्तर आतिमा पाएस अउर फिन उ इ आतिमा क उडेरेंस जेका अब तू लखत बाट्या अउर सुनत बाट्या।³⁴दाऊद सरगे में नाहीं गवा तउ उ खुद कहत ह:

‘पर्भू (परमेस्सर) मोर पर्भूस कहेस: मोरे दाहिने बइठा, जब ताई मई

- 35 तोहरे बैरिन क तोहरे गोड़वा तरे गोड़ धरइ क चउकी न बनइ देइ।’

भजन संहिता 110:1

36⁴यह बरे इम्राएल क समूचइ मनइयन ठीक तरह स समुझा लेइ कि परमेस्सर इ ईसू क जेका तू पचे क्रूस प चढ़ाइ दिहे रहा, पर्भू अउर मसीह दुइनउँ ठहरावा ग रहेन।’

37⁴मनइयन जब इ सुनेन तउ उ पचे घबराइ गएन अउर पतरस अउर दूसर प्रेरितन स कहेन, “तउ भाई, हम सबन क का करइ चाही।”

38⁴पतरस ओनसे कहेस, “मनफिराओ अउर आपन पापे क छमा पावइ बरे तू पचन में स हर एक क ईसू

मसीह क नाउँ स बपतिस्मा लेइ चाही। फिन तू पवित्तर आतिमा क उपहार में पउब्या।³⁹काहेकि इ सपथ तोहरे बरे, तोहरे संतान बरे अउर ओन सब कामे बरे अहइ जउन बहोत दूर बाटेन। इ सपथ ओन सब बरे अहइ जेनका हमार पर्भू परमेस्सर आपन लगे बोलावत ह।”

40⁴अउर बहोत स बचन स उ ओनका चिताउनी दिहेस अउर समझाय के ओनसे कहेस, “इ कुमार्गी पीठी स आपन खुद क बचावा।”⁴¹तउ जउन ओकरे संदेसा क अंगीकार किहेन, ओनका बपतिस्मा दीन्ह गवा। इ तरह उ दिना उ बिसवासियन क झुण्ड में कउनो तीन हजार मनई अउर जुड़ गएन।⁴²उ पचे प्रेरितन क उपदेस, संगत, रोटी क तोड़इ अउर पराथना करइ में जिअरा लगाइ दिहन।

बिसवासी क मिली जुली जिन्नगी

43⁴हर मनई प भय रहा अउर प्रेरितन क जरिये बहुत अचरज कारजन अउर अदभुत चीन्हन परगट कीन्ह जात रहेन।⁴⁴सबहि बिसवासी एक संग बटुरत रहेन अउर ओनके लगे जउन कछू रहा, उ पचे आपुस में बाँट लेत रहेन।⁴⁵उ पचे आपन सबहि चीजन अउर धन-दौलत बेंचेन अउर ओन सब चिजन्क आपुस में बाँट लिहन, जइसे जेका जरूरत रही।⁴⁶अउर उ पचे हर दिन मंदिर में ऐक उदेस्स स मिलि जात रहेन। उ पचे घरे में रोटी तोड़ लेतेन अउर आनंद अउर निर्मल मन स खात रहेन।⁴⁷उ पचे सब मनइयन क नीक बिचार क आनंद लेत भए पर्भू क स्तुति गावत रहेन। अउर हर दिन परमेस्सर, जेनकइ उद्धार करत, ओनकइ दल में अउर जोरि दीन्ह जात।

लँगड़ा भिखारी क चंगा कीन्ह जाब

3⁴दुपहरिया क बाद तीन बजे पराथना क समइ पतरस अउर यूहन्ना मंदिर जात रहेन।²तबहिँ एक तु अइसा मनई जउन जनम स ही लँगड़ा रहा, लइ जावा जात रहा। उ पचे हर दिना ओका मंदिर क सुन्नर नाउँ क फाटक प बइठाइ देत रहेन। काहेकि उ मंदिर में जाइवाला मनइयन स पइसा माँग सकइ।³ई मनई ने जब देखा यूहन्ना अउर पतरस मंदिर में प्रवेस करयवाला अहई तउ ओनसे पइसा मागेंस।⁴यूहन्ना क संग पतरस ओकरी कइँती लखत भए बोलेन, “हमरी कइँती लखा।”⁵तउ उ ओनसे कछू मिल जाइ क आसा करत भवा ओनकर कइँती लखेंस। “मुला पतरस कहेस, “मोरे लगे सोना या चाँदी तउ अहइ नाहीं मुला जउन कछू अहइ, मई तोहका देत हउँ। नासरी ईसू मसीह क नाउँ स ठाड़ हवा अउर चला।”⁷फिन ओकर दाहिन हथवा धइके ओका उठाएस. फउरन ओकरे गोड़वा अउर अखनी में जान आइ गइ।⁸अउर उ फिन आपन गोड़वा क बल उछरा अउर चल दिहसा। उ उछरत कूदत चलत अउर

परमेस्सर क स्तुति गावत ओनकइ संग मंदिर मँ घुसा।⁹सबहिं मनइयन ओका चलत अउर परमेस्सर क स्तुति गावत लखेन।¹⁰पहिचानेन कि इ उहइ अहइ जउन मंदिर क सुन्नर दुआरे प बइठा भीख माँगत रहा। ओकरे संग जउन कछू भवा रहा ओह पइ उ पचे अचरज स भरि अउर चकित होइ गएन।

पतरस क प्रबचन

¹¹उ मनई अबहिं पतरस अउर यूहन्ना क संग रहा। तउ सबहिं मनई अचम्भा मँ पड़िके उ ठउर प ओकरे लगे दउड़त दउड़त आएन जउन सुलैमान क ड्यौड़ी कहवावत रहा।¹²पतरस जब इ लखेस तउ उ मनइयन स बोला, "हे इम्राएल क मनइयन, तू पचे इ बाते प चकित काहे होत बाट्या? अइसे घूरि घूरिके हमका काहे लखत बाट्या, जइसे मान ल्या हम ही आपन सक्ती या बल प इ मनई क चलइ फिरइ जोग बनइ दीन्हह।¹³इब्राहीम, इसहाक अउर याकूब क परमेस्सर, हमरे पूर्वजन कपरमेस्सर आपन सेवक ईसू क महिमा स बखानेस। अउर तू पचे ओका मरवावइ बरे धरवाइ दिहा। अउर फिन पिलातुस क जरिए ओका छोर दिहे जाए क जिअरा मँ ठान लेइ स पिलातुस क समन्वा तू पचे ओका मानइ स इनकार कइ दिहा।¹⁴ईसू पवित्तर अउर भोला रहा मुला तू ओका मान्या नाहीं अउर माँग्या कि एक हत्तियारा क तोहरे बरे छोरे दीन्ह जाइ।¹⁵जो मनइयन क जिन्नगी देत रहा ओका तू मारि डया मुला परमेस्सर मरा भवा मँ स ओका पुनर्जीवन दिहस। हम एँकर साच्छी अही।

¹⁶इ ईसू क सक्ती रही जउन इ लँगड़ा क चंगा किहेस। इ भवा काहेकि हम ईसू क सक्ती मँ पतिआइत ह। तू पचे इ मनई क लख सकत ह अउर तू सबइ ओका जानत ह। उ पूरी तरह स चंगा होइ गवा काहेकि उ ईसू मँ ओकर बिसवास रहा। तू पचे निहार्या कि इ सब कछू भवा।

¹⁷हे भाइयो, अब मई जानत हई कि जइसे अग्याने मँ तू सबइ वइसा ही किहा, वइसा ही तोहार ही नेतन किहना।¹⁸परमेस्सर आपन सबहिं नबियन क मुँहना स बकरवाइ दिहेस कि ओकरे मसीह क दुःख भोगे पड़ी। उ इ तरह पूरा किहेस।¹⁹यह बरे तू आपन मनफिरावा अउर परमेस्सर कइँती फिरि आवा काहेकि तोहार पाप धोइ दीन्ह जाँइ।²⁰जेसे पर्भू क हाजिर होइ क समइ आतिमा क सान्ति क समइ आइ जाइ अउर पर्भू तोहरे बरे मसीह क पठवइ जेका उ तोहरे बरे चुन लिहे बा, कहइ क अरथ ईसू मसीह।²¹मसीह क उ समइ तलक सरग मँ रहइ क होइ जब ताई सबहिं बातन पहिले जइसी न होइ जेनके बारे मँ बहोत पहिले ही परमेस्सर पवित्तर नबियन क मुँहना स बताइ दिहे रहा।²²मूसा कहे रहा, 'पर्भू परमेस्सर तोहरे बरे, तोहरे आपन लोगन मँ स ही

एक मोरे जइसा नबी खड़ा करी। उ तू पचन स जउन कछू कहइ, तू पचे उहइ प चल्या।²³अउर जउन मनई उ, इ नबी क बात न सुनी, मनइयन मँ स ओका परमेस्सर क मनइयन स अलग कर दीन्ह जाई।'*²⁴समूएल अउर ओकरे पाछे आए भए सबहिं नबियन जब कबहुँ कछू कहेन तउ एनही दिनन क एलान किहेन।²⁵अउ तू सबइ तउ ओन नबियन अउर उ करार क उत्तराधिकारी अहा जेका परमेस्सर तोहरे पूर्वजन क संग किहे रहा। उ इब्राहीम स कहे रहा, 'तोहरे सन्ताने स धरती क सभी राष्ट्र क मनइयन आसीबाद पइहीं।'*²⁶परमेस्सर जब आपन सेवक क पुनर्जीवित किहेस तउ पहिले पहिले उ तोहरे लगे पठएस काहेकि तू पचनक तोहरे बुरे राहे स दूर कइके आसीबाद देई।"

पतरस अउर यूहन्ना यहूदी सभा क समन्वा

4 अबहिं पतरस अउर यूहन्ना मनइयन स बतियात रहेन कि याजक, मंदिर क सिपाहियन क मुखिया अउर कछू सदुकीयन ओनकइ लगे आएन।²उ पचे ओनसे इ बाते प भिनका रहेन कि पतरस अउर यूहन्ना उपदेस देत भए ईसू क मरे हुएन मँ स जी उठइ क जरिए पुनरुत्थान क प्रचार करत रहेन।³तउ उ पचे ओका बंदी बनइ लिहेन अउर काहेकि उ समइ सौझ होइ ग रही, यह बरे दूसर दिना हौलात मँ राखेन।⁴मुला उ पचे उ संदेसा सुनेन कि ओनमँ स बहोतन ओह प बिसवास अउर इ तरह ओनकइ गनती पाँच हजार ताई पहोंच गइ।⁵दूसरे दिन यहूदी नेतन बुजुर्ग यहूदी नेतन अउर धरम सास्तिरियन यरूसलेम मँ बटुरेन।⁶महायाजक हन्ना, काइफा, यूहन्ना, सिकन्दर अउर महायाजक क परिवारे क सबहिं मनई भी हुवाँ हाजिर रहेन।⁷उ सबइ इ प्रेरितन क आपन समन्वा खड़ा कइके पृछइ लागेन, "तू पचे कउने सक्ती या अधिकार स इ काम किहे ह?"

⁸फिन पवित्तर आतिमा* क सवार होए स पतरस ओनसे कहेस, "हे मनइयन क नेतन अउर बुजुर्ग नेतन।⁹जदि आजु हमसे एक बीमार मनई क संग कीन्ह भलाई क बारे मँ इ पूछब पछोरब होत अहइ कि उ नीक कइसे होइ गवा।¹⁰तउ तू सबनक अउर इम्राएल क मनइयन क इ पता होइ जाइ चाही कि इ काम नासरी ईसू मसीह क नाउँ स भवा ह जेका तू पचे क्रूस प चढ़ाइ दिहा ह जेका परमेस्सर मरि जाए प पुनर्जीवित कइ दिहस ह। उहइ क जरिए पूरी तरह स नीक भवा इ मनई तोहरे समन्वा ठाइ बा।¹¹इ ईसू उहइ

'पर्भू... जाई' व्यवस्था 18:15; 19

'तोहरे ... पइहीं' उत्पत्ति 22:18; 26:24

पवित्तर आतिमा परमेस्सर क आतिमा, मसीह क आतिमा अउ सहायक। परमेस्सर अउ ईसू क मिलि जाए स उ मनइयन मँ परमेस्सर क काम करत ह।

‘पाथर अहइ जेका तू सबइ राजमिस्तरा लोग तुच्छ जान्या रहा, उहइ बहोत खास पाथर बन गवा अहइ।’

भजन संहिता 118:22

¹²कउनो दूसर स उदधार नाही अहइ, संसारे में अउर दूसर नाउँ नाही अहइ जेहसे मानव जाति बचाई जाय सकइ। हम सब ईसू स ही उदधार पाउब।”

¹³उ पचे जब पतरस अउर यूहन्ना क निडर होब निहारेन अउर इ समुझेन कि पतरस अउर यूहन्ना अनपड़ अउर साधारण मनइ रहेन तउ ओनका बहोत अचरज भवा। फिन उ पचे जान गएन कि इ सबइ ईसू क संग रहि चुका बाटेन। ¹⁴अउर काहेकि उ पचे उ मनई क जउन चंगा भ रहा, ओनकइ संग खड़ा भवा लखत रहेन। तउ ओनकइ लगे तनिकउ बोलइ क कछू नाही रहा। ¹⁵उ पचे ओनसे यहूदी महासभा स निकर जाइ क कहेन अउर फिन उ सबइ इ कहत भए आपुस में बिचार करइ लागेन कि ¹⁶“इ पचन्क संग कइसा बिबहार कीन्ह जाइ? काहेकि यरूसलेम में बसइया हर कउनो जानत ह कि एँके जरिये एक तु अचरज क काम कीन्ह गवा ह अउर हम ओका मना नाही कइ सकित। ¹⁷मुला हम एँका चिताउनी दइ देइ कि उ सबइ इ नाउँ क बात कउनो अउर मनई स जिन करई काहेकि मनइयन में इ बात क संवरइ क अउर फैलि जाइ स रोक जाइ सकइ।”

¹⁸तउ पचे ओनका भीतर बोलाएन अउर हुकुम दिहेन कि उ पचे ईसू क नाउँ प न तउ कउनो स कछू बात करइ अउर न ही उपदेस देई। ¹⁹मुला पतरस अउर यूहन्ना ओनका जवाब दिहेन, “तू पचे ही फरियावा, का परमेस्सर क समन्वा हमरे बरे इ नीक होइ कि परमेस्सर न सुनिके हम तोहार सुनी? ²⁰हम, जउन कछू हम पचे लखा ह अउर सुना ह, ओका कहे क आलावा अउर कछू नाहिं कर सकित।” ²¹⁻²²फिन उ पचे ओनका धमकाए क पाछे छोड़ दिहेन। ओनका सजा देइ क कउनो रस्ता नाही मिलि सका काहेकि जउन कछू भवा रहा, ओकरे बरे सबहिं मनइयन परमेस्सर क स्तुति करत रहेन। जउने मनई क नीक करइ क इ काम कीन्ह गवा रहा, ओकर उमिर चालीस बरिस स जिआदा रही।

पतरस अउर यूहन्ना क लउटव

²³जब ओनका छोड़ दीन्ह गवा तउ आपन ही मनइयन क लगे आइ गएन अउर ओनसे जउन कछू मुख्ययाजक अउर बुजुर्ग यहूदी नेतन कहेन, उ सब ओनका कहिके सुनावा गवा। ²⁴जब उ पचे इ सुनेन तउ मिलिके उँची अवाज में परमेस्सर क गोहरावत भवा बोलेन, “स्वामी, तू ही आकास, धरती, समुदर अउर ओकरे अंदर जउन कछू अहइ, ओका बनाया ह। ²⁵तू ही पवित्तर आतिमा

क जरिये आपन सेवक, हमरे पूर्वज दाऊद क मुँहना स कहे रहा:

‘देखाएन इ जातिन आपन अहंकार काहे? मनइयन वृथा ही कुचाल काहे किहेन?

²⁶ इ धरती क राजा लोग आपन क तइयार किहेन ओनके खिलाफ जुद्ध बरे। अउर राजा बटुर गएन पभू अउर ओकरे मसीह क खिलाफत माँ।’

भजन संहिता 2:1-2

²⁷हाँ, हेरोदेस अउर पुन्तियुस पिलातुस भी इ सहर में गैर यहूदियन अउर इग्राएलियन क संग मिलिके तोहरे पवित्तर सेवक ईसू क खिलाफ, जेकर तू मसीह रूप में अभिसेक किहे ह, सचमुच उ पचे एक अउट ग रहेन। ²⁸उ पचे बटुर गएन काहेकि तोहार सकती अउर इच्छा क अनुसार जउन कछू पहिले ही तय होइ चुका रहा, उ पूरा होइ। ²⁹अउर अबहिं हे पभू, ओनकइ धमकिन प धियान द्या अउर आपन सेवक लोगन क निडर होइके ‘तोहार बचन’ सुनावइ क सकती द्या ³⁰जब कि चंगा किहे क पाछे आपन हाथ बढ़ाया अउर अद्भुत चीन्हन अउर अद्भुत कारजन तोहरे पवित्तर सेवकन क जरिये ईसू क नाउँ प कीन्ह जात रहत ही।”

³¹जब उ पचे पराथना कइ चुकेन तउ जउने ठउरे प उ सबइ बटुरा रहेन, उ हल गवा अउर ओन सब में ‘पवित्तर आतिमा’ समाइ गवा। अउर उ पचे निडर होइके परमेस्सर क बचन बोलइ लागेन।

बिसवासी क मेल जेल क जिन्गी

³²बिसवासियन क इ समूचा दल एक मन अउर एक तन स साथ रहा। कउनो भी इ नाही कहत रहा कि ओकर कउनो भी चीज ओकर आपन अहइ। ओनकइ लगे जउन कछू होत, उ पचे सब कछू क आपुस में बाँट लेतेन। ³³अउर प्रेरितन पूरी सकती क संग पभू ईसू क पुनरुत्थान क बारे में साच्छी देत रहेन। परमेस्सर क महान बरदान ओन पइ बना रहत।

³⁴दले में कउनो क कउनो चीज क कमी नाही रहत रही। काहेकि जउन कउनो क लगे खेत या घर होत, उ पचे ओका बेच देत रहेन अउर ओसे जउन धन मिलत, ³⁵ओका लिआइके प्रेरितन क गोड़वा प धइ देतेन। अउर जेका जेतनी जरुरत होत, ओका ओतँना धन दइ दीन्ह जात।

³⁶उदाहरण बरे यूसुफ नाउँ क, साइप्रस में पइया भवा, एक लेवी रहा, जेका प्रेरितन बरनाबास (अर्थात् “सान्ति क पूत”) भी कहा करत रहेन। ³⁷उ एक उ खेत बँच दिहेस जेकर उ मालिक रहा अउर उ धन लाइके प्रेरितन क गोड़वा प धइ दिहस।

हनन्याह अउर सफ़ीरा

5 हनन्याह नाउँ क एक मनई अउर ओकर पतनी सफ़ीरा मिलिके आपन दौलत क एक हींसा बेंच दिहेन।²अउ आपन पतनी क जानकारी में एहमाँ स कछू धन जुलय लिहेन। अउर कछू धन प्रेरितन क गोड़वा प धइ दिहेन।³एह पड़ पतरस कहेस, “अरे हनन्याह, सइतान क तू आपन मन में इ बात नाइ देइ दिहा कि तू पवित्तर आतिमा स झूठ बोल्या अउर धरती क बेंचे स मिला धन में स तनिक बचाइके धइ लिहा? ⁴ओका बेंचइ स पहिले का उ तोहार ही नाहीं रही? अउर जब तू ओका बेंच दिहा तउ उ धन का तोहरे कब्जा में नाहीं रहा? तू इ बात क काहे सोच्या? तू मनइयन स नाहीं, परमेस्सर स झूठ बोल्या ह।”⁵हनन्याह जबहिं इ सबदन क सुनेस तउ उ चकराइके गिरि गवा अउर दम तोड़ दिहस। जउन कउनो भी इ बारे में सुनेस, सबन प गहिर भय छाइ गवा।⁶फिन जवान पुरुसन उठिके ओका कफन में लपेटेन अउर बाहरे लइ जाइके गाड़ दिहेन।

⁷कउनो तीन घण्टा पाछे, जउन कछू भवा रहा, ओका न जानत भइ ओकर पतनी भितरे आइ।⁸पतरस ओसे कहेस, “बतावा, तू आपन खेत क एँतेने में ही बेच्या ह?”

तउ उ कहेस, “हाँ, एँतना मैं ही।”

⁹तबहिं पतरस ओसे कहेस, “तू पचे दुइनउँ पभू क आतिमा क परीच्छा बरे काहे मान लिहा? लखा तोहरे भतारे क दफनावइवालन क गोड़ दुआरे ताई आइ ग अहइ अउर उ पचे तोहका भी ढोइ लइ जइहीं।”¹⁰तब उ ओकरे गोड़े प गिरि पड़ी अउर मरि गइ। फिन जवान पुरुसन भितरे आएन अउर ओका मरा पाएन। तउ उ पचे ओका ढोइके ओकरे पति क लगे ओका गाड़ दिहेन।¹¹तउ समूचइ कलीसिया अउर जउन कउनो इ बात क सुनेस, ओन सब प गहिरा भय छाइ गवा।

प्रमाण

¹²प्रेरितन क जरिये मनइयन क बीच बहोत स अद्भुत कारजन परगट होत रहेन अउर अचरज कारजन कीन्ह जात रहेन। उ पचे सबहिं सुलैमान क ओसारे में बटुरा रहेन।¹³मुला ओनमाँ स कउनो क हिम्मत प्रेरितन में मिलइ बरे नाहीं होत रही। मुला मनइयन ओनकइ गुन खूब गावत रहेन।¹⁴ओहर पभू प बिस्वास करइवालन स्त्रियन अउर पुरुसन जिआदा स जिआदा बाढ़त जात रहेन।¹⁵एँकरे कारण मनइयन आपन कछू बीमार लोगन क लाइके खटिया अउर बिछौना प गलियन में ओलारइ लागेन काहेकि तबहिं पतरस ओहर स निकरा तउ ओनमाँ स कछू प कमती स कमती छाया पड़ि सकइ।¹⁶यरूसलेम क आसपास क नगर स लोग आपन बेरमियन अउर दुस्ट आतिमा स सतावा गएन मनइयन क लइके आवइ लागेन। अउर सबहिं चंगा होइ जात रहेन।

यहूदियन क प्रेरितन क रोकइ क जतन

¹⁷फिन महायाजक अउर ओकर संगी यानी सदूकियन क दल, ओनकइ खिलाफ खड़ा होइ गएन। उ पचे मने में कुढ़त रहेन।¹⁸यह बरे उ पचे प्रेरितन क बंदी बनाइ लिहेन अउर ओनका कैदखाना में बन्द कइ दिहेन।¹⁹मुला राति क समइ पभू क एक दूत कैद क फाटक खोल दिहस। उ ओनका बाहरे लइ जाइके कहेस,²⁰“जा, मंदिर में ठाड़ होइ जा अउर इ नई जिन्नगी क बारे में मनइयन क सब कछू बतावा।”²¹जबहिं उ पचे इ सुनेन तउ भोरहिं तड़के मंदिर में घुसि गएन अउर उपदेस देइ लागेन।

फिन जब महायाजक अउर ओकर संगी हुवाँ पहेँचेन तउ उ पचे यहूदी संघ अउर इम्राइल क बुजुर्ग क पूरी सभा न्योतेन। उ पचे कैदखाना स प्रेरितन क बोलवावइ पठएन।²²किन्तु जब अधिकारी कैदखाना में पहुँचेन तउ उ पचे प्रेरितन क हुवाँ नाहीं पाएन। उ पचे लौटिके एँका बताएन अउर²³कहेन, “हम पचे कैदखाना में सुरच्छा क लगा भवा ताला अउर दुआरे प तैनात सुरच्छाकारियन क पावा। मुला जब हम दरवाजा खोला तउ हमका भितरे कउनो नाहीं मिला।”²⁴जइसेन मंदिर क सुरच्छाकारी अउर मुख्ययाजकन इ सबदन क सुनेन तउ उ पचे चकराइ गएन अउर सोचइ लागेन, “अब का होई।”²⁵एँतेने में कउनो दूसर मनई आवा अउर ओनका बताएस, “जेनका तू पचे जेल में धाँध दिहा ह, उ पचे मंदिर में खड़ा होइके उपदेस देत बाटेन।”²⁶तउ सुरच्छाकारी आपन अधिकारी क संग हुवाँ गवा अउर बिना ताकत क प्रयोग किए ओनका वापस धइ लिआवा काहेकि उ पचे डेरात रहेन कि कहूँ मनई ओनका (मंदिर क सुरच्छा कर्मी) पाथर स न मारइँ।

²⁷उ पचे ओनका भितरे लइ आएन अउर सबन त ऊँचकी यहूदी सभा क समन्वा खड़ा कइ दिहेन। फिन महायाजक ओनसे फरियावत भवा पूछेस,²⁸“हम इ नाउँ स उपदेस न देइ बरे तोहका करी हुकुम दिहे रहे। अउर तू पचे फिन भी समूचइ यरूसलेम क आपन उपदेस स भरि दिहा ह। अउर तू पचे इ मनई क मउत क अपराध हम पचे पड़ लावइ चाहत बाट्या।”

²⁹पतरस अउर दूसर प्रेरितन जवाब दिहेन, “हमका मनइयन क बनिस्बद परमेस्सर क आग्या मानइ चाहीं।³⁰उ ईसू क हमरे पूर्वजन क परमेस्सर मउत स फिन जीवित कइके खड़ा कइ दिहसे ह जेका एक सूली प टाँगिके तू पचे मार डाय़ा ³¹ओका ही प्रमुख अउर उद्धारकर्ता क रूप में बड़कइ देत भवा परमेस्सर आपन दाहिन हाथे कईती बड़ठाएस काहेकि इम्राएलियन क मनफिराव अउर पाप क छमा दीन्ह जाइ सकइ।³²एँ सबन बातन क हम साच्छी अहीं अउर वइसे ही पवित्तर आतिमा भी बा उहइ परमेस्सर ओनका दिहसे ह जउन ओकरे आज्ञा क मानत हीँ।”

³³जब उ पचे इ सुनेन तउ उ पचे कोहाइ गएन अउर ओनका मारि डावइ चाहेन। ³⁴मुला महासभा में स एक गमलिलएल नाउँ क फरीसियन जउन धरमसास्तिरी अध्यापक रहा अउर जेकर सब लोग मान सम्मान करत रहेन, ठाड़ भवा अउर हुकुम दिहेस कि एँनका तनिक देरी बरे बाहेर कइ दीन्ह जाइ। ³⁵फिन उ ओनसे कहेस, “इझ्राएल क पुरसो, तू पचे इ मनइयन क संग जउन कछू करइ प उतारु अहा, ओका सोच बिचारिके किहा। ³⁶कछू समइ पहिले आपन क बड़कवा एलान करत भवा थियूदास परगट भवा। ओर कउनो चार सौ मनई ओकरे पाछे भी होइ गएन, मुला उ मार डावा गवा अउर ओकर सबहिं मनवइयन एहर ओहर छिटक गएन। ओकर फल कछू नाहीं निकरा।

³⁷ओकरे पाछे जनगणना क समइ गलीली क बसइया यहूदा परगट भवा। उ भी कछू मनइयन क आपन पाछे कइँती हैंच लिहैस। उ भी मारि डावा गवा। ओकर भी सबहिं एहर ओहर होइ गएन। ³⁸यह बरे अबहिं मईँ तू पचन्स कहत हउँ, इ मनइयन स अलग रहा, एँनका अइसे ही अकेल्ले छोरि दया काहेकि एँनकइ इ चाल या काम मनई कइँती स अहइ तउ खुद नास होइ जाइ। ³⁹मुला जदि उ परमेस्सर स अहइ तउ तू पचे ओनका रोक न पउब्या। अउर तब होइ सकत ह तू आपन खुद क ही परमेस्सर क खिलाफ लड़त भिड़त पउब्या।”

उ पचे जइसा गेमलिलएल कहेस मान लिहेन। ⁴⁰अउर प्रेरितन क भितरे बोलाइके उ पचे कोड़ा लगावाएन अउर इ आज्ञा दइके कि उ पचे ईसू क नाउँ क कउनो चर्चा न करइँ, ओनका जाइ दिहेन। ⁴¹तउ उ पचे प्रेरितन इ बात क मजा मारत भए कि ओनका ओकरे नाउँ बरे बेजत रहइ क जोगग गना गवा ह, यहूदी महासभा स बाहिर चला गएन।

⁴²फिन मंदिर अउर घर-घर में हार रोज इ सुसमाचार कि ईसू मसीह अहइ उपदेस देब अउर प्रचार करब उ पचे कबहुँ नाहीं तजेन।

ख़ास काम बरे सात मनइयन क चुना जाब

6 उ दिनन जबहिं चेलन क गनती बाढ़त रही, तउ यूनानी बोलवइया अउर इब्रानी बोलवइया यहूदियन में एक झगड़ा होइ गवा काहेकि रोजाना विधवावन क चीज बाँटइ में ओनकइ सुधि नाहीं लीन्ह जात।

²तउ बारहु प्रेरितन क समूची मण्डली क एक साथे बोलाइके कहेन, “हम सबइ बरे परमेस्सर क बचन क सेवकइ तजिके खिलाने क इन्तजाम करब नीक नाहीं अहइ। ³भाइयन, आपन में स सात नामी मनइयन क पवित्तर आतिमा अउर सूझबूझ स भरा भवा सात मनइयन क चुनि ल्या। हम ओनका इ कामे क हकदार बनइ देइ। ⁴अउर आपन आपका पराथना अउर बचन क सेवा क कामे में जिअरा लगाइ क राखब।”

⁵इ सुझावे स समूचइ मण्डली बहोत खुस भइ। तउ उ पचे बिसवास अउर पवित्तर आतिमा स भरा भवा स्तिफनुस नाउँ क मनई क अउर फिलिप्पुस, प्रखुरस, नीकानोर, तिमोन, परमिनास अउर अन्ताकिया क निकुलाऊस क यहूदी धरम क कबूले रहा, चुन लिहैस। ⁶अउर इ मनइयन क फिन उ पचे प्रेरितन क समन्वा हाजिर कइ दिहेन। प्रेरितन पराथना किहेन अउर ओन पइ हाथ धरेन।

⁷इ तरह परमेस्सर क बचन संचरइ लाग अउर यरूस्लेम में चेलन क गनती बहोत बाढ़इ लाग। याजकन क एक बहोत बड़ा गुट भी इ मत क मानइ लाग।

यहूदी स्तिफनुस क खिलाफ

⁸स्तिफनुस एक अइसा मनई रहा जउन अनुग्रह अउर सामर्थ स भरपूर रहा। उ मनइयन क बीच बड़ा बड़ा अद्भुत कारजन अउर अद्भुत चीन्हन परगट करत रहा। ⁹मुला अजाद कीन्ह भवा अइसा कहवावत मनइयन में स कछू लोग जउन कुरेनी अउर सिकन्दरिया, अउर किलिकिया अउर एसिया स आवा भएन यहूदी रहेन, उ पचे ओनकइ खिलाफ बहस करइ लागेन। ¹⁰मुला उ जउन बुद्धिमानी अउर आतिमा स बोलत रहा, उ पचे ओकरे समन्वा नाहीं टिक पाएन। ¹¹फिन उ पचे कछू क लालच दइके कहवाएन, “हम पचे मूसा अउर परमेस्सर क खिलाफ एँका बेजत स भरा सबद कहत सुना ह।” ¹²इ तरह उ पचे जनता क बुजुर्ग यहूदी नेतन क, अउर धरम सास्तिरियन लोगन्क हुस्काइ दिहेन। फिन उ पचे ओका आइके धइ लिहेन अउर सबन स सर्वोच्च यहूदी महासभा क समन्वा लइ आएन। ¹³उ पचे उ सब लबार गवाह हाजिर किहेन जउन कहेन, “इ मनई इ पवित्तर ठउर अउर व्यवस्था क खिलाफ बोलत बालत कबहुँ रुकत नाहीं बा। ¹⁴हम एँका कहत सुना ह कि इ नासरी ईसू इ जगह क नास कइ देइ अउर मूसा जउन रीति-रिवाज क हमका दिहे अहइ ओका बदल देइ।” ¹⁵फिन सबन स सर्वोच्च यहूदी महासभा में बइठा भए सबहिं मनइयन में ओका धियान स लखा तउ पावा कि ओकर मुहँना कउनो सरगदूत क नाई देखाई देत रहा।

स्तिफनुस क भाखन

7 फिन महायाजक कहेस, “का इ बात अइसे ही अहइ?” ²उ जवाब दिहस, “भाइयो, अउर बाप क समान बुजुर्गन, मोर बात सुना। हारान में बसइ स पहिले अबहिं जब हमार बाप इब्राहीम मेसोपोटामिया में रहा, तउ महिमा वाला परमेस्सर ओका दर्सन दिहेस ³अउर कहेस, ‘आपन देस अउर आपन रिस्तेदारन क तजिके तू उ धरती प चला जा, जेका तोहँका मईँ देखॉउब।’ * ⁴तउ उ कसदियन क धरती क तजिके हारान में बसि गवा जहाँ ते ओकरे

पिता क मउत क पाछे परमेस्सर ओका इ देस में आवइ क न्योतेस जहाँ तू पचे अबर्हि रहत बाट्या।⁵ परमेस्सर हियाँ ओका हेबानामा में कछू नाहीं दिहस, डग भइ धरती भी नाहीं। तउ भी ओकरे कउनो पूत नाहीं रहा फिन परमेस्सर ओसे प्रतिज्ञा किहेस इ देस उ ओका अउर ओकरे बंसज क ओकरी दौलत क तरह देइ।⁶ परमेस्सर ओसे इ भी कहेस, 'तोहार बंसज कहुँ विदेस में परदेसी होइके रइहीं अउर चार सौ बरिस ताई ओका नउकर बनइके, ओनके संग बहोत बुरा बर्ताव कीन्ह जाइ।' ⁷ परमेस्सर कहेस, 'दास बनइवइवाली उ राष्ट्र क मई सजा देब अउर ऐंकरे पाछे उ पचे देस स बाहेर आइ जइहीं अउर इ स्थान प मोर सेवा करिहीं।' * ⁸ परमेस्सर इब्राहीम क खतना क चीन्हा स करार किहेस। अउर उ इ तरह इसहाक क पिता बना। ओकरे जनम क पाछे अठएँ दिन उ ओकर खतना किहेस। फिन इसहाक स याकूब अउर याकूब स बारहु कुल क पहिला मनई पइदा भएन।

⁹ उ पचे पहिलउ मनइयन यूसुफ स जलन राखत रहेन। तउ उ पचे ओका मिश्र में दास बनवइ बरे बेंच दिहेन। मुला परमेस्सर ओनके संग रहा। ¹⁰ अउर उ ओका सबहिं मुसीबतन स बचाएस। परमेस्सर यूसुफ क गियान दिहस अउर ओका इ जोग बनएस जैसे उ मिश्र क राजा फिरौन क अनुग्रह पात्र बन जाइ। फिरौन ओका मिश्र क राज्यपाल अउर आपन घर-बार क अधिकारी तैनात किहेस। ¹¹ फिन समूचइ मिश्र अउर कनान देस में अकाल पड़ा अउर बड़ा संकट छाड़ गवा। हमार पूर्वजन खाइ क कछू नाहीं पाइ सकेन। ¹² जब याकूब सुनेस कि मिश्र में अनाज अहइ, तउ उ हमरे पूर्वजन क हुवाँ पठएस इ पहिला मौका रहा। ¹³ ओनकइ दूसर जात्रा क मौका पइ यूसुफ आपन भाइयन क बारे में बताएस अउर तब्बइ फिरौन क भी यूसुफ क परिवार क जानकारी मिली। ¹⁴ तउ यूसुफ आपन पिता याकूब अउर परिवार क सबहिं लोगनक, जउन कुल मिलाइके पचहतर रहेन, बोलवाइ पठएस। ¹⁵ तब याकूब मिश्र आइ गवा अउर उ हुवाँ वइसे ही प्राण तजेस जइसेन हमार पूर्वजन हुवाँ प्राण तजे रहेन। ¹⁶ ओनकइ लहास हुवाँ स सेकम लइ जावा गएन जहाँ ओनका मकबरा में दफनाइ दीन्ह गवा। इ उहइ मकबरा रहा जेका इब्राहीम हमोर क बेटहनन स कछू चान्दी दइके खरीदे रहा।

¹⁷ जब परमेस्सर क इब्राहीम क जउन बचन दिहे रहा, ओका पूरा होइ क समइ नगिचे आवा तउ मिश्र में हमरे मनइयन क गनती बहोत जिआदा होइ गइ। ¹⁸ आखिर मैं मिश्र प एक अइसे राजा क राज्य भवा जउन यूसुफ क नाहीं जानत रहा। ¹⁹ उ हमरे मनइयन क छलेस अउर उ हमरे पूर्वजन क निर्दय होइके मजबूर किहेस कि उ

पचे आपन गदेलन क बाहेर मरइ क छोरि देई जेहसे उ सबइ जिन्दा न रहि पावई।²⁰ उहइ समइ मूसा क जन्म भवा। उ बहोत सुन्नर लरिका रहा। उ तीन महीना भर आपन पिता क घर में पलत भवा बाढ़त रहा। ²¹ फिन जब ओका बाहेर छोरि दीन्ह गवा तउ फिरौन क बितिया ओका आपन बेटवा बनइके उठाइ लइ गइ। उ आपन बेटवा क नाई ओका पालेस पोसेस। ²² मूसा क पूरपूर मिश्रियन क ग्यान क सिच्छा दीन्ह गइ। ओकर सामर्थ बोलइ अउर कामे में दुइनउँ मैं रहा।

²³ जब उ चालीस बरिस क भवा तउ उ इम्राएल क बंसज, आपन भाइयन क निअरे जाइके ठान लिहस। ²⁴ तउ जब उ एक दाई लखेस कि ओनमाँ स कउनो एक क संग बुरा व्यवहार कीन्ह जात अहइ तउ उ ओका बचाएस अउर मिश्री मनई क मारिके उ दलित मनई क कसर लिहस। ²⁵ उ सोचेस कि ओकर भाई बंधु जान जइहीं कि ओनका छोड़ावइ बरे परमेस्सर ओका बइपरत अहइ। मुला उ पचे ओका नाहीं समझ पाएन। ²⁶ दुसरे दिना ओहमाँ स (ओकरे आपन मनइयन में स) जब कछू मनई झगड़त रहेन तउ उ ओनकइ निअरे पहाँचा अउर इ कहत भवा ओनमाँ बीच-बचाव करइ लाग, 'तू पचे आपुस में भाई-भाई अहा! एक दूसर क संग बुरा बर्ताव काहे करत अहा?' ²⁷ मुला उ मनई जउन आपन पड़ोसी क संग झगड़त रहा, मूसा क धकियावत भवा कहेस, 'तोहका हमार राजा अउर न्यायाधीस के बनएस?' ²⁸ जइसे काल्ह तू उ मिश्रि क हत्या कइ दिहे रहा, का तू वइसे ही मोका मारि डावा चाहत ह?' * ²⁹ मूसा जब इ सुनेस तउ उ हुवाँ स चला गवा अउर मिवदान में एक पड़ोसी क रूप में रहइ लाग। हुवाँ ओकरे दुइ बेटवा भएन। ³⁰ चालीस बरिस बीते क पाछे सिनाई पहाड़े क लगे रेगिस्तान में एक बरत भइ झाड़ी क लपट क बीच ओकरे समन्वा एक सरगदूत परगट भवा। ³¹ मूसा जब इ लखेस तउ ओका अचरज भवा। जब अउर जिआदा नगिचे स लखइ बरे उ ओकरे लगे गवा तउ ओका पर्भू क बाणी सुनाई पड़ी। ³² मई तोहरे पूर्वजन क परमेस्सर हउँ इब्राहीम, इसहाक अउर याकूब क परमेस्सर हउँ। * डर स कैपकँपात भवा मूसा कछू निहारइ क हिम्मत नाहीं कइ पावत रहा। ³³ तबहिं पर्भू ओसे कहेस, 'आपन गोड़वा क पनही उतार द्या काहेकि जउने ठउर प तू खड़ा अहा, उ पवित्तर भुइँया अहइ। ³⁴ मई मिश्र में आपन मनइयन क संग दुईसा क लखेउँ ह, परखेउँ ह। मई ओनका जोर स विलाप करत भवा सुनेउँ ह। ओनका अजाद करइ बरे नीचे उतरेउँ ह। आवा, अब मई तोहका मिश्र पठउबा। *

'तोहका ... ह' निर्ग 2:14

'मई ... हउँ' निर्ग 3:6

'आपन ... पठउब' निर्ग 3:5-10

'तोहार ... करिहीं' उत्पत्ति 15:13-14; निर्ग 3:12

³⁵“इ उहइ मूसा अहइ जेका उ पचे इ कहत भवा नकारेन, ‘तोहका राजा अउर न्यायकर्ता कउन बनाएस ह?’ इ उहइ अहइ जेका परमेस्सर उ सरगदूत क जरिये, जउन ओकरे बरे झाड़ी में परगट भवा रहा, राजा अउर मुक्ति देइवाला होइ बरे पठएस।³⁶उ ओनका मिश्र क भुइया अउर लाल सागर अउर रेगिस्ताने में चालीस बरिस ताई बहुत अचरज कारजन करत भवा अउर अद्भुत चीन्हन दखौवत भवा, बाहेर निकारि लइ आवा।³⁷इ उहइ मूसा अहइ जउन इम्राएल क लोगन स कहे रहा, ‘तोहरे भाइयन में स ही तोहरे बरे परमेस्सर एक मोरे जइसा नबी पठइ।’ * ³⁸इ उहइ अहइ जउन वीरान जगह में सभा क बीच हमार पूर्वजन अउर उ सरगदूत क साथे मौजूद रहा जउन सीनै पहाड़े प ओसे बात कियेस। मूसा परमेस्सर स जीवित बचन पाएस जउन हमका जिन्नगी देत हीं।

³⁹मुला हमार पूर्वजन ओका मानइ स इनकार कइ दिहेन। एतना ही नाही, उ पचे ओका नकार दिहेन अउर आपन मने में फिन उ पचे मिश्र लौटि गएन। ⁴⁰उ पचे हारून स कहे रहेन, ‘हमारे बरे अइसे देवतन क बनावा जउन हम पचक्क राह सोझौवइ। इ मूसा क बारे में जउन मिश्र स बाहेर निकारा गवा रहा, हम नाही जानित कि ओकरे संग का कछू घटा।’ * ⁴¹ओनही दिनन में उ पचे बछवा क तरह एक तु मूरत गढ़ेन। उ मूरत प उ सबइ बलि चढ़ाएन। अउर जेका उ पचे आपन हाथे स चढ़ाएन, ओह पइ आनन्द मनावइ लागेन। ⁴²मुला परमेस्सर ओनसे मुँहना मोड़ि लिहस। उ सबक्क अकासे क ग्रह-नछत्र क आराधना करइ बरे छोड़ दीन्ह गवा। जइसा कि नबियन क कितावे में लिखा अहइ:

‘ओ इम्राएल क परिवारे क लोगो, का तू पसु बलि अउर दूसर बलि वीरान में मोका नाही चढ़ावत रहया? चालीस बरिस तलक।

⁴³ तू पचे मोलेक क तम्बू अउर आपन देवता रिफान क तारा भी आपन संग लइ गवा रहे। ओन मूरत क भी लइ गवा रहे जेनका तू पचे आराधना करइ बरे बनाए रहया। यह बरे मई तोहका बेबिलान स भी परे पठउब।’

आमोस 5:25-27

⁴⁴‘पवित्तर क तम्बू भी उ वीरान में हमरे पूर्वजन क संग रहा। इ तम्बू उहइ नमूने प भी बनवा ग रहा जइसा कि मूसा लखे रहा अउर जइसा कि मूसा स बात करवइया बनावइ बनावइ बरे ओसे कहे रहा। ⁴⁵हमार पूर्वजन ओका पाइके तबहिं हुवाँ स आए रहेन जब यहेोस

‘तोहरे ... पठइ’ व्यवस्था 18:15

‘हमरे ... घटा’ निर्ग 32:1

क अगुअइ मैं उ पचे उ राष्ट्रन स धरती लइ लिहे रहेन जेनका हमरे पूर्वजन क समन्वा परमेस्सर निकारिके खदेरे रहा। दाऊद क समइ तलक हुवाँ उ रहा। ⁴⁶दाऊद परमेस्सर क अनुग्रह क आनन्द उठाएस। उ चाहत रहा कि उ याकूब क परमेस्सर बरे एक तु मंदिर बनवाइ सकइ। ⁴⁷मुला उ सुलेमान ही रहा जउन ओकरे बरे मंदिर बनवाएस।

⁴⁸‘कछू भी होइ परम परमेस्सर हथवा स बना भवन में निवास नाहीं करत। जइसा कि नबी कहे अहइ:

‘प्रभू कहेस, सरग मोर सिंहासन अहइ

⁴⁹ धरती गोड़वा क चौकी बनी अहइ। कउने तरह क तू बनउव्या मोर घर? अहइ कहुँ अइसी जगह, जहाँ आराम पावउँ?’

⁵⁰ का सबहिं कछू इ, मोर बनवा नाहीं रहा हाथे का?’”

यसायाह 66:1-2

⁵¹‘अरे हठीले लोग बिना खतना क मन अउर कान वाले जिददी मनइयन, तू पचे सदा पवित्तर आतिमा क खिलाफत किये ह। तू सबइ आपन पूर्वजन जइसा ही अहा! ⁵²का कउने भी अइसा नबी रहा, जेका तोहार पूर्वजन नाहीं सताएन? उ पचे तउ ओनका मारि डार रहया। जउन बहोत पहिले स ही उ धर्मी (मसीह) क अवाई क एलान कइ दिहे रहेन, जेका अब तू धोखा दइके पकड़वाइ दिहा अउर मरवाइ डाय। ⁵³तू सबइ उहइ अहा जउन सरगदूतन क जरिये दीन्ह गवा व्यवस्था क तउ पाइ लिहा मुला ओह पइ चल्या नाहीं।”

स्तिफनुस क कतल

⁵⁴जब उ सबइ इ सुनेन तउ उ पचे किरोध स पगलाइ गएन अउर स्तिफनुस पर दाँत पीसइ लागेन। ⁵⁵मुला पवित्तर आतिमा स भरा स्तिफनुस सरगे कइँती लखत रहा। उ निहारेस परमेस्सर क महिमा क अउर परमेस्सर क दाहिन कइँती खड़ा भवा ईसू क। ⁵⁶तउ उ कहेस, “लखा! मई लखत हउँ कि सरग खुला भवा अहइ अउर मनई क पूत परमेस्सर क दाहिन कइँती खड़ा बा।”

⁵⁷एह पइ उ पचे चिचिआत भवा आपन कान ढाँपि लिहेन अउर फिन उ सबइ एक संग टूट पड़ेन। ⁵⁸उ सबइ ओका घेरावत भए सहर स बाहेर लइ गएन अउर ओहँ पइ पाथर बरसावइ लागेन। तबहिं गवाह लोग आपन ओढ़ना उतारि के साउल नाउँ क एक तु जवान क गोड़े प धइ दिहेन।

⁵⁹स्तिफनुस प जब स उ पचे पाथर बरसाउब सुरु कियेन, उ इ कहत भवा पराथना करत रहा, “पभू ईसू, मोर आतिमा क ग्रहण करा।” ⁶⁰फिन उ घुटना क बल भहराइ गवाँ अउर ऊँची अवाजे में चिल्लान, “पभू, इ

पाप क ओनकइ खिलाफ जिन ल्या!" एँतना कहिके उ हमेसा क नींद में सोइ गवा।

8 साउल स्तिफनुस क कतल क ठीक बताएस। उहइ दिना स यरूसलेम क कलीसिया प घोर अत्याचार होब सुरु भवा। प्रेरितन क तजिके उ पते सबहिं मनइयन यहूदिया अउर सामरिया क गाउँ में तितराइ-बितराइके फैलि गएन।

बिसवासियन प अत्याचार

2-3 कछू भगत लोग स्तिफनुस क गाड़ दिहन अउर ओकरे बरे बहोत दुःख मनाएन। साऊल कलीसिया क बरबाद करब सुरु कइ दिहेस। उ घर-घर जाइके स्त्रियन अउर पुरुसन क घेरावत भवा जेल में धाँधइ लाग।
4 ओहर तितराए बितराए मनई हर ठउरे प जाइके नीक खबर क सुसमाचार देइ लागेन।

सामरिया में फिलिप्पुस क उपदेस

5 फिलिप्पुस सामरिया नगर क चला गवा अउर हुवाँ मनइयन में मसीह क बारे में प्रचार करइ लाग। 6 फिलिप्पुस क मनइयन जब सुनेन अउर जउन अद्भुत चीन्हन क उ परगट करत रहा, लखेस, तउ जउन बातन क उ बतावा करत रहा, ओन पइ उ पचे एक चित्त लाइके धियान दिहेन। 7 बहोत स मनइयन में स, जेनमाँ दुस्त आतिमा समाई रहिन, उ सबई ऊँच अवाजे में चिल्लात भइ बाहेर निकरि आइन। बहोत स सुखाड़ी क बेरिमिया अउर अंग भंग नीक होत रहेन। 8 उ सहर में खुसी छाइ रही।

9 हुवाँइ समौन नाउँ क मनई रहत रहा। फिलिप्पुस क अवाई स पहिले उ बेर समइ स उ सहर में जादू टोटका करत रहा। अउर सामरिया क मनइयन क अचरज में डाइ देत रहा। उ महा पुरुख होइ क दावा करत रहा। 10 नान्ह स लइके बड़वारे तलक सबहिं मनइयन ओकरे बात प धियान देतेन अउर कहत रहतेन, "इ मिला परमेस्सर क उहइ सक्ती बा जउन 'महान सक्ती' कहवावत ह!" 11 काहेकि उ बेर दिनन स ओन पचन्क आपन चमत्कारन क घनचक्कर में नाइ देत रहा, यह बरे उ पचे ओह पइ धियान देत रहेन। 12 मुला उ पचे जब फिलिप्पुस प प्रतिमानेन काहेकि उ ओनका परमेस्सर क राज्य क सुसमाचार अउर ईसू मसीह क नाउँ बाँचत रहा, तउ उ पचे स्त्रियन अउर पुरुसन दुइनउँ ही बपतिस्मा लेइ लागेन। 13 अउर खुद समौन ही ओन पइ पतियाइ लाग। अउर बपतिस्मा लेइ क पाछे फिलिप्पुस क संग उ बड़े निचके स बसइ लाग। उ अद्भुत कारजन अउर अद्भुत चीन्हन क जब उ लखेस, तब दंग रहि गवा।

14 जब यरूसलेम में प्रेरितन इ सुनेन कि सामरिया क मनइयन परमेस्सर क बचन क मान लिहे अहई तउ उ पचे पतरस अउर यूहन्ना क ओनके लगे पठएन। 15 जबहिं

उ पचे आएन, तब उ दुइनउँ सामरियन बरे पराथना किहेन कि ओनका पवित्तर आतिमा मिलि जाइ। 16 काहेकि अबहुँ तलक पवित्तर आतिमा कउनो प नाहीं ओतरी, ओनका फिन पभू ईसू क नाउँ प बपतिस्मा हि दीन्ह गवा रहा। 17 तउ पतरस अउर यूहन्ना ओन पइ आपन हाथ धरेस अउर ओनका पवित्तर आतिमा मिलि गइ।

18 जब समौन लखेस कि प्रेरितन क हाथ धरे भइ स पवित्तर आतिमा मिलि गइ तउ ओनके समन्वा धन धरत भवा कहेस, 19 "इ सक्ती मोका दइ द्या काहेकि जेह पइ मई हाथ धरउँ, ओका पवित्तर आतिमा मिलि जाइ।"

20 पतरस ओसे कहेस, "तोहार अउर तोहरे धने क सतियानास होइ! काहेकि तू इ बिचार्या ह कि तू धने स परमेस्सर क बरदान क मौल लइ सकत ह। 21 इ बारे में तोहार हमार मेल नाहीं खात काहेकि परमेस्सर क समन्वा तोहार हिरदय सही नाहीं बा। 22 यह बरे आपन इ दुस्तता बरे मनफिराव अउर आपन कुकरम प पछतावा करा अउर पभू स पराथना करा। इ होइ सकत ह कि इ बिचार बरे तोहका छमा कइ दीन्ह जाइ जउन तोहरे मने में रहा। 23 मई लखत हउँ कि तू परिहँसे स भरा अहा अउर पाप क पंजा में फँसा बाट्या।"

24 यह पइ समौन जवाब दिहेस, "तू पभू स मोरे बरे पराथना करा काहेकि तू जउन कहया ह, ओहमाँ स कउनो भी बात मोह प न आइ जाइ।"

25 फिन प्रेरितन साच्छी दइके अउर पभू क बचन सुनाइके, राहे में टेरे क सामरी गाँवन में सुसमाचार क उपदेस देत भएन यरूसलेम लौटि गएन।

इथियोपिया स आवा भएन मनइयन क फिलिप्पुस क उपदेस

26 पभू क एक सरगदूत फिलिप्पुस क कहत भवा बताएस, "तइयार होइ जा, अउर सरक प दक्खिन कइँती जा, जउन सरक यरूसलेम स गाजा क जात ह। इ एक निर्जन राह अहइ।" 27 तउ उ तइयार भवा अउर निकरि गवा। सरक पइ इथियोपिया क मन्नाई क लखेस। उ नामर्द रहा। इथियोपियन क रानी कंदाके क एक अधिकारी रहा जउन ओकरे सारा खजाना क खजांची रहा। उ आराधना करइ यरूसलेम गवा रहा। 28 लउटत भवा उ आपन रथे में बैठिके नबी यसायाह क पोथी बाँचत रहा। 29 तबहिं उ आतिमा फिलिप्पुस स कहेस, "उ रथे क निचके जा अउर हुवाँइ ठहर जा।" 30 फिलिप्पुस जब उ रथे क निचके दौड़िके गवा तउ उ ओका यसायाह क पढ़त भवा लखेस। तउ उ कहेस, "का तू जेका बाँचत अहा, ओका बूझत भी बाट्या?"

31 उ कहेस, "मई भला कहाँ तलक समुझ बूझ सकत हउँ? जब तलक कउनो मोका एकर अरथ न बतावइ?"

फिन उ फिलिप्पुस क रथे प आपन संग बइठाएस।
³²पवित्तर सास्तर क जउन हींसा क उ बाँचत रहा, उ रहा:

“उ भेंड क नाई जप कइ दीन्ह बरे लइ जावा जात रहा उ ओ मेम्ना क नाई चुप रहा जउन आपन उन क कतरइवाला क समन्वा चुप रहत ह। ठीक वइसे ही उ आपन मुँह खोलेस नाहीं।

³³ अब अइसी दीन दसा मैं ओका निआव स दुरिआवा गवा।

ओकरी पीढ़ी क कबहँ गाथा कउन गाई? काहेकि धरती स तउओकर जिन्गी लइ लीन्ह गाइ।”

यसायाह 53:7-8

³⁴उ अधिकारी फिलिप्पुस स कहेस, “अनुग्रह कइके बतावा कि इ नबी केकर बारे मैं कहत बाटइ? इ आपन बारे मैं या कउनो अउर क बारे मैं?” ³⁵फिन फिलिप्पुस कहब सुरु किहेस अउर इ सास्तर स लइके ईसू क सुसमाचार तलक सब कछू ओका कहिके सुनाएस।

³⁶रस्ता मैं आगे बढ़त भए उ सबइ पानी क निचके पहुँचेन। फिन उ अधिकारी कहेस, “लखा! हिआँ पानी बाटइ। अब मोका बपतिस्मा लेइ मैं का बियाधा अहइ?”

³⁷* ³⁸तब उ रथे क रोकइ बरे आज्ञा दिहेस। फिन फिलिप्पुस अउर उ अधिकारी दुइनउँ ही पानी मैं उतरि गएन अउर फिलिप्पुस ओका बपतिस्मा दिहेस। ³⁹अउर फिन जब उ पचे पानी स बाहेर निकसेन तउ फिलिप्पुस क पभू क आत्मा छीन लइ गवा। अउर उ अधिकारी फिन ओका कबहुँ नाहीं लखेस। ओहर उ अधिकारी खुसी मनावत आपन राहे प चला गवा। ⁴⁰ओह कइती फिलिप्पुस खुद क असदोद मैं पाएस अउर कैसरिया पहोंच तलक उ सब नगरन मैं सुसमाचार प्रचार करत रहा।

साउल क हिरव्य बदलब

9 साउल अबहुँ पभू क चेलन क मारि डावइ क धमकी देत रहा। उ महायाजक क लगे गवा ²अउर उ दमिस्क क आराधनालय क नाउँ इ मंसा क चिट्ठी लिहेस कि जेहसे ओका हुवाँ अगर कउनो इ पंथ क चेलन मिलइ, फिन चाहे उ स्त्रियन होइ, चाहे पुरुसन, तउ उ ओका बंदी बनाइ सकइ अउर फिन वापिस यरूसलेम लइ आवइ।

पद 37 ‘प्रेरितन क काम’ की कछू बाद की प्रतिवन मैं पद 37 मिलत ह: “फिलिप्पुस जवाब दिहेस, ‘जदि तू आपन पूरंपूर हिरव्य स बिसवास करत ह तउ लइ सकत ह।’ अधिकारी कहेस, ‘हाँ! मई पतियात हउँ कि ईसू मसीह परमेस्सर क पूत अहइ।’”

³तउ जब चलत चलत उ दमिस्क क निचके पहोंचा, तउ एकाएक ओकरे चारिहुँ कइती अकासे स रोसनी कउँधी ⁴अउर उ भुइया प जाइ गिरा। उ एक अवाज अनकेस जउन ओसे कहत रही, “साउल, अरे ओ साउल! तू मोका काहे सतावत अहा?”

⁵साउल कहेस, “पभू, तू कउन अहा?”

उ कहेस, “मई ईसू अहउँ जेका तू सतावत बाट्या। ⁶मुला अब तू खड़ा हवा अउर नगर मैं जा। हुवाँ तोहका बताइ दीन्ह जाइ कि तोहका का करइ चाही।”

⁷जउन मनई ओकरे संग जात्रा करत रहेन, उ पचे चुपचाप रहि गएन। उ पचे अवाज तउ अनकेन मुला कउनो क लखेन नाहीं। ⁸फिन साउल भुइया पइ स खड़ा भवा। मुला जब उ आपन आँखी खोलेस तउ उ कछू भी नाहीं निहारि सका। यह बरे उ पचे ओकर हाथ धइके दमिस्क लइ गएन। ⁹तीन दिना तलक उ न तउ कछू निहारि पाएस, अउर न ही कछू खाएस या पीएस।

¹⁰दमिस्क मैं हनन्याह नाउँ क ईसू क एक चेला रहा। पभू दर्सन दइके ओसे कहेस, “हनन्याह!”

तउ उ बोला, “पभू मई इ हउँ।”

¹¹पभू ओसे कहेस, “खड़ा हवा अउर उ गली मैं जेका सोइ कहवावइ वाली गली कहा जात ह। अउर हुवाँ यहूदी क घरे मैं जाइके तारसी क बसइया साउल नाउँ क एक मनई क बारे मैं पूछताछ करा काहेकि उ पराथना करत बाटइ। ¹²उ एक दर्सन मैं लखेस ह कि हनन्याह नाउँ क एक मनई घरे मैं आइके ओह प हाथ रखेस ह ताकि उ फिन लखि सकइ।”

¹³हनन्याह जवाब दिहेस, “पभू, मई इ मनई क बारे मैं बहोतन स सुना ह। यरूसलेम मैं तोहरे संत लोगन क संग इ जउन बुरा काम किहेस ह, उ सब मई सुनेउँ ह। ¹⁴अउर हियाँ भी इ मुख्ययाजक स तोहरे नाउँ मैं सबहिँ बिसवासी मनइयन क बंदी बनावइ क हुकुम लइ आवा ह।”

¹⁵मुला पभू ओसे कहेस, “तू जा काहेकि इ मनई क विधर्मी मनइयन, राजा लोगन अउर इज्राएल क मनइयन क समन्वा मोर नाउँ लेइ बरे, एक जरिया क रूप मैं मई चुनेउँ ह। ¹⁶मई खुद ओका उ सब कछू बताउब, जउन ओका मोरे नाउँ बरे सहइ क होइ।”

¹⁷तउ हनन्याह चला गवा अउर उ घरे क भितरे पहोंचा अउर साउल प आपन हाथ रखि दिहेस अउर कहेस, “भाइ साउल! पभू ईसू मोका पठएस ह जउन तोहरे राह मैं तोहरे समन्वा परगट भ रहा जेहसे तू फिन स लखि सका अउर पवित्तर आत्मा स भरि उठा।”

¹⁸फिन तुरतहिँ बोकला जइसी कउनो चीज ओकरी आँखिन स टेघरी अउर ओका फिन देखौँ देइ लाग। उ खड़ा भवा अउर उ बपतिस्मा लिहेस। ¹⁹ओकरे पाछे फिन तनिक खइया खाए क बाद आपन ताकत पाइ गवा।

साउल क दमिस्क में प्रचार काम

उ दमिस्क में चलन क संग कछू समइ ठहरा।²⁰फिन इ सोझइ यहूदी आराधनालय में पहुँचा अउर ईसू क प्रचार करइ लाग। उ कहसे, “इ ईसू परमेस्सर क पूत अहइ।”²¹जउन कउनो भी ओका सुनेन, चकित रहि गएन अउर बोलेन, “का इ उहइ नाहीं अहइ, जउन यरूसलेम में ईसू क नाउँ में बिसवास करइया मनइयन क नास करइ क जतन नाहीं किहेस। अउर का इ ओनका धरवावइ अउर मुख्ययाजक क समन्वा लइ जाइ नाहीं आवा रहा?”²²मुला साउल जिआदा स जिआदा सक्तीसाली होत गवा अउर दमिस्क में बसइया यहूदियन क इ सिद्ध करत भवा कि इ ईसू ही मसीह अहइ, हरावइ लाग।

साउल क यहूदियन स बच निकरब

²³बहोत दिन बीति जाए क पाछे यहूदियन ओका मारि डावइ क षडयन्त्र किहेन।²⁴मुला ओनकइ चाल क पता साउल क होइ गवा। उ पचे सहर क दुआरन प घात लगाए रहत रहेन जेहसे ओका मारि डावइ।²⁵मुला ओकर चलन ओका राति में उठाइ लइ गएन अउर झउआ में बइठाइके सहर क चहरदीवार के छेदे स ओका खाले उतारि दिहेन।

यरूसलेम में साउल क पहुँचब

²⁶फिन जब उ यरूसलेम पहुँचा तउ उ चलन क संग मिलइ क जतन करइ लाग। मुला उ पचे तउ ओसे ससान रहेन। ओनका इ बिसवास नाहीं रहा कि उ भी ईसू का एक चलन अहइ।²⁷मुला बरनाबास ओका आपन संग प्रेरितन क लगे लइ गवा अउर उ ओनका बताएस कि साउल पभू क राहे में कउने तरह लखेस अउर पभू ओसे कइसे बतियान ह। अउर दमिस्क में कउने तरह उ बेडर होइके ईसू क नाउँ क प्रचार करइ लाग।

²⁸फिन साउल ओनके संग यरूसलेम में अजादी स आवइ जाइ लाग। उ बेडर होइके पभू क नाउँ क प्रबचन करत रहा।²⁹उ यूनानी भाखा क बोलवइया क साथ तहत्युक अउर धरम चर्चा करत रहा मुला उ सबइ तउ ओका मारि डावा चाहत रहेन।³⁰मुला जब भाई लोगन्क इ बात क पता लाग तउ उ पचे ओका कैसरिया लइ गएन अउर फुव ओका तरसुस पहुँचाइ दिहेन।

³¹इ तरह समूचइ यहूदिया, गलील अउर सामरिया क कलीसिया क उ समइ सांति स बीति गवा। उ कलीसिया अउर जिआदा सक्तीसाली होइ लाग। काहेकि उ पभू स डेराइके आपन जिन्गी काटत रही, अउर पवित्तर आत्मा ओका अउर जिआदा हिम्मत देत रही तउ ओकर गनती बाढ़इ लाग।

³²फिन उ समूचइ पहुँचा में टहरत घूमत पतरस लुदा क संत लोगन स भेटइ पहुँचा।³³हुवाँ ओका एनियास

नाउँ क एक मनई मिला जउन आठ बरिस स बिछउना प ओलरा रहा। ओका लकुआ मारि गवा रहा।³⁴पतरस ओसे कहेस, “एनियास, ईसू मसीह तोहका चंगा करत ह। खड़ा हवा अउर आपन बिछउना सोझ करा!” तउ उ तुरंत खड़ा होइ गवा।³⁵फिन लूदा अउर सारोन में बसइया सब मनइयन ओका लखेन अउर उ पचे पभू कइँती घूमि गएन।

पतरस याफा में

³⁶याफा में तबीता नाउँ क एक चेली रहत रही (जेकर यूनानी अनुवाद अहइ दोरकास अथ अहइ “हिरनी”)। हमेसा नीक नीक काम करत अउर गरीबन क दान देत।³⁷ओनही दिनाँ उ बीमार भइ अउर मरि गइ। उ पचे ओकरे लहासे क नहवाइके सीढ़ी क ऊपर खोली में धइ दिहेन।³⁸लुदा याफा क लगे रहा, तउ चलन जबहि इ सुनेन कि पतरस लुदा में बाटइ तउ उ पचे ओकरे लगे दुइ मनई पठएन कि उ सबइ ओसे बिनती करई, “अनुग्रह कइके हाली स हाली हमरे लगे आइ जा!”³⁹तउ पतरस तइयार होइके ओनके संग चला गवा। जब पतरस हुवाँ पहुँचा तउ उ पचे ओका सीढ़ी क ऊपर खोली में लइ गएन। हुवाँ सबहि विधवावन छाती पीटिके रोवत भइन अउर उ सबइ कुर्ती अउर ओढ़ना क, जेनका दोरकास बनाए रहा; जबहि उ पचे ओकरे संग रहिन देखोवत भइन खड़ी होइ गइन।⁴⁰पतरस हर कउनो क बाहेर पठएस अउर घुटना क बल निहुरिके ओसे पराथना किहेस। फिन लहास कइँती घूमत भवा बोला, “तबीता-खड़ी होइजा।” उ आपन ऑखिन उघारेस अउर पतरस क लखतन भइ उठिके बइठी।⁴¹ओका आपन हाथ दइके पतरस खड़ा किहेस अउर फिन संत अउर विधवावन क बोलवाइ के ओनका ओका जिन्दा सौंप दिहेस।⁴²समूचइ याफा में हर कउनो क इ बात क पता लग गवा अउर बहोत स मनइयन पभू में बिसवास किहेन।⁴³फिन याफा में समौन नाउँ क एक चमार क हियाँ पतरस बहोत दिनाँ तक रुका रहा।

पतरस अउर कुरनेलियुस

10 कुरनेलियुस नाउँ क एक मनई कैसरिया में रहा। उ फउज क उ दले क नायक रहा जेका इतालवी कहा जात रहा।²उ परमेस्सर स डेरेंडवाला भगत रहा अउर वइसा ही ओकर परिवार भी रहा। उ गरीबन क मदद करइ बरे दिल खोलिके दान देत रहा अउर हमेसा ही परमेस्सर क पराथना करत रहत रहा।³दिन क नवे* पहर क नगिचे उ एक दर्शन में साफ साफ लखेस कि परमेस्सर क एक सरगदूत ओकरे लगे आवा ह अउर ओसे कहत ह, “कुरनेलियुस।”

नवे दिन क तीन बजे।

⁴त कुरनेलियुस डेरात भवा सरगदूत कइँती लखत भवा बोला, "हे परभूँ इ का अहइ?"

सरगदूत ओसे कहेस, "तोहार पराथना अउर गरीब गुरबा क दिया भवा तोहार दान एक यादगार क रूप में तोहार याद दियावइ बरे परमेस्सर क लगे पहेंचा अहइँ।⁵तउ कछु मनइयन क याफा पठवा अउर समौन नाउँ क एक मनई क, जउन पतरस कहा जात ह, हिआँ बोलाइँ ल्या।⁶उ समौन नाउँ क एक चमार क हिआँ रहत ह। ओकर घर समुदर क किनारे बा।"⁷उ सरगदूत जउन ओसे बात करत रहा, जब चला गवा तउ उ आपन दुइ नउकरन अउर आपन खुद क सहायक लोगन में स एक भवत सिपाही क बोलाएँ⁸अउर जउन कछु भवा रहा, ओनका सब कछु बताइके याफा पठइ दिहेस।

⁹अगले दिन जब उ पचे चलतइ चलत सहर क निक्के पहेंचइ क ही रहेन, पतरस दुपहरिया में पराथना करइ छत्ते प चढ़ा।¹⁰ओका भूख लाग, तउ उ कछु खाइ चाहत रहा। उ पचे जब खइयाके तइयार करत रहेन तउ ओकर समाधि लग गइ।¹¹अउर उ लखेस कि अकास खुलि गवा अहइ अउर एक बड़वार चदर जइसी चीज तरखाले उतरत बा। ओका चारिहुँ कइँती स धइके धरती प उतारा जात बा।¹²ओह प हर तरह क पसु, धरती प रेंगइ वाला जीव-जंतु अउर अकासे क पंछी रहेन।¹³फिन एक अवाज ओसे कहेस, "पतरस उठ, मार अउर खा।"

¹⁴पतरस कहेस, "परभूँ, फुरइ तउ नाहीं, काहेकि मइँ कबहुँ भी अपवित्तर या असुद्ध चीज क नाहीं खाएँ ह।"¹⁵एँह पइ ओनका दूसरी बार फिन अकासबाणी सुनाइ दिहेस, "कउनो भी चीज क जेका परमेस्सर पवित्तर बनाए अहइ, ओनका तू 'अपवित्तर' न कहा!"¹⁶तीन दाई अइसा ही भवा अउर उ पूरी वस्तु फिन अकास में वापिस उठाइ लीन्ह गइ।

¹⁷पतरस जउने दर्सन जेका लखे रहा क अरथ क बारे में दुबिधा करत रहा, कुरनेलियुस क पठए भए लोग दुआरे प ठाइ भवा पूछत रहेन, "समौन क घर कहाँ बा?"¹⁸उ सबइ बाहिर गोहरावत भए पूछेन, "का पतरस कहा जाइवाला समौन मेहमान क रूप में हिँई रुका अहइ?"

¹⁹पतरस अबहिँ उ दर्सन क बारे में सोचत ही रहा कि आतिमा ओसे कहेस, "सुना! तोहका तीन मनई तोहका हेरत अहइँ।²⁰तउ खड़ा हवा, अउर तरखाले उतरिके बेझिझके चला जा, काहेकि ओनका मइँ ही पठएँ ह।"²¹इ तरह पतरस तरखाले उतरि आवा अउर ओन मनइयन स बोला, "मइँ उहइ अहउँ, जेका तू हेरत बाट्या। तू काहे आया ह?"

²²उ पचे बोलेन, "हम सबनक फऊजीनायक कुरनेलियुस पठएँस ह। उ अच्छा मनई अहइ अउर सच्चे परमेस्सर क आराधना करत ह। यहूदी मनइयन में

ओकर बहोत सम्मान अहइ। पवित्तर सरगदूत ओसे तोहका आपन घरे नेउतइ बरे कहे अहइ अउर जउन कछु कहइ ओका सुनइ बरे कहे अहइ।"²³एँह पइ पतरस ओका भितरे बोलाइ लिहस अउर ठहरइ क जगह दिहेस।

फिन दूसर दिन तइयार होइके उ ओनके संग चला गवा। अउर याफा क निवासी कछु अउर बंधु भी ओकरे संग होइ गएन।²⁴दूसर दिन उ कैसरिया पहेंच गवा। हुवाँ आपन खास मित्र अउर नातेदार क बोलाइके कुरनेलियुस ओनका जोहत रहा।

²⁵पतरस अब भीतर पहेंचा तउ कुरनेलियुस स ओसे भेंटइ आवा। कुरनेलियुस श्रद्धा स ओकरे गोड़वा प गिरत भवा ओका प्रणाम किहेस।²⁶मुला ओका उठावत भवा पतरस बोला, "ठाइ हवा! मइँ तउ खुद सिरिफ एक मनई हउँ।"

²⁷फिन ओकरे संग बात करत करत उ भितरे चला गवा। अउर हुवाँ उ बहोत स मनइयन क बटोरेस।

²⁸उ ओनसे कहेस, "तू सबइ जानत ह कि एक यहूदी बरे गैर यहूदी जाति क मनई क संग कउनो सम्बंध रखब या ओकरे हियाँ जाब विधान क खिलाफ अहइ मुला तउ भी परमेस्सर मोका देखाएँस ह कि मइँ कउनो भी मनई क 'असुद्ध' या 'अपवित्तर' न कहउँ।²⁹यह बरे मोका जब बोलावा गवा तउ मइँ बिना कउनो एतराज क आइ गएँ। यह बरे मइँ तोहसे पूछत हउँ कि तू मोका काहे बरे बोलाया ह।"

³⁰एँह पइ कुरेलियुस कहेस, "चार दिना पहिले इहइ समइ दिन क नवें पहर (तीन बजे) मइँ आपन घरे में पराथना करत रहेउँ। एकाएक चमचमात ओढ़ना में एक मनई मोरे समन्वा आइके खड़ा भवा।³¹अउर बोला, 'कुरनेलियुस! तोहार बिनती सुनि लीन्ह गइ अहइ अउर गरीब गुरबन क दीन्ह भवा तोहार दान परमेस्सर क समन्वा याद कीन्ह ग अहइँ।³²यह बरे याफा पठइके पतरस कहावावइवाला समौन क बोलवाइके पठवा। उ समुदर क किनारे चमार समौन क घरे रुका बा।'³³यह बरे मइँ तुरंतहि तोहका बोलवावइ पठवा ह अउर हिआँ आवइ क कृपा कइके बहोत नीक किहा ह तउ अब परभूँ जउन कछु आज्ञा तोहका दिए अहइँ, उ सब कछु सुनइ बरे हम पचे हिआँ परमेस्सर क अगवा हाजिर अही।"

कुरनेलियुस क घरे पतरस क प्रबचन

³⁴फिन पतरस बोतइ लाग अउर कहेस, "फुरइ अब मइँ समुझ गवा हउँ कि परमेस्सर कउनो भेद-भाव नाहीं राखत³⁵बल्कि हर जाति क कउनो मनई जउन ओसे डेरात ह अउर नीक काम करत ह, उ ओका अपनावत ह।³⁶इहइ अहइ उ संदेसा जेका उ ईसू मसीह स साँति क सुसमाचार क उपदेस देत भवा इम्राएल क मनइयन क दिहे रहा। उ सबहिँ का परभूँ अहइ।³⁷तू पचे

उ बड़की घटना क जानत ह, जउन समूचइ यहूदिया में भइ रही। गलील स सुरु होइके यहून्ना क जरिए बपतिस्मा दीन्ह जाए क पाछे जेकर प्रचार कीन्ह गवा रहा।³⁸ तू सबइ नासरी ईसू क बारे में जानत ह कि परमेस्सर पवित्तर आतिमा स अउर सकती स ओकर अभिसेक कइसे किहे रहा अउर उत्तिम कारज करत भवा अउर ओन सब क जउन सइतान क बस में रहेन, नीक करत भवा चारिहुँ कइँती उ कइसे घूमत रहा। काहेकि परमेस्सर ओकरे संग रहा।³⁹ अउर हम पचे ओन सब बातन क साच्छी अही जेनका उ यहूदियन क पहँटा अउर यरूस्लेम में किहे रहा। उ पचे ओका ही एक ठु लकड़ी के सलीब प टाँगिके मारि डालेन।⁴⁰ मुला परमेस्सर तीसरे दिना ओका फिन स जिन्दा कइ दिहेस अउर ओका परगट कराएल।⁴¹ सब मनइयन क समन्वा नाहीं मुला ओन साच्छियन क अगवा जउन परमेस्सर क हीला स पहिले ही चुन लीन्ह गएन। अरथ अहइ हमरे समन्वा जउन मर भएन में स जी जाए क पाछे ओकरे संग खाएन अउर पीएन।⁴² उहइ हमका हुकुम दिहे अहइ कि हम लोगन क उपदेस देई अउर सिद्ध करई कि इ उहइ, अहइ जउन परमेस्सर क हीला स जिन्दा भएन अउर मरे भएन में स निआव करइवाला मुकरर कीन्ह गवा अहइ।⁴³ सब नबी लोग ओकरे बारे में साच्छी दिहे अहई कि ओहमा बिसवास करइवाला हर मनई ओकरे नाउँ क हीला स पापन्क छमा पावत ह।”

गैर यहूदियन प पवित्तर आतिमा क उतरब

⁴⁴पतरस अर्बहि इ बातन क करत ही रहा कि ओन सब प पवित्तर आतिमा उ तरि आइ जउन सुसमाचार सुने रहेन।⁴⁵ काहेकि पवित्तर आतिमा क बरदान गैर यहूदी प उडेरा जात रहा, तउ पतरस क संग आए भए यहूदी अचरज में पड़ि गएन।⁴⁶ उ पचे किसिम किसिम क भाखा बोलत रहेन अउर परमेस्सर क स्तुति करत भए अनकत रहेन। तब पतरस बोला,⁴⁷ “का कउनो इ मनइयन क बपतिस्मा देइ बरे, जल आसानी स देइ बरे मना कइ सकत ह? ऐंका भी वइसे ही पवित्तर आतिमा मिलि गवा ह, जइसेन हम पचन का।”⁴⁸ इ तरह उ ईसू मसीह क नाउँ में ओनका बपतिस्मा देइ क हुकुम दिहेस। फिन पतरस स उ पचे पराथना किहेन कि कछू दिन ओनकइ संग ठहरइ।

पतरस क यरूस्लेम लौटब

11 समूचइ यहूदिया में भाइयन अउर प्रेरितन सुनेन कि परमेस्सर क बचन गैर यहूदी भी मान लिहे अहई। तउ जब पतरस यरूस्लेम पहुँचा तउ उ पचे जउन खतना क चाहत रहेन, ओकर नुकतचीनी किहेन।³ उ सबइ कहेन, “तू खतना क बिना मनइयन क घरे गवा अहा अउर तू ओनकइ संग खइया क खयाय ह।”

⁴एह पइ पतरस सच जउन भवा रहा, ओका सुनावइ समुझावइ लाग।⁵ “मई याफा सहर में पराथना करत भवा समाधि में एक दर्सन कीन्ह। मई निहारेउँ कि एक बड़की चद्दर जइसी कउनो चीज खाले उतरत बा, ओका चारिहुँ कोना स धइके अकासे स धरती प उतारा जात अहइ। फिन उ उतरिके मोरे लगे आइ गइ।⁶ मई ओका धियान स लखेउँ कि ओहमाँ धरती क चौपाया जीव-जंतु, जंगली पसु रेंगइ वाला जीव अउर अकासे क पंछी रहेन।⁷ फिन मई एक अवाज सुनेउँ, जउन मोसे कहत रही, ‘पतरस उठा, मारा अउर खाइ ल्या।’⁸ मुला मई कहेउँ, ‘पभू, निहचय रूप स तउ नाहीं, काहेकि मई कबहुँ भी कउनो तुच्छ या समइ क अनुसार कउनो बे पवित्तर अहार क नाहीं खाएउँ ह।’⁹ अकास स दूसर दाई उ अवाज फिन कहेस, ‘जेका परमेस्सर पवित्तर बनएस ह, ओका तू अपवित्तर जिन समुझा।’¹⁰ तीन दाई अइसा ही भवा। फिन उ सब अकास में वापिस उठाइ लीन्ह गवा।¹¹ उहइ समइ जहाँ मई ठहरा रहेउँ, उ घरे में तीन मनई आइ गएन। उ पचे मोरे लगे कैसरिया स पठवा ग रहेन।¹² आतिमा मोका ओनकइ संग बेझिझके चला जाइ बरे कहेस। इ छः भाई भी मोरे संग गएन। अउर हम पचे उ मनई क घरे में चला गए।¹³ उ हमका बताएस कि एक सरगदूत क आपन घरे में ठाइ उ कइसे लखेस। जउन कहत रहा, ‘याफा पठइके पतरस कहावावइवाला समौन क बोलवाइ ल्या।¹⁴ उ तोहका बचन सुनाई जेहेसे तोहार परिवार क उद्धार होइ।’¹⁵ जब मई प्रबचन सुरु कीन्ह तब पवित्तर आतिमा ओन पइ उतरि आइ। ठीक वइसेन जइसे सुरु में हम पइ उतरी रही।¹⁶ फिन मोका पभू क कहा भवा बचन याद होइ गवा, ‘यहून्ना पानी स बपतिस्मा देत रहा मुला तोहका पवित्तर आतिमा स बपतिस्मा दीन्ह जाइ।’¹⁷ इ तरह जदि परमेस्सर ओनका ही उहइ बरदान दिहेस जेका उ जब हम पचे पभू ईसू मसीह में बिसवास कीन्ह, तबइ हमका दिहे रहा, तउ खिलाफत करइवाला मई कउन होत हउँ?”

¹⁸बिसवासी मनइयन जब इ मुनेन तउ उ पचे प्रस्न करब बंद कइ दिहेन। उ पचे परमेस्सर क महिमा करत भए कहइ लागेन, “अच्छा, तउ परमेस्सर गैर यहूदी मनइयन तलक क मनफिराव वइ बरे उ औसर दिहेस ह, जउन जिन्नगी कइँती लइ जात ह।”

अन्ताकिया में सुसमाचार क अवाई

¹⁹ उ पचे जउन स्तिफनुस क समइ में दीन्ह जात सबइ यातना क कारण तितराइ बितराइ ग रहेन, दूर-दूर तलक फीनीक साइप्रस अउर अन्ताकिया तलक चला ग रहेन। इ पचे यहूदियन क तजिके कउनो अउर क सुसमाचार नाहीं सुनावत रहेन।²⁰ एनही बिसवासी मनइयन में स कछू साइप्रस क अउर कुरेनी क रहेन। तउ जब उ पचे अन्ताकिया आएन तउ यूनानियन क भी प्रबचन देत

भए पर्भू ईसू क सुसमाचार सुनावइ लागेन।²¹ पर्भू क सक्ती ओनकइ संग रही। तउ एक बड़ा मनइयन क मजमा बिसवास धइके पर्भू कइँती मुड़ि गवा।

²²एकर खबर जब यरूसलेम में कलीसिया क काने तलक पहुँची तउ उ पचे बरनाबास क अन्ताकिया जाइके पठएन।²³ जब बरनाबास हुँवा पहाँचिके परमेस्सर क अनुग्रह क सकारथ होत लखेस तउ उ बहोत खुस भवा अउर उ ओन सबहिं क पर्भू बरे भक्ति भरा हिरदय स बिसवासी बनइ बरे हिम्मत देवोएस।²⁴ काहेकि उ पवित्तर आतिमा अउर बिसवास स भरा भवा एक भरपूर उत्तिम मनई रहा। फिन पर्भू क संग एक बड़वार मनइयन क मजमा जुड़ गवा।

²⁵बरनाबास साउल क हेरइ तरसुस क चला गवा।²⁶ फिन उ ओका हेरिके अन्ताकिया लइ आवा। पूरे साल भइ उ पचे कलीसिया स मिलत जुलत अउर बड़का मनइयन क मजमा क उपदेस देत रहेन। अन्ताकिया में सबन त पहिले ऐंनही चलन क “मसीही” कहा गवा।

²⁷इहइ समइ यरूसलेम स कछू नबी अन्ताकिया आएन।²⁸ ओनमाँ स अगबुस नाउँ क एक नबी खड़ा होइके पवित्तर आतिमा क जरिया इ भविस्सबाणी किहेस कि सारी दुनिया में एक खउफनाक अकाल पड़ी (क्लोदियुस क समइ इ अकाल पड़ा रहा)।²⁹ तब हर चलन आपन ताकत देखिके यहूदिया क बसइयन बंधु क मदद बरे कछू पठवइ क ठान लिहेन।³⁰ तउ उ पचे अइसा ही किहेन अउर उ पचे बरनाबास अउर साउल क हाथ स यहूदिया में आपन बुजुर्गन क लगे उपहार पठएन।

हेरोदेस क कलीसिया प जुल्म

12 उहइ समइया क लगभग राजा हेरोदेस कलीसिया क कछू निअंबर क सताउब सुरु किहेस।¹ उ यहून्ना क भाई याकूब क तरवार स कतल कराइ दिहेस।² उ जब इ लखेस कि इ बात स यहूदी खुस होत हीं तउ उ पतरस क भी गिरफतार करइ बरे सोचेस (इ बे खमीरे क रोटी क उत्सव क दिनन क बात अहइ)।³ हेरोदेस पतरस क धइके जेलि में धाँध दिहेस। ओका चार चार सिपाहियन क कतार क पहरा लगाइ दीन्ह गवा। मतलब इ रहा कि ओह प मुकदमा चलावइ बरे फसह क त्यूहार पाछे ओका मनइयन क समन्वा बाहेर लइ आवा जाइ।⁴ तउ पतरस क जेल में रोक दीन्ह गवा। ओहर कलीसिया हिरदय स ओकरे बरे परमेस्सर स पराथना करत रही।

जेल स पतरस क छुटब

⁶जब हेरोदेस मुकदमा चलावइ बरे ओका बाहेर लोगन क सामने लइ आवइ क रहा, उ रात पतरस दुइ सिपाहियन क बीच सोवा रहा। उ दुइ जंजीरे स बँधा रहा अउर दुआर प पहरुआ जेल क रखवारी करत रहेन।⁷ एकाएक

पर्भू क सरगदूत हुँवा आइके खड़ा भवा, जेल क खोली रोसनी स जगमगाइ उठी। उ पतरस क बगली थपथपाएस अउर ओका जगावत भवा कहेस, “हाली, खड़ा हवा!” जंजीर ओकरे हाथ में खुलके गिरि गइ।⁸ तबहिं सरगदूत ओका कहेस, “तइयार हवा अउर आपन चप्पल पहिरा।” तउ पतरस वइसा ही किहेस। सरगदूत ओका फिन कहेस, “आपन चोगा पहिरा अउर मोरे पाछे चला आवा।”

⁹फिन ओकरे पाछे-पाछे पतरस बाहेर निकरि आवा। उ समुझ नाहीं पाएस कि सरगदूत जउन कछू करत रहा, उ फुरइ रहा। उ बिचारेस कि उ कउनो दर्सन लखत अहइ।

¹⁰पहिले अउर दूसर ब्लाक क छोड़िके आगे बट्ट भवा उ पचे लोहा क उ फाटक प आइ गएन जउन सहर कइँती जात रहा। उ फाटक ओनकइ बरे खुद ही खुलि गवा। अउर उ पचे बाहेर निकरि गएन। उ पचे अबहिं गली क पार किहेन कि उ सरगदूत एकाएक ओका छोड़ि गवा।

¹¹फिन पतरस क जइसे होस आवा, उ बोला, “अब मोरी समझ में आवा ह कि असल में फुरइ अहइ कि पर्भू आपन सरगदूत क पठइके हेरोदेस क पंजा स मोका छुटकारा दियाएस ह। यहूदी लोग मोह प जउन कछू बुरा होइ क सोचत रहेन, ओहसे उहइ मोका बचाएस ह।”

¹²जब उ इ समझ गवा तउ उ यहून्ना क महतारी मरियम क घर चला गवा। (यहून्ना जउन मरकुस भी कहवावत ह।) हुँवा ढेर मिला बटुरा रहेन अउर पराथना करत रहेन।

¹³पतरस दुआरे क बाहेर स खटखटाएस। ओका लखइ रुदे नाउँ क एक दासी हुँवा आइ।¹⁴ पतरस क अवाज क पहिचान के खुसी क मारे ओकरे बरे फाटक बगैर खोले भए उ उलटिके भीतर दउड़ आइ अउर उ बताएस कि पतरस दुआरे प खड़ा अहइ।¹⁵ उ पचे ओसे बोलेन, “तू पागल होइ गइ अहा।” मुला उ जोर दइके कहतइ रही कि इ अइसा ही अहइ। ऐंह पँइ उ पचे कहेन, “उ ओकर सरगदूत होइ।”

¹⁶ओहर पतरस दुआर खटखटावत ही रहा। फिन उ पचे जब दुआर खोलेन तउ उ पचे अचरज में पड़ि गएन।¹⁷ ओनकइ हाथे स चुप रहइ क इसारा करत भए उ खोलिके बताएस कि पर्भू ओका जेलि स कइसे बाहेर निकारेस ह। उ कहेस, “याकूब अउर दूसर भइयन क इ बारे में बताइ दिहा।” अउर तब उ ठहर क तजिके कउनो दूसर स्थान प चला गवा।

¹⁸जब भोर भवा तउ पहरुअन में बड़ी खलबली मचि गइ। उ पचे अचरज में पड़ा सोचत रहेन कि पतरस क संग का भवा होइ।¹⁹ एकरे पाछे हेरोदेस जब ओकर छानबीन कइ चुका अउर उ ओका नाहीं मिला तउ उ आपन पहरुअन स पूछताछ किहेस अउर ओनका मारि डावइ क हुकुम दिहेस।

हेरोदेस क मउत

हेरोदेस फिन यहूदिया स जाइके कैसरिया में रहइ लाग। हुँवा उ कछू समइ बिताएस।²⁰उ सूर अउर सैदा क मनइयन स बहोत कोहान रहत रहा। उ पचे एक झुण्ड बनइके ओसे भेंटइ आइ रहेन। राजा क खुद क सेवक बलास्तुस क मान मनउवल कइके उ पचे हेरोदेस स सांति क पराथना किहेन काहेकि ओनकइ देस क राजा क देस स खाइक मिलत रहा।

²¹एक निहचत दिन हेरोदेस आपन राजसी वेस-भूसा पहिरिके आपन सिंहासन प बइठा अउर मनइयन क बियाख्यान देइ लाग।²²लोग चिचियाने, “इ तउ कउ-नो देवता क बानी अहइ, मनई क नाही।”²³काहेकि हेरोदेस परमेस्सर क महिमा नाही दिहेस, यह बरे फउरन पभू क एक दूत ओका बीमार कइ दिहेस। अउर ओहमाँ किरवा परि गएन जउन खाइ लागेन अउर उ मरि गवा।

²⁴मुला परमेस्सर क बचन क प्रचार होत रहा अउर उ फइलत जात रहा अउर बिसवासियन की संख्या बढत जात रही।

²⁵बरनाबास अउर साउल आपन काम पूरा कइके मरकुस कहवावइवाला यूहन्ना क भी संगे लइके अन्ताकिया लौटि आएन।

बरनाबास अउर साउल क चुना जाब

13 अन्ताकिया क कलीसिया में कछू नबी अउर बरनाबास, समीन (नीगर) कहा जाइवाला समीन कुरेनी क लूकियुस, देस क चउथाई हाँसा क राजा हेरोदेस क संगे पालितयोसित मनाहेम अउर साउल जइसे कछू सिच्छक रहेन।²उ पचे जब उपवास करत भए पभू क आराधना में लगा रहेन, तबहिँ पवित्तर आतिमा कहेस, “बरनाबास अउर साउल क जउने काम बरे मइँ बोलाएउँ ह, ओका करइ बरे मोरे निस्वत, ओनका अलगाइ द्या।”

³तउ जब सिच्छक अउर नबी आपन उपवास अउर पराथना पूरी कइ चुकेन तउ उ पचे बरनाबास अउर साउल प आपन हाथ धरेन अउर ओनका बिदा कइ दिहेन।

बरनाबास अउर साउल क साइप्रस जात्रा

⁴पवित्तर आतिमा क जरिए पठए भए उ सबइ सिल्किया गएन जहाँ स जहाज में बइठिके उ पचे साइप्रस पहुँचेन।⁵फिन जब उ पचे सलमीस पहुँचेन तउ उ पचे यहूदियन क आराधनालय में परमेस्सर क बचन क प्रचार किहेन यूहन्ना सहायक क रूप में ओनकइ संगे रहा।

⁶उ समूचइ द्वीप क जात्रा करत करत उ पचे पाफुस ताई जाइ पहुँचेन। हुवाँ ओनका एक जादूगर मिला, उ झूठा नबी रहा। उ यहूदी क नाउँ रहा बार-ईसा।⁷उ एक

बहोत बुद्धिमान पुरुस राज्यपाल सिरगियुस पौलुस क दोस्त रहा जउन फिन परमेस्सर क बचन सुनइ बरे बरनाबास अउर साउल क बोलवाएस।⁸मुला इलीमास जादूगर ओनकइ खिलाफत किहेस (इ बार-ईसा क अनुवाद क नाउँ बा)। उ नगर-पति क बिसवास दुगावइ क जतन किहेस।⁹फिन साउल जेका पौलुस भी कहा जात रहा, पवित्तर आतिमा स भरपूर होइके इलीमास प पैनी निगाह डारत भवा कहेस,¹⁰“सबहिँ तरह क छल अउर धूर्ताई स भरा, अरे सइतान क बेटहना, तू हर नेकी क दुस्मन अहा। का तू पभू क सोझ सच्चे राह क तोड़ब मरोड़ब न तजब्या? ¹¹अब लखा पभू क हाथन तोह प आइ पड़ा बा। तू आँधर होइ जाब्या अउर कछू समइ बरे सूरज तक भी नाही लख पउब्बा।”

तुरंतहिँ एक धूँध अउर अँधियारा ओह पइ छाइ गवा अउर एहर-ओहर टोवइ लाग कि कउ-नो हथवा धइके ओका चलावइ।¹²तउ राज्यपाल, जउन कछू भवा रहा, जब ओखा लखेस तउ उ बिसवास धरेस। उ पभू क बाबत उपदेसन स बहोत चकित होइ गवा।

पौलुस अउर बरनाबास क साइप्रस स जाब

¹³फिन पौलुस अउर ओकर संगी पाफुस स नाउ क जरिया पंपूलिया क पिरगा में आइ गएन। मुला यूहन्ना ओनका हुँवइ छोड़िके यरूसलेम लौटि आवा।¹⁴ओहर उ पचे आपन जात्रा प बढत भए पिरगा स पिसिदिया क नजदीक नगर अन्ताकिया में आइ गएन। फिन सबित क दिना यहूदी आराधनालय में जाइके बइठि गएन।¹⁵मूसा क व्यवस्था क मुताबिक अउर नबियन क पोथी क पाठ कइ चुके क पाछे यहूदी आराधनालय क अधिकारियन ओनकइ लगे इ संदेसा कहवाइ पठएन, “भाइयो, मनइयन क उपदेसन देइ बरे तोहरे लगे कहइ क प्रोत्साहन क कउ-नो अउर बचन अहइ जउन ओका सुनावा।”

¹⁶एह पइ पौलुस खड़ा भवा अउर आपन हाथ हिलावत भवा बोलइ लाग, “हे इग्राएल क मनइयो अउर परमेस्सर स डेरइवाले गैर यहूदियो, सुना: ¹⁷इ इग्राएल क मनइयन क परमेस्सर हमरे पूर्वजन क चुने रहा अउर जब हमार लोग मिश्र में ठहरा रहेन, उ ओनका महान बनाए रहा अउर आपन महान सक्ती स उ ओनका उ धरती स बाहेर निकारि लइ आवा रहा।¹⁸अउर लगभग चालीस बरिस तलक उ जंगल में ओनकइ मदद करत रहा।¹⁹अउर कनान देस क सात जातियन क नास कइके उ धरती इग्राएल क मनइयन क वसीयत क रूप में दइ दिहेस।²⁰इ सब कछू मैं लगभग साढ़े चार सौ बरिस लगेन।

“एँकरे पाछे समूएल नबी क समइ तलक उ ओनका अनेक निआव क न्यायकर्ता दिहेस।²¹फिन उ पचे एक राजा क निवेदन किहेन, तउ परमेस्सर बिन्यामीन क

गोत क एक मनई कीस क बेटवा साउल क चालीस बरिस बरे ओनका दइ दिहिस।²²फिन साउल क हटाइके उ ओनकइ राजा दाऊद क बनाएस जेकरे बारे में उ इ साच्छी दिहिस, 'मईं यिसै क बेटवा दाऊद क एक अइसे मनई क रूप में मिला ह, जउन मोरे मन क मुताबिक अहइ। जउन कछु मईं ओसे करावइ चाहत हउं, उ उ सब कछु क करी।'²³इ ही मनई क एक बंसज क आपन प्रण क मुताबिक इम्राएल में उद्धार करइया ईसू क रूप में लाइ चुका अहइ।²⁴ओकरे आवइ स पहिले यूहन्ना इम्राएल क सबहिं मनइयन में मनफिराव स बपतिस्मा क प्रचार करत अहइ।²⁵यूहन्ना जब आपन काम क पूरा करइ क रहा, तउ उ कहिस रहा, 'तू मीका जउन समुझत ह, मईं उ नहीं हउं। मुला एक अइसा अहइ जउन मोरे पाछे आवत अहइ। मईं जेकर पनही क फीता खोलइ लायक भी नहीं अहउं।'

²⁶'भाइयो, इब्राहीम क सन्तानो अउर सच्चे परमेस्सर क आराधक गैर यहूदियो, उद्धार क इ सुसमाचार हमरे बरे ही पठवा ग अहइ।²⁷यरूसलेम में बसइयन अउर ओनकइ राजा लोगन ईसू क नहीं पहिचानेन। अउर ओका दोखा ठहराइ दिहेन। इ तरह उ पचे नबी लोगन क उ बचन क पूरा किहन जेनकइ सबित क दिन पाठ कीन्ह जात ह।²⁸अउर जदि अपि ओनका ओकरे मउत क राजा क कउनो सबूत नहीं मिला, तउ भी उ पचे पिलातुस स ओका मरवाइ डावइ क माँग किहेन।²⁹ओकरे बारे में जउन कछु लिखा रहा, जब उ पचे उ सब कछु क पूरा कइ चुकेन ओका क्रूस प स खाले उतारेन अउर एक कब्र में धइ दिहन।³⁰मुला परमेस्सर ओका मरइ क पाछे फिन जीवित कइ दिहिस।³¹अउर फिन जउन लोग गलील स यरूसलेम तलक ओकरे संग गएन, उ ओनकइ अगवा कइउ दिना ताई परगत होत रहा। इ सबइ अब मनइयन बरे ओकर साच्छी अहइ।³²हम तोहका उ प्रण क बारे में सुसमाचार सुनावत अही जउन हमरे पूर्वजन क संग कीन्ह गइ रही।³³ईसू क, मरि जाए क पाछे फिन जीवित कइके, ओनकइ संताने क बरे परमेस्सर उहइ सपथ क हमरे बरे पूरा किहिस ह। जइसा कि दूसर भजन संहिता में लिखा भी अहइ:

'तू मोर पूत अहा, मईं तोहका आजु ही जनम दिहैउं ह।'

भजन संहिता 2:7

³⁴अउर उ ओका मरे भएन में जिआइ के उठाएस जेहेंसे नास होइ स पहिले ओका फिन स लौटब न होइ। उ इ तरह कहे रहा:

'मईं तोहका उ सबइ पवित्तर अउर न टरइ क असीस देब जेनका देइ क बचन मईं दाऊद क दिहैउं।'

यसायाह 55:3

³⁵ इ तरह एक दूसर भजन में उ कहत ह:

'तू आपन पवित्तर जने क नास क अनुभव नहीं होइ दिहा।'

भजन संहिता 16:10

³⁶फिन दाऊद आपन जुग में परमेस्सर क प्रयोजन क मुताबिक आपन सेवा-काम पूरा कइके मर गवा, ओका ओकरे पूर्वजन क संग दफनाइ दीन्ह गवा अउर ओकर छय भवा।³⁷मुला जेका परमेस्सर मरे भएन क बीच स जीवित कइके उठाएस, ओकर छय नहीं भवा।³⁸⁻³⁹तउ भाइयो, तू सबन्क जान जाइ चाही कि ईसू क जरिए ही पाप क छमा क उपेस तोहका दीन्ह गवा ह। अउर इहइ क जरिए हर कउनो जउन बिसवासी अहइ, ओन पापस छुटकारा पाइ सकत ह, जेनेस मूसा क व्यवस्था छुटकारा नहीं दियाइ सकत रही।⁴⁰तउ होसियार रहा, कहुँ नबियन जउन कछु कहे बाटेन, तू सबन प न घटइ:

⁴¹ 'निन्दा करइया लोगो, लखा, होइके भउचक्का मरि जाब्या, काहेकि तोहरे जुग में एक कारज अइसा करत हउं, जेकर चर्चा तलक प तोहका कबहुँ न बिसवास होई।'

हबक्कुक 1:5

⁴²पौलुस अउर बरनाबास जब हुवाँ स जात रहेन मनइयन ओनसे अगले सबित क दिन अइसी ही अउर बातन बतावइ बरे पराथना किहेन।⁴³जब सभा खतम भइ तउ बहोत स यहूदियन अउर बहुत गैर यहूदी भक्तन पौलुस अउर बरनाबास क पाछा किहेन। पौलुस अउर बरनाबास ओनसे बातचीत करत भए बिनती किहेन कि उ सबइ परमेस्सर क अनुग्रह में बना रहइ।

⁴⁴अगले सबित क दिन तउ लगभग समूचा सहर ही पर्भू क बचन सुनइ बरे उमड़ि आवा।⁴⁵इ बड़का मनइयन क मजमा क जब यहूदियन लखेन तउ उ पचे बहोत जरि भुनि गएन अउर भद्दा सब्द क बइपरत भए पौलुस जउन कछु कहे रहा, ओकर खिलाफत करइ लागेन।⁴⁶मुला पौलुस अउर बरनाबास निडर होइके कहेन, "इ जरूरी रहा कि परमेस्सर क बचन पहिले तोहका पढ़वा जात मुला काहेकि तू पचे ओका नकारत अहा अउर तू सबइ आपन खुद क अनन्त जिन्नगी क जोग गवा नहीं ठहरउत्या, तउ हम पचे अब गैर यहूदी लोग कइँती मुड़ि जात अही।⁴⁷काहेकि पर्भू हमका अइसी ही आग्या दिहे अहइ:

'मईं जोति बनाएउं तोहका, ओनकइ बरे जउन नहीं यहूदी, ताकि संसार के सब लोगन का उद्धार करइँ।'

यसायाह 49:6

⁴⁸गैर यहूदियन जब इ सुनेन तउ उ पचे बहोत खुस भएन अउर उ पचे पभू क बचन क सम्मान किहेन। फिन उ सबइ, जेनका अनन्त जिन्तगी पावइ बरे ठहरावा ग रहा, बिसवास धारण कइ लिहेन।

⁴⁹इ तरह समूचइ पहुँटा मैं पभू क बचन क प्रचार होत रहा।

⁵⁰ओहर यहूदी लोग ऊँच कुले क धार्मिक स्त्रियन अउर सहर क मुडइ मनइयन क उसकाएन अउर पौलुस अउर बरनाबास क खिलाफ अत्याचार करब सुरु कइ दिहेन अउर दबाव डाइके ओनका आपन पहुँटा स बाहेर निकरिवाइ दिहेन। ⁵¹फिन पौलुस अउर बरनाबास ओनकइ खिलाफ आपन गोड़े क धूरि झारिके इकुनियुम क चला गएन। ⁵²मुला अतीक मैं ओनकइ चेलन आनंद अउर पबित्तर आत्मा स भरपूर होत रहेन।

इकुनियुम मैं पौलुस अउर बरनाबास

14 इहइ तरह पौलुस अउर बरनाबास इकुनियुम मैं यहूदी आराधनालय मैं गएन। हुवाँ उ पचे इ तरीका स बियाख्यान दिहेन कि यहूदियन क एक बड़का मनइयन क मजमा बिसवास कइ लिहेस। ²मुला उ यहूदियन जउन नाहीं पातियानेन, गैर यहूदियन क उसकाएन अउर भाई बहनन क खिलाफ दुस्मनी पइदा कइ दिहेन। ³तउ पौलुस अउर बरनाबास हुवाँ बहोत दिनों तलक ठहरा रहेन अउर पभू क बारे मैं बेडर होइके प्रबचन देत रहेन। ओनकइ हीला स पभू अद्भुत कारजन अउर अचरज कारजन करवावत भव आपन द्या क संदेसा क मान करावत रहा। ⁴ओहर सहर क मनइयन मैं फूट पड़ि गइ। कछू मिला प्रेरितन कइँती अउर कछू मिला यहूदियन कइँती होइ गएन।

⁵फिन जब गैर यहूदी लोग अउर यहूदी लोग आपन आपन नेता स मिलिके ओनक संग बुरा बेवहार करइ लागेन (गरियाव) अउर ओन प पाथर लोकावइ क बात चली, ⁶तउ पौलुस अउर बरनाबास क एँकर पता लग गवा अउर पचे लुकाउनिया अउर लुस्त्रा अउर दिरबे जइसे सहरन अउर आसपास क पहुँटा मैं परानेन। ⁷उ पचे हुवाँ भी सुसमाचार क प्रचार करत रहेन।

लुस्त्रा अउर दिरबे मैं पौलुस

⁸लुस्त्रा मैं एक मनई बइठा भवा रहा। उ आपन गोड़वा स अंपग रहा। उ जन्मत ही लँगड़ा रहा, चल फिन तउ कबहुँ नाहीं पाएस। ⁹इ मनई पौलुस क बोलत भए सुने रहा। पौलुस ओह पइ निगाह गड़ाएस अउर लखेस कि चंगा होइ क बिसवास ओहमाँ बा। ¹⁰तउ पौलुस ऊँची अवाज मैं कहेस, “अपने गोड़वा प सोझ खड़ा हवा।” तउ उ ऊपर उछरा अउर चलइ-फिरइ लाग। ¹¹पौलुस जउन कछू किहे रहा, जब भिड़िया ओका लखेस तउ मनइयन लुकाउनिया क भाखा मैं गोहार लगाइके कहइ

लागेन, “हमरे बीच मनई क रूप धइके, देवता उतरि आवा अहईं।” ¹²उ पचे बरनाबास क “जेअस” * अउर पौलुस क “हिरमेस” * कहइ लागेन। (पौलुस क हिरमेस यह बरे कहा गवा काहेकि उ प्रमुख बोलवइया रहा।) ¹³सहर क सोझइ बाहेर बना जेअस क यहूदियन क मंदिर क पूजारी सहर क दुआरे साँइ अउर माल लइके आइ पहुँचा। उ भीड़ क संग पौलुस अउर बरनाबास बरे बलि चढ़ावइ चाहत रहा।

¹⁴मुला जब प्रेरितन बरनाबास अउर पौलुस इ सुनेन तउ उ पचे आपन ओढ़ना फाड़ि डारन अउर उ पचे ऊँची अवाज मैं इ कहत भए भीड़ मैं घुसि गएन, ¹⁵“अरे मनइयन, तू पचे इ काहे करत बाद्या? हम पचे भी वइसे मनई अही, जइसे तू पचे अहा। हिआँ हम सबइ तू सबन्क सुसमाचार सुनावइ आइ अही ताकि तू पचे बेकार क बातन स मुँह मोड़िके उ सजीव परमेस्वर कइँती लउटा जउन अकास धरती, समुदर अउर एनमाँ स जउन कछू अहइ, ओकर रचना किहेस ह। ¹⁶बीत गए काल मैं उ सर्बहि जातियन क आपन आपन राहे प चलइ दिहेस। ¹⁷मुला तोहका उ खुद आपन साच्छी दिए बगैर नाहीं तजेस। काहेकि उ तोहरे संग भलाई किहेस। उ तू पचन्क अकास स बर्खा दिहेस अउर रितु क मुताबिक फसल दिहेस। उहइ तोहका खइया क देत ह अउर तोहरे मन क आनंद स भरि देत ह।” ¹⁸इ बचन क पाछे भी उ पचे भिड़िया क ओनकइ बरे बलि चढ़ावइ स अबसर नाहीं रोक सकेन। ¹⁹फिन अन्ताकिया अउर इकुनियुस स आए भए यहूदी लोग भीड़ क अपने पच्छ मैं कइके पौलुस प पाथेर लोकाएन अउर ओका मरा जानिके सहर क बाहेर घेराइ लइ गएन। ²⁰फिन जब ओकर चेलन ओकरे चारिहुँ कइँती बटुरेन, तउ उ उठा अउर सहर मैं चला आवा अउर फिन अगले दिन बरनाबास क संग उ दिरबे बरे चल पड़ा।

सीरिया क अन्ताकिया क लउटब

²¹उ सहर मैं उ पचे सुसमाचार क प्रचार कइके बहोत स चेलन बनएन। उ सबइ लुस्त्रा, इकुनियुम अउर अन्ताकिया लउटि आएन। ²²अउर मनवइयन क आत्मन क स्थिर कइके बिसवास मैं रहइ बरे ओनका कहि क हिम्मत बढ़ाएन, “हमका बड़ा घोर दुख झेलिके परमेस्वर क राज्य मैं घुसइ क अहइ।” ²³हर कलीसिया मैं उ पचे ओनका नियुक्त किहेन उ पभू क सौप दिहेन जेहमाँ उ पचे बिसवास करत रहेन।

जेअस यूनानी बहोत देवता मैं बिसवास करत हीं। जेअस ओनकइ एक बहोत महत्व क देवता रहा।

हिरमेस एक अउर दूसर यूनानी देवता। यूनानियन क बिसवास क मुताबिक हिरमेस दूसर देवता क हरकारा (संदेसा लइ जाइवाला)।

²⁴एकरे पाछे पिसिदिया स होत भए उ पचे पंफूलिया आइ गएन। ²⁵अउर पिरगा में जब सुसमाचार सुनाइ चुकेन तउ इटली में आइ गएन। ²⁶हुवों स उ पचे अन्ताकिया क जहाज स गएन जहाँ जउने काम क अर्बाहिं उ पचे पूरा किहेन। उ काम बरे उ सबइ परमेस्सर क अनुग्रह प न्यौछावर होइ गएन।

²⁷अइसे जब उ पचे पंहोंचेन तउ उ पचे कलीसिया क मनइयन क बटोरेन अउर परमेस्सर ओनके द्वारा जउन कछू किहेस, ओकर वृत्तांत कहिके सुनाएन। अउर उ पचे एलान किहेन कि परमेस्सर दूसरे देसन क मनइयन बरे बिसवास क दुआर खोले अहइ। ²⁸फिन चेलन क संग हुवा बहोत दिनों तलक ठहरेन।

यरूसलेम में एक सभा

15 फिन कछू लोग यहूदिया स आएन अउर भाई लोगन क सिच्छा देइ लागेन, “जदि मूसा क व्यवस्था क मुताबिक तोहार खतना नाहीं भवा अहइ तउ तोहार उद्धार नाहीं होइ सकत।” ²पौलुस अउर बरनाबास क बिचार मेल नाहीं खात रहा, तउ ओनमाँ एक बड़ा मत भेद पइदा होइ गवा। यह बरे पौलुस अउर बरनाबास अउर ओनके कछू अउर संगी इ समस्या क हल निकारइ बरे प्रेरितन अउर मुखियन क लगे यरूसलेम पठवइ क ठान लिहेन। ³उ पचे कलीसियन क जरिए पठवा गएन अउर फ्रीनीके अउर सामरिया होत भए अधर्मियन क हिरदय बदलत भए भाई बहिनियन क समाचार सुनाइके खुस करत रहेन। ⁴फिन जब उ पचे यरूसलेम पंहोंचेन तउ कलीसिया, प्रेरितन अउर बुजुर्ग लोगन अगवानी किहेन। अउर उ पचे ओनके संग परमेस्सर जउन किहे रहा, उ सब कछू ओनका कहिके सुनाएन। ⁵एह पइ फरीसियन क दल क कछू बिसवासी खड़ा भएन अउर बोलेन, “ओनकइ खतना जरूर कीन्ह जाइ चाही अउर ओनका हुकुम देइ चाही कि उ पचे मूसा क व्यवस्था क पालन करइ।”

⁶तउ इ सवाल प बिचार करइ बरे प्रेरितन अउर बुजुर्गन आपुस में बटुर गएन। ⁷एक लम्बी चौड़ी तहल्लुक क पाछे पतरस खड़ा भवा अउर ओनसे बोला, “भाइयो, तू पचे जानत ह कि बहोत दिना पहिले तोहमाँ स परमेस्सर एक चुनाव किहे रहा कि मोरे हीला स गैर यहूदियन लोग सुसमाचार क संदेसा सुनइहीं अउर बिसवास करिहीं। ⁸अउर अन्तर्यामी परमेस्सर हमरे ही तरह ओनका भी पवित्तर आत्मा क बरदान दइके, ओकरे बारे में आपन समर्थन देखाए रहा। ⁹बिसवास क जरिए ओनकइ हिरदय क पवित्तर कइके हमरे अउर ओनके बेच उ कउनो भेद-भाव नाहीं किहेस। ¹⁰तउ अब चेलन क गटइया प एक अइसा जुआ लादिके जेका न हम उठाइ सकित अही अउर न हमार पूर्वज तू पचे परमेस्सर क गुस्सा करावइ चाहत ह?

¹¹मुला हमार तउ इ बिसवास अहइ कि पर्भू ईसू क अनुग्रह स जइसे हमार उद्धार भवा ह, वइसे ही हमका भरोसा अहइ कि ओनकइ भी बचाव जाई!”

¹²एह पइ समूचा दल सन्न मारि गवा अउर बरनाबास अउर पौलुस क बोलब सुनई लागेन। उ पचे, गैर यहूदियन क बीच परमेस्सर ओनकइ हीला स दुइ अद्भुत कारजन परगट किहे रहा, अउर अचरज कारजन किहे रहा, ओकरे बाबत बतावत रहेन। ¹³उ पचे जब बोल चुकेन तउ याकूब कहइ लाग, “भाइयो, मोरउ सुना।

¹⁴समौन बताए रहा कि परमेस्सर गैर यहूदियन में स कछू लोगनक आपन नाउँ बरे चुनिके सबन ते पहिले कइसे पिरमे परगट किहे रहा। ¹⁵नबी लोगनक बचन भी इ बात क समर्थन करत हीं। जइसा कि लिखा बाटइ:

¹⁶ अउरबइ मईं एकरे पाछे, खड़ा करब फिन स मईं दाऊद क उ घरे क जउन गिर चुका फिन स सँवारब ओकर खण्डहर क करब फिन स पुराने क उद्धार।

¹⁷ काहेकि जउन बचा अहइ उ सबइ गैर यहूदी सबहिं जउन अब मोर कहवावत हीं, पर्भू क हेरई।

¹⁸ कहत ह उहइ पर्भू इ बात, जुग जुग स, परगट करत रहा जउन इ बातन क।

आमोस 9:11-12

¹⁹इ तरह मोर इ निर्णय अहइ कि हमका ओन मनइयन क, जउन गैर यहूदी होत भए परमेस्सर कइँती घूमा अहइ, सतावइ नाहीं चाही। ²⁰मुला हमका तउ ओनके लगे लिखिके पठवइ चाही। हमका ओनका इ बातन क बतावइ चाही:

मूरत क चढ़ावा भवा खइया क जिन खा (एहसे खइया क अपवित्तर होत ह।) कउनो तरह क व्यभिचार जिन करा लहू क कबहुँ जिन चखा। गटइ घोटिके मारा गवा गौरू क मांस जिन खा।

²¹ओन पचन्क क इ बात न करइ चाही, काहेकि हर सहर में मनइयन (यहूदी) बाटेन जउन मूसा क व्यवस्था सिखावत हीं। हर सबित क दिन मूसा क व्यवस्था क तरीका स पाठ आराधनालय में बरिसन स होत आवत ह।”

गैर यहूदी बिसवासियन क नाउँ चिट्ठी

²²फिन प्रेरितन अउर बुजुर्गन समूचइ कलीसिया क संग इ निहचय किहेन कि ओनमाँ स कछू मिला क चुनिके पौलुस अउर बरनाबास क संग अन्ताकिया पठवा जाइ। तउ उ पचे बरसब्बा कहा जाइवाला यहूदा अउर

सीलास क चुन लिहेन। उ सबइ भाइयन मँ यरूसलेम मँ मान्य रहेन। ²³पचे ओनकइ हाथे स इ चिट्ठी पठएन:

तोहरे बंधु, बुजुर्ग अउर प्रेरितन कइँती स अन्ताकिया, सीरिया अउर किलिकिया क गैर यहूदी भाइयन क नमस्ते पहुँचइ

मोरे भाइयन,

²⁴हम पचे जब त इ सुना ह कि हम स कउनो आदेस पाए बिना ही, हम पचन मँ स कछू मनइयन जाइके आपन सबदन स तोहार जिअर दुखी किहेन हे, अउर तोहरे मन क नाहीं थिरइ दिहेन। ²⁵हम पचे आपुस मँ एक अउरटके इ निहचय कीन्ह ह हम सबइ आपन मँ स कछू मनई चुनी अउर आपन पिआरा बरनाबास अउर पौलुस क संग ओनका तोहरे लगे पठई। ²⁶इ सबइ उ पचे ही लोग अहई जउन हमरे पर्भू ईसू मसीह क नाउँ बरे आपन प्राण क बाजी लगाइ दिहे रहे। ²⁷हम पचे यहूदा अउर सीलास क पठवा त अही। उ सबइ तोहका आपन मुँह स इ सब बातन क बतइहीं। ²⁸पवित्तर आतिमा क अउर हमका इ नीक जान पड़ा कि तू सबन प इ जरूरी बात क अलावा क अउर कउनो बात क बोझा न डावा जाइ:

²⁹मूरतिन प चढ़ावा गवा भोजन तोहका नाहीं ग्रहण करइ चाही। खून, गटइ घोटिके बधा गवा पसु अउर व्यभिचार स बचा रहा।

जदि तू आपन आप क इ बातन स बचाए रखबा तउ तोहार कल्याण होइ। अच्छा बिदा।

³⁰इ तरह ओनका बिदा कइ दीन्ह गवा अउर उ सबइ अन्ताकिया पहोंचेन। हुवाँ उ पचे बिसवासियन क धरम सभा क बोलाएन अउर ओनका उ चिट्ठी दइ दिहेन। ³¹चिट्ठी बाँचिके जउन उ छहाह ओनका मिला ओह पइ उ पचे आनंद मनाएन। ³²यहूदा अउर सीलास, जउन खुद ही दुइनउँ नबी रहेन, आइयन क समन्वा ओनकइ हिम्मत बँधावत भए अउर मजबूती देत भए, एक लम्बा प्रबचन दिहेन। ³³हुवाँ कछू समइ बिताए क पाछे, भाई लोग ओनका साँति क साथ ओनही क लगे लौटि जाइ बरे बिदा किहेन जउन ओनका पठए रहेन। ³⁴*

³⁵पौलुस अउर बरनाबास अन्ताकिया मँ कछू समइ बिताएन। बहोत स दूसर मनइयन क संग उ पचे पर्भू क

बचन क उपदेस देत भए मनइयन मँ सुसमाचार क प्रचार किहेन।

पौलुस अउर बरनाबास क अलग होव

³⁶कछू दिनन क बाद बरनाबास स पौलुस कहेस, “आवा, जउन जउन नगरन मँ हम पचे पर्भू क बचन क प्रचार कीन्ह ह, हुवाँ आपन भाई लोगन क लगे बापिस लौटिके इ लखी कि उ पचे का कछू करत बाटेन।” ³⁷बरनाबास चाहत रहा कि मरकुस कहवावइवाला यूहन्ना क भी उ पचे संग लइ चलई। ³⁸मुला पौलुस इहइ ठीक समझेस कि उ पचे ओका आपन संग न लेई जउन पंपूलिया मँ ओनकइ संग छोड़ दिहे रहा अउर (पर्भू क) काम मँ जउन ओनकइ साथ नाहीं दिहस। ³⁹एह पइ उ दुइनउँ मँ घोर खिलाफत जन्मी। नतीजा इ भवा कि उ पचे आपुस मँ एक दूसर स अलगाइ गएन। बरनाबास मरकुस क लइके पानी क जहाजे स साइप्रस गवा। ⁴⁰पौलुस सीलास क चुनिके हुवाँ स चला गवा अउर भाइयन ओका पर्भू क छत्रछाया मँ सौंपेन। ⁴¹तउ पौलुस सीरिया अउर किलिकिया क जात्रा करत भवा हुवाँ क कलीसियन क मजबूत करत रहा।

तीमुथियुस क पौलुस अउर सीलास क संग जाव

16 पौलुस दिरबे अउर लुस्त्रा मँ भी आवा। हुवाँइ तीमुथियुस नाउँ क एक चेला रहा। उ कउनो बिसवासी यहूदी स्त्री क बेटवा रहा मुला ओकर बाप यूनानी रहा। ²लुस्त्रा अउर इकुनियुम क सहर क भाइयन क संग ओकर अच्छा उठब बैठब रहा। ³पौलुस तीमुथियुस क जात्रा प लइ जावा चाहत रहा। तउ उ ओका आपन संग लइ लिहेस अउर स्थानन प बसइया यहूदियन क कारण ओकर खतना किहेस; काहेकि उ पचे सबहिं जानत रहेन कि ओकर बाप एक यूनानी रहा। ⁴सहरन स जात्रा करत भवा उ पचे हुवाँ क मनइयन क ओन नियम क बारे मँ बताएन जेनका यरूसलेम मँ प्रेरितन अउर बुजुर्गन तय कइ दिहे रहेन। ⁵इ तरह हुवाँ क कलीसिया क बिसवास अउर मजबूत होत गवा अउर रोज हर रोज ओनकइ गन्ती बाढ़त गइ।

पौलुस क एसिया स बाहेर बोलावा जाव

⁶तउ उ पचे फ्रूगिया अउर गलातिया क पहुँटा स होइके निकरेन काहेकि पवित्तर आतिमा ओनका एसिया मँ पवित्तर बचन क प्रचार क मना कइ दिहे रही। ⁷फिन उ पचे जब मूसिया क सरहदे प पहोंचन तउ उ पचे बितूनिया मँ प्रवेस किहेन। मुला ईसू क आतिमा ओनका हुवाँ भी जाइ नाहीं दिहस। ⁸तउ उ पचे मूसिया होत भए त्रोआस पहोंचेन। ⁹राति क समइ पौलुस दिव्य दर्शन मँ निहारेस कि मैसीडोनिया क मनई ओसे पराथना करत भवा कहत अहइ, “मैसीडोनिया मँ आवा अउर

पद 34 कछू यूनानी प्रतियन मँ पद 34 जोड़ी गइ अहइ: “मुला सिलास हुवाँइ ठहरइ क निस्चय किहेस।”

हमार मदद करा!"¹⁰ इ दिव्य दर्शन क लखे क पाछे तुरंतहि इ नतीजा निकारत भए कि परमेस्सर ओन मनइयन क बीच सुसमाचार क प्रचार करइ हमका बोलाए अहइ, हम पचे मैसीडोनिया जाइ बरे ठान लीन्ह।

लुदिया क हिरदय बदलाव

¹¹इ तरह हम त्रोआस स जल मार्ग क जरिए जाइ बरे आपन नाउ खोलि दीन्ह अउर सोइइ समोश्राके जाइ पहोंचेन। फिन अगले दिन नियापुलिस चला गएन।¹²हुवाँ स हम पचे एक रोमी उपनिवेश फिलिप्पी पहुँचेन जउ मैसीडोनिया क उ पहुँटा क एक प्रमुख सहर रहा। इ सहर में हम कछु दिन बितावा।

¹³फिन सबित क दिन इ बिचारत भए कि पराथना करइ बरे हुवाँ कउनो स्थान होइ हम सहर-दुआरे नदी क तीरे गए। हम पचे हुवाँ बइठे अउर बटुरी भइ स्त्रियन स बातचीत करइ लागे।¹⁴हुवाँई लुदिया नाउँ क एक स्त्री रही। उ बैगनी रंग क ओढ़ना क बिक्री करत रही। उ परमेस्सर क आराधिका रही। उ बड़ा धियान स हमार बातन क सुनत रही। पर्भू ओकरे हिरदय क दुआर खोल दिहस ताकि, जउन कछु पौलुस कहत रहा, उ ओन बातन प धियान देइ सकइ।¹⁵आपन समूचइ परिवार क संग बपतिस्मा लेए क पाछे उ हम सबन स इ कहत भए बिनती किहेस, "जदि तू पचे मोका पर्भू ईसू क सच्चा भगत मानत ह तउ मोरे घरे आवा।" तउ उ हम पचन क जाइ बरे तइयार किहेस।

पौलुस अउर सीलास क बंदी बनावा जाब

¹⁶फिन अइसा भवा कि जब हम पचे पराथना ठउर कइँती जात रहे, हम पचन क एक दासी मिली जेहमाँ एक सगुन बतावइ वाली आतिमा क सवारी रही। उ मनइयन क भाग बताइके आपन मालिकन क ढेर धन कमाइके देत रही।¹⁷उ हमरे अउर पौलुस क पाछे इ चिचियात भइ होइ गइ "इ पचे परम परमेस्सर क सेवक अहइ। इ पचे तोहका मुक्ति क रस्ता क संदेसा सुनावत अहइ।"¹⁸उ बहोत दिनौं तलक अइसा ही करत रही तउ पौलुस परेसान होइ गवा। उ मुड़िके उ आतिमा स कहेस, "मई ईसू मसीह क नाउँ प तोहका आदेस देत हउँ, 'इ बिटिया में स बाहरे निकरि आवा।'" तउ उ फउरन ओहमाँ स बाहरे निकरि गइ।

¹⁹फिन ओकर स्वामी लोगन जब लखेन कि ओनकइ कमाई क आसा स मन टूटि गवा अहइ तउ उ पचे पौलुस अउर सीलास क धइ दहबोचेन अउर ओनका घेरवित भए बजार क बीच नगर क अधिकारियन क समन्वा लइ गएन।²⁰फिन न्यायकर्ता क लगे ओनका लइ जाइके बोलेन, "इ सबइ यहदियन अहइ अउर हमरे सहर में गड़बड़ी फइलावत बाटेन।²¹इ पचे अइसी रीति रिवाज क दोहई देत ही जेनका अपनाउब या जेन पइ चलब हम

रोमी मनइयन बरे निआव क मुताबिक नाहीं बा।"²²भौइ भी खिलाफत में मनइयन क संग होइके हमला करइ आइ। दण्डनायक भी ओनकइ ओढ़ना फाइके उतरवाइ दिहेन अउर आग्या दिहेन कि ओनकइ कुटुम्मस होइ।²³ओन पइ बहोत मारि पइ चुकइ क पाछे उ पचे ओनका जेल में डाइ दिहेन अउर जेल क अधिकारि क आदेस दिहेन कि ओनके बरे करी पहरा बइठाइ दीन्ह जाइ।²⁴अइसा आदेस पाइके उ ओनका जेल क भितरी खोली में धाँध दिहेन। उ ओनकइ गोड़वा में कठघरा जइ दिहेन।

²⁵लगभग आधी राति बीते प पौलुस अउर सीलास परमेस्सर क भजन गावत भएन पराथना करत रहेन अउर दूसर कैदी ओनका अनकत रहेन।²⁶तबइ हुवाँ अचानक एक अइसा खौफनाक भूचाल आवा कि जेल क नींव हल गइ अउर फउरन जेल क फटक्का खुल गवा। हर कउनो क बेड़ी ढीली होइके फिसल गइ।²⁷जेलि क अधिकारी जागिके जब लखेस कि जेलि क फटक्का खुलि गवा अहइ तउ उ आपन तरवार हींच लिहेस अउर इ सोचत भए कैदी पराइ गएन बाटेन। उ खुद क मार डावइ वाला रहा तबहिं²⁸पौलुस ऊँची अवाज में चिल्लाइके कहेस, "आपन क नस्कान जिन पहोंचावा काहेकि हम सब हिउँई अही।"

²⁹एह पइ जेल क अधिकारी मसाल मँगवाएस अउर हल्बुली में भितरे गवा। अउर डर स काँपत भवा पौलुस अउर सीलास क समन्वा भहराइ पइ।³⁰फिन उ ओनका बाहरे लइ जाइके बोला, "साहेब लोगो, उद्धार पावइ बरे मोका का करइ चाही?"

³¹उ पचे जवाब दिहेन, "पर्भू ईसू प बिसवास करा। एहसे तोहार उद्धार होइ-तोहार अउर तोहरे परिवार का।"³²फिन ओकरे सारे परिवार क संग उ सबइ ओका पर्भू क बचन सुनाएन।³³ओकरे पाछे जेल क अधिकारी उहइ रात अउर उहइ घड़ी ओनका हुवाँ स लइ गवा। उ ओकर घाव धोएस अउर आपन सारे परिवार क संग बपतिस्मा लिहेस।³⁴फिन उ पौलुस अउर सीलास क आपन घर लइ गवा अउर ओनका खइया क खिलाएस। परमेस्सर में बिसवास क कारण उ आपन समूचइ परिवार क संग आनन्द मनाएस।

³⁵जब भोर भवा तउ हाकिम इ कहइ बरे पिआदा क हुवाँ पठएन कि ओन पचन क छोड़ दीन्ह जाइ।

³⁶फिन जेलि क अधिकारी इ बतियाँ पौलुस क बखानेस, "दण्डाधिकारी तू पचन क छोड़ि देइ क कहवाइ पठएन ह। यह बरे अब तू बाहरे आवा अउर सांति क साथ चला जा।"

³⁷मुला पौलुस ओन सिपाहियन स कहेस, "जदि अपि हम रोमी नागरिक अही, मुला उ पचे हमका बिना अपराधी होए बिना सब मनइयन क समन्वा मारेन पीटेन ह अउर जेलि में धाँध दिहेन। अउर अब चुपे चुपे उ

पचे हमका बाहेर पठइ देत चाहत हीं, निहचय ही अइसी नाहीं होइ। होइ तउ इ चाही कि उ पचे खुद ही आइके हम पचन बाहेर खदेरई।”

³⁸सिपाही लोग न्यायाधीस क इ सब्ब जाइके सुनाएन। न्यायाधीस क जब इ पता लाग कि पौलुस अउर सीलास रोमी अहई तउ उ सबइ बहोत ससाइ गएन। ³⁹तउ उ पचे हुवाँ आएन अउर ओनसे छमा माँगिके ओनका बाहेर लइ गएन अउर ओनसे सहर क तजि देइ क कहेन। ⁴⁰पौलुस अउर सीलास जेल स बाहेर निकरिके लुदिया क घर पहुँचेन। धर्म बंधुअन स मिलत भए उ पचे ओनकइ हौसला बढाएन अउर फिन हुवाँ स चलि दिहेन।

पौलुस अउर सीलास थिस्सलुनीके में

17 फिर अम्फिपुलिस अउर अपुल्लोनिया क सफर पूरा कइके उ पचे थिस्सलुनीके पहुँच गएन। हुवाँ यहूदियन क एक आराधनालय रहा। ²आपन साधारण सुभाव क अनुसार पौलुस ओनके लगे गवा अउर तीन सबित क दिन तलक ओनकइ संग सास्तरन प बिचार क लेन-देन करत रहा। ³अउर सास्तरन स लइके ओनका समझावत भवा इ सिद्ध करत रहा कि मसीह क यातनाई झेलइ क रहा अउर फिन ओका मरा भवन में स जी उठब रहा। उ कहत, “इ ईसू ही, जेकर मई तोहरे बीच प्रचार करत हई, मसीह अहइ।” ⁴ओहमों स कछू जउन ओकरे मते स मेल खाएन, पौलुस अउर सीलास क मत में सामिल होइ गएन। परमेस्सर स डेराइवालन अगिनती यूनानी भी ओहमों मिलि गहन। एहमों डेर खास खास स्त्रियन भी मिलि गइन।

⁵मुला यहूदी तउ डाह मँ जरत भूँजत रहेन। उ पचे कछू बाजारु गुण्डन क बटोरेन अउर एक मजमा बनइके सहर मँ दंगा कराइ दिहेन। उ पचे यासोन क घर मँ धावा बोल दिहेन। अउर इ जतन करइ लागेन कि कउनो तरह पौलुस अउर सीलास क मनइयन क समन्वा लइ आवई। ⁶मुला जब उ पचे ओनका नाहीं पाइ सकेन तउ यासोन क अउर कछू दूसर भाइयन क सहर क अधिकारी क समन्वा घेराइ के लइ आएन। उ पचे चिचियानेन, “इ मनइयन जउन सारी दुनिया मँ उथर पुथर मचाए बाटेन अब उ पचे हियाँ आइ अहई।” ⁷अउर यासोन सम्मान क संग ओनका आपन घरवा मँ ठहराए बा। अउर उ पचे सर्बाहि कैसर क आदेसन क खिलाफ काम करत बाटेन। अउर कहत हीं एक राजा अउर अहइ जेकर नाउँ अहइ ईसू।” ⁸जब भीड़ अउर सहर क अधिकारी इ सुनेन तउ उ पचे भइकेन। ⁹अउर इ तरह उ पचे यासोन अउर दूसर मनइयन क जमानती मुचलका लइके छोड़ दिहेन।

पौलुस अउर सीलास बिरिया मँ

¹⁰फिन तुरंतहि रातउ रात पौलुस अउर सीलास क बिरिया पठइ दिहेन। हुवाँ पहुँचिके उ सबइ यहूदी,

आराधनालय मँ गएन। ¹¹इ पचे थिस्सलुनीके क मनइयन स जिआदा नीक रहेन। इ मनइयन पूरा चित्त लगाइके बचन क सुनेन अउर हर दिन सास्तरन क उलटत पलटत भएन जाँच करत रहेन कि पौलुस जउन बातन क बताएस ह, का उ बातन फुर अहई। ¹²एकरे कारण बहोत स यहूदी लोग अउर खास खास यूनानी स्त्री-पुरुसन भी बिसवास धरेन। ¹³मुला जब थिस्सलुनीके क यहूदियन क इ पता लाग कि पौलुस बिरिया मँ भी परमेस्सर क बचन क प्रचार करत बाटइ तउ उ पचे हुवाँ आइ धमकेन। अउर हुवाँ भी गल्बा करइ अउर मनइयन क हुस्कावइ सुरु कइ दिहेन। ¹⁴यह बरे तबहिं भाइयन तुरंत पौलुस क समुद्दर क किनारे जाइ क पठएन। मुला सीलास अउर तीमुथियुस हुवाँ ठहरा रहेन। ¹⁵पौलुस क लइ जाइवालन मनइयन ओका एथेंस पहुँचाइ दिहेन अउर सीलास अउर तीमुथियुस बरे इ हुकुम दइके कि उ पते हाली स ओकरे लगे आइ जाई, हुवाँ स चल दिहेन।

पौलुस एथेंस मँ

¹⁶पौलुस एथेंस मँ तीमुथियुस अउर सीलास क जोहत भए सहर क मूरत स भरा भवा लिखिके मन ही मने मँ तिलमिलात रहा। ¹⁷यह बरे हर रोज आराधनालय मँ यहूदियन अउर यूनानी भगतन जउन असली भगवान क पूजत रहेन स बहस-मुबाहसा करत रहा। हुवाँ बजार-हाट मँ जउन कउनो होत उ ओहसे भी हर रोज तर्क करत रहत। ¹⁸कछू इपीकूरी अउर स्तोईकी दर्सन क ज्ञानी भी ओसे सास्तार्थ करइ लागेन।

ओहमों स कछू कहेन, “इ अंतसंत बोलवइया कहब क चाहत ह?” दूसर लोग कहेन, “इ तउ बिदेसी देवतन क प्रचारक जान पडत ह।” उ पचे इ यह बरे कहे रहेन कि उ ईसू क बारे मँ उ पदेस देत रहा अउर ओकरे फिन स जी उठइ क प्रचार करत रहा। ¹⁹उ पचे ओका धइके अरियुपगुस क सभा मँ आपन संग लइ गएन अउर बोलेन, “का हम जान सवित ह कि तू जउन मनइयन क समन्वा रखत बाट्या, उ नई सिच्छा का अहइ? ²⁰तू कछू अजबूबी बात हमरे काने मँ डावत अहा, तउ हम पचे जानइ चाहित ह कि इ बातन का अरथ का अहइ?” ²¹हुवाँ रहत भए एथेंस क सर्बाहि मनइयन अउर परदेसी सिरिफ बिल्कुल नवा सुनइ या ओनही बातन क चर्चा क अलावा कउनो भी अउर बातन मँ आपन समइ न लागावत रहेन।

²²तब पौलुस अरियुपगुस क समन्वा खड़ा होइके कहेस, “हे एथेंस क मनइयन, मई लखत हई कि तू पचे हर तरह स धार्मिक अहा। ²³टहरत फिरत तोहार आराधना क चीजन क लिखिके मोका एक अइसी वेदी भी मिली जेह पइ लिखा रहा, ‘अनबूझ परमेस्सर बरे’ तउ तू पचे बेजानिके जेकर आराधना करत बाट्या मई तोहका उहइ बचन क सुनावत हई।” ²⁴परमेस्सर, जउन इ जगत

क अउर इ जगत क भितरे जउन कछू बा, ओकर रचना किहेस, उहइ धरती अउर अकास क पभू अहइ। उ हथवा स बनावा गवा मंदिर में नाही रहता।²⁵ ओकरे लगे कउनो चीजे क कमी नाहीं बा। एहसे मनई क हथवा स ओकर सेवा नाहीं होइ सकत। उहइ सबन क जिन्नीगी, साँस अउर दूसर सब कछू देत रहत ह।²⁶ एक ही मनई स उ मनई क सबहि जातिन क बनएस ताकि उ पचे समूचइ धरती प बसि जाई अउर उहइ मनइयन क समइ निश्चय कइ दिहेस अउर उ ठउर क जहाँ उ पचे रहई, चउहददी बाँधि दिहेस।²⁷ ओकर मतलब इ रहा कि मनई परमेस्सर क हेरई। होइ सकत ह कि उ पचे ओका ओकरे ताई पहीचके पाइ सकई। एतना होए प भी हम सबन में कउनो स भी उ दूर नाहीं बा:

28 'काहेकि उहइ मैं हम पचे रहित ह, उहइ मैं हमार चलब फिरब बा अउर उहइ मैं हमार थिर रहब बा!'

इहइ तरह खुद तोहरे ही कछू लिखवइया भी कहेन ह:
'काहेकि हम पचे ओकर बचवा अही!'

²⁹ अउर काहेकि हम परमेस्सर क संतान अहीं। यह बरे हमका इ कबहुँ नाहीं सोचइ चाही कि उ देउता सोना या चाँदी या पाथर क बनी भइ मानुस कल्पना या कारीगरी स बनी भइ कउनो मूत जइसी अहइ।³⁰ अइसे अगियान क जुग क परमेस्सर धियान नाहीं दिहेस अउर अब हर कतहुँ क मनई क मनफिराव क आदेस देत बाटइ।³¹ उ एक दिन तय किहेस ह जब उ आपन एक मनई क जरिए जेका उ मुकईर किहेस ह निआव स दुनिया क निआव करी। मरे भएन मैं स ओका जिआइके उ हर कउनो क इ बात क परमान दिहेस ह।"

³² जब उ पचे मरे भएन मैं स जी उठइ का बात सुनेन तउ ओहमाँ स कछू तउ ओकर हँसी हसारात करइ लागेन मुला कछू कहेन, "हम सबइ इ विसय प फिन कबहुँ तोहर प्रबचन सुनबा।"³³ तब पौलुस ओनका तजिके चल दिहेस।³⁴ कछू मनइयन बिसवास कइ लिहेन अउर ओकरे संग होइ गएन। एहमाँ अरियुपगुस* क निअम्बर दियुनुसियुस अउर दमरिस नाउँ क स्त्री अउर ओकरे संगे क अउर मिला भी रहेन।

पौलुस कुरिन्थुस में

18 एकरे पाछे पौलुस एथेंस तजिके कुरिन्थुस चला गवा।² हुवाँ उ जउ पुन्तुस मा पइदा भवा रहा अविक्ला नाउँ क एक यहूदी स मिला। जउन हाल मैं ही

अरियुपगी एथेंस क खास खास मनइयन क दला ये पचे न्यायाधीस क लाई होत रहेन।

आपन पत्नी प्रिस्किला क संग इटली स आवा रहा उ पचे इटली यह बरे तजेन कि क्लौदियुस सर्बहिँ यहूदियन क रोम स निकरि जाइ क हुकुम दिहे रहा तउ पौलुस ओनसे भेंटइ आवा।³ अउर काहेकि ओनकइ धन्धा एक ही रहा तउ उ ओनही क संग ठहरा अउर काम करइ लाग। बड़पार स उ पचे तम्बू बनावइवाला रहेन।⁴ हर सबित क दिन उ आराधनालय मैं बाद बिवाद कइके यहूदियन अउर यूनानियन क समुझावइ बुझावइ क जतन करत।

⁵ जब उ सबइ मैसीडोनिया स सीलास अउर तीमुथियुस आएन तब पौलुस आपन सारा समइ बचन क प्रचार करइ मैं लाए रहा। उ यहूदियन क इ परमान देइ चाहत रहा कि ईसू ही मसीह अहइ।⁶ तउ जबहिँ उ पचे ओकर खिलाफत किहेन अउर ओसे फूहर पातर कहेन तउ उ ओनकइ खिलाफ ओढ़ना झारत भवा ओनसे कहेस, "तोहार रकत तोहरे मूँड़े प पड़इ। ओकर मोसे कउनो मतलब नाहीं बा। अबहिँ स अगवा मई गैर यहूदियन क लगे चला जाब।"

⁷ इ तरह पौलुस हुवाँ स चला गवा अउर तीतुस यून्तुस नाउँ क एक मनई क घरे गवा। उ परमेस्सर क आराधक रहा। ओकर घर आराधनालय स सटा रहा।⁸ क्रिसपुस, जउन आराधनालय क प्रधान रहा, आपन समूचइ घराना क संग सत्य पभू मैं बिसवास धारण किहेस। साथ ही बहोत स कुरिन्थुस जउन पौलुस क प्रबचन सुने रहेन, बिसवास ग्रहण कइके बपतिस्मा लिहेस।

⁹ एक राति सपना मैं पभू पौलुस स कहेस, "डेरा जिन, बोलत रहा अउर चुप जिन हवा।¹⁰ काहेकि मई तोहरे संग हउँ। तउ तोहरे प हमला कइके कउनो भी तोहका नस्कान नाहीं पहुँचाइ काहेकि इ सहर मैं मोर डेर मिला बाटई।"

¹¹ तउ पौलुस, हुवाँ डेढ़ बरिस तलक परमेस्सर क बचन क ओनकइ बीच मैं सिच्छा देत भवा, ठहरा रहा।

पौलुस गलिलियन क समन्वा लइ आवा जाब

¹² जब अखाया क राज्यपाल गलिलियो रहा तबहिँ यहूदी लोग एक एक अउरटिके पौलुस प धावा बोलि दिहेन अउर ओका धइके कचहरी लइ आएन।¹³ अउर बोलेन, "इ मनई परमेस्सर क आराधना अइसे तरीका स करइ बरे हुस्कावत अहइ जउन व्यवस्था क विधान क खिलाफ बा।"

¹⁴ पौलुस अबहिँ आपन मुँहना खोलइ क ही रहा कि गलिलियन यहूदियन स कहेन, "अरे यहूदियो, जदि इ कछू कउनो अनिआव या गहिर अपराध क होत तउ तोहार बात सुनब मोरे बरे निआव क मुताबिक होत।¹⁵ मुना काहेकि इ विसय सब्दन, नाउँ अउर तोहार आपन व्यवस्था क सवाल स जुडा अहइ, यह बरे एँका तू सबइ खुद ही सुलझावा। अइसी बातन क बारे मैं मई न्यायाधीस नाहीं

बनइ चाहत हउँ।”¹⁶अउर फिन उ ओनका कचहरी स बाहेर निकाल दिहिस।

¹⁷तउ उ पचे आराधनालय क नेता सोस्थियेस क धइ दहबोचेन अउर उदालत क समन्वा ही ओका पीटइ लागेन। मुला गल्लियन इ बातन प तनिकउ भी धियान नाहीं दिहेन।

अन्ताकिया क पौलुस क वापसी

¹⁸बहोत दिनाँ तलक पौलुस हुवाँ ठहरा रहा। फिन भाइयन स बिदा होइके उ नाउ क मारग स सीरिया क चला गवा। ओकरे संग प्रिस्किल्ला अउर अक्विला भी रहेन। पौलुस किंखिया मँ आपन बार कटवाएस कहेकि उ एक ठु मन्त माने रहा।¹⁹फिन उ पचे इफिसुस पहोचने अउर पौलुस प्रिस्किल्ला अउर अक्विला क हुवाँ छोर दिहेन। अउर खुद आराधनालय मँ जाइके यहूदियन क संग बहस करइ लाग।²⁰जब हुवाँ क मनइयन ओसे कछू दिन अउर रुक जाइके निवेदन किहेन तउ उ इन्कार कइ दिहेस।²¹मुला जात भए समइ मँ उ कहेस, “अगर परमेस्सर क इच्छा भइ तउ मइँ तोहरे लगे फिन अउबइ।” फिन उ इफिसुस स नइया स जात्रा किहेस।

²²फिन कैसरिया पहोचिके उ यरूसलेम गवा अउर हुवाँ कलीसिया क मनइयन स भेटेस। फिन उ अन्ताकिया कइँती चला गवा।²³हुवाँ कछू समइ बिताए क पाछे उ बिदाई लिहेस अउर गलातिया अउर फ्रुगिया क पहुँटा मँ एक ठउर स दूसर ठउर क जात्रा करत भवा सबहि चेलन क बिसवास बढ़ावइ लाग।

इफिसुस अउर आखाया मँ अपुल्लोस

²⁴हुवाँ अपुल्लोस नाउँ क यहूदी रहत रहा। उ सिकुन्दरिया मँ पइदा भवा रहा। उ बिद्वान बोलवइया रहा। उ इफिसुस मँ आवा। सास्तर क ओका पूरा पूरा ज्ञान रहा।²⁵ओका पर्भू क मारग क दीच्छा भी मिली रही। उ हिरदय मँ उमंग भरिके प्रबचन करत अउर ईसू क बारे मँ बड़ी हुसियारी स उपदेस देत रहा। तउ भी ओका यहून्ना क बपतिस्मा क गियान रहा।²⁶आराधनालय मँ उ निडर होइके बोलइ लाग। जब प्रिस्किल्ला अउर अक्विला ओका बोलत सुनेन तउ उ पचे ओका एक कइँती लइ गएन अउर जिआदा बारीकी स ओका परमेस्सर क मारग क बियाख्या समझाएन।²⁷तउ जब उ अखाया क जाइ चाहेस तउ भाइयन ओकर हिम्मत बढ़ाएन अउर हुवाँ क चेलन क ओकर सुआगत करइ बरे लिखिके पठएन। जब उ हुवाँ पहोँचा तउ ओनकइ बरे बड़कवा सहायक सिद्ध होइ गवा जउन परमेस्सर क अनुग्रह स बिसवास ग्रहण किहेन।²⁸काहेकि सास्तरन स इ परमान देत भए कि ईसू ही मसीह अहइ, उ यहूदी लोगन क मजमा मँ जोरदार सब्दन स ललकारत भवा सास्तरन मँ पछारे रहा।

पौलुस इफिसुस मँ

19 अइसा भवा कि जब अपुल्लोस कुरिन्थुस मँ रहा तबहि पौलुस भीतर क पहुँटा स जात्रा करत भवा इफिसुस मँ आइ पहोँचा। हुवाँ ओका कछू चेलन मिलेन।²अउर उ ओनसे कहेस, “का जब तू पचे बिसवास धारण किहे रहा तब पवित्तर आत्मा क ग्रहण किहे रहा?”

उ सबइ जवाब दिहेन, “हम पचे तउ सुना तलक नाहीं कि कउनो पवित्तर आत्मा बाटइ भी!”³तउ उ कहेस, “तउ तू पचे कइसा बपतिस्मा लिहे अहा?”

उ सबइ कहेन, “यहून्ना क बपतिस्मा।”

⁴फिन पौलुस कहेस, “यहून्ना क बपतिस्मा तउ मनफिरावइ क बपतिस्मा रहा। उ मनइयन स कहे रहा कि जउन मोरे पाछे आवत अहइ, ओह पइ अरथ अहइ ईसू प बिसवास धरा।”

⁵इ सुनिके उ पचे पर्भू ईसू क नाउँ क बपतिस्मा लइ लिहेन।⁶फिन जब पौलुस ओन प हाथ धरेस तउ ओन पइ पवित्तर आत्मा उतरि आइ। अउर उ सबइ अलग अलग भाखा बोलइ अउर भविस्सबाणी करइ लागेन।⁷कुल जोरिके उ पचे कउनो बारह मनई रहेन।

⁸फिन पौलुस यहूदी आराधनालय मँ चला गवा अउर तीन महीना निडर होइके बोलत रहा। उ यहूदी लोगन क साथ बहस करत भवा ओनका परमेस्सर क राज्य क बारे मँ समझावत रहत रहा।⁹मुला ओहमों स कछू लोग बहोत जिद्दी रहेन। उ पचे बिसवास ग्रहण करइ स इन्कार कइ दिहेन अउर मनइयन क समन्वा भला बुरा कहत रहेन। तउ उ आपन चेलन क संग लइके ओनका तजिके चला गवा। अउर तरनुस क पाठसाला मँ हर रोज बिचार करत रहा।¹⁰दुइ बरिस तलक अइसा ही होत रहा। एकर नतीजा इ भवा कि सबइ एसिया क बसइया अउर यहूदियन अउर गैर यहूदियन पर्भू क बचन सुनि लिहेन।

स्किबा क बेटवन

¹¹परमेस्सर पौलुस क हथवा चमत्कार करम करावत रहा।¹²हिआँ तलक की ओकर छुआ रुमाल अउर अँगरखा क बेरामियन क लगे लइ जावा जात तउ ओनकइ बेरामी जरटुट होइ जातिन अउर दुस्ट आत्मा ओहमों स पराइ जातिन।¹³⁻¹⁴कछू यहूदी लोग, जउन दुस्ट आत्मा क उतारत भए एहर ओहर टहरत डोलत रहेन, जिन मनइयन मँ दुस्ट आत्मिन क सवारी होतिन, ओन पइ पर्भू ईसू क नाउँ क बइपरइ क जतन करतेन अउर कहतेन, “मइँ तोहका उ ईसू क नाउँ प जेकर प्रचार पौलुस करत वा, आदेस देत हउँ!” एक स्किबा नाउँ क यहूदी महा यात्रक क सात ठु बेटवन जब अइसा करत रहेन।¹⁵तउ दुस्ट आत्मा (एक दाँई) ओनसे कहेस, “मइँ ईसू क पहिचानत हउँ अउर पौलुस क बारे मँ भी जानत हउँ, मुला तू पचे कउन अहा?”

¹⁶फिन उ मनई जेह पइ दुस्ट आतिमा सवार रही, ओन प कूदि पड़ी। उ ओन पइ काबू पाइके अउर ओनकर कपरा फाड़ दिहैस। उ ओनका खूबइ पीटेस अउर ओनकइ ओढ़ना फाड़ि डाए। एहसे उ पचे बेबस्तर होइके अउर चोटाइके परानेन। ¹⁷इफिसुस मँ बसइया लोग सबहँ यहूदियन अउर यूनानी लोगन क इ बाते क पता लग गवा। उ सबइ लोग बहोतइ डेराइ गएन। इ तरह पर्भू ईसू क नाउँ क आदर अउर जिआदा बाढ़त गवा। ¹⁸ओहमाँ स बहोत स जउन बिसवास ग्रहण किहे रहेन, आपन स कीन्ह गवा कुकरम क सबन क समन्वा कबूलत भए हुवाँ आएन। ¹⁹जादूअर अउर टोनहन मँ स बहोतन आपन आपन पोथी लइके हुवाँ बटोरि दिहेन अउर सब मनइयन क अगवा बारि दिहेन। ओन पोथिन क कीमत 50,000 चाँदी क सिक्का क बराबर कूता गवा। ²⁰इ तरइ पर्भू क बचन जिआदा असरदार होत भवा दूर दूर ताई फइल गवा।

पौलुस क जात्रा योजना

²¹इ सब घटित होए क पाछे पौलुस आपन मने मँ मैसीडोनिया अउर अखाया होत भवा यरूसलेम जाइ क निहचय किहैस। उ कहैस, "हुवाँ जाए क पाछे मोका रोम भी लखइ चाही।" ²²तउ उ आपन तीमुथियुस अउर इरास्तुस नाउँ क दुइ सहायक लोगन क मैसीडोनिया पठएस अउर खुद एसिया मँ तनिक समइ अउर बिताएस।

इफिसुस मँ उपद्रव

²³उ दिनन मँ परमेस्सर के रस्ता का लइके हुवाँ खुब उपद्रव भवा। ²⁴हुवाँ देमेत्रियुस नाउँ क एक ठु चाँदी क बनवइया सोनार रहा। उ चाँदी क मन्दिर मूरति देवी अरतिमिस* क बनवत रहा। जेहसे कारीगर लोगन क रोजी मिलत रही। ²⁵उ ओनका इ धंधा मँ लगा भएन दूसर कारीगरन क बटोरेस अउर कहैस, "लखना मनइयो, तू पचे जानत ह कि काम स हमका एक बड़िया आमदनी होत ह। ²⁶तू सब लखि सकत ह अउर सुनि सकत ह कि इ पौलुस न सिरिफ इफिसुस मँ मुला करीब करीब एसिया क समूचइ पहुँटा मँ मनइयन क अपनी सिच्छा क जरिये बदल दिहे बा। उ कहत बा कि मनई क हथवा क बनावा सच देवता नाहीं अहइ।" ²⁷एहसे न सिरिफ इ बात क डर अहइ कि हमार बड़पार क नामूसी होइ मुला महान देवी अरतिमिस क मंदिर क इज्जत खोइ जाइ क भी डर बाटइ। अउर जउन देवी क आराधना समूचइ एसिया अउर दुनिया स कीन्ह जात बाटइ, ओकर गरिमा छीन लइ जाइ डर अहइ।" ²⁸जब उ पचे इ सुनेन तउ उ पचे बहोत कोहाइ गएन अउर चिचिआइ चिचिआइ क

अरतिमिस यूनानी देवी जेकर आराधना एसिया माइनर क निवासी करत रहेन।

कहइ लागेन, "इफिसियो क देवी अरतिमिस महान बा!" ²⁹ओहर सारे सहर मँ गड़बड़ी फैलि गइ। तउ मनइयन मैसीडोनिया स आएन अउर पौलुस क संग जात्रा करत भएन गयुस अउर अरिस्तरखुस क धइ दहबोचनेन अउर रंग साला मँ लइ भागेन। ³⁰पौलुस मनइयन क समन्वा जाब चाहत रहा मुला चलन ओका नाहीं जाइ दिहन। ³¹कछू प्रांत क अधिकारी जउन ओकर मीत रहेन, ओसे कहवाइ पठएन कि उ हुवाँ रंगसाला मँ आवइ क दुस्साहस जिन करइ। ³²लोगन मँ स कछू चिचियात बा, अउर कउनो कछू काहेकि समूचइ सभा मँ हल्बुली फइली बाटइ। ओहमाँ स जिआदा स जिआदा इ नाहीं जानत रहेन कि उ पचे हुवाँ बटुरा काहे बाटेन। ³³यहूदियन सिकन्दर क जेकर नाउँ भीड़ मँ स उ पचे सुझाए रहेन, अगवा ठाड़ कइ रखे रहेन। सिकन्दर आपन हथवा क हिलाइ हिलाइके मनइयन क समन्वा सफाई क बयान देत रहा। ³⁴मुला जब ओनका इ पता लाग कि उ एक यहूदी अहइ तउ उ सबइ एक अउटके कछू दुइ घण्टा तलक एक सुर मँ चिचियात भवा कहत रहेन, "इफिसियन क देवी अरतिमिस महान बा।"

³⁵फिन सहर क बाबू भीड़ क सान्त करत भवा कहैस, "हे इफिसुस क मनइयो, का दुनिया मँ अइसा कउनो मनई बा जउन इ नाहीं जानत कि इफिसियन सहर महान देवी अरतिमिस अउर सरग स गिरी भइ पवित्र सिला क रखवारा अहइ?" ³⁶काहेकि इ बातन स इन्कार नाहीं होइ सकत। यह बरे तोहका सान्त रहइ चाही। ³⁷तू पचे इ मनइयन क धइके हियौ लाया ह जदि अपि उ सबइ न तउ कउनो मंदिर क लूटेन ह अउर न ही हमरी देवी क बेज्जत किहेन ह। ³⁸अगर देमेत्रियुस अउर संगी कारीगरन क कउनो क खिलाफ कउनो सिकाइत अहइ तउ अदालत खुली बाटइ अउर हुवाँ निरनायकन अहइ। हुवाँ आपुस मँ एक दूसर प नालिस करइ। ³⁹मुला जदि तू एहसे कछू जिआदा जानइ चाहत ह तउ ओकर फैसला नेम स चलइवाली सभा मँ कीन्ह जाइ। ⁴⁰जउन कछू अहइ ओकरे मुताबिक हमका इ बाते क डर हइ कि आज क दंगा क कारण हम प देख न लगावा जाइ। इ दंगा बरे हमरे लगे कउनो भी कारण नाहीं बाटइ जेहसे हम सबइ एँका ठीक ठहराइ सकी।" ⁴¹एतना कहे क पाछे उ सभा क विसर्जित कइ दिहस।

पौलुस क मैसीडोनिया अउर यूनान जाब

20 फिन जब हुल्लड क सांत होइ गवा, एकरे पाछे पौलुस ईसू क चलन क बोलाएस अउर ओनकइ हिम्मत बढाइ दिहे क पाछे ओनसे बिदा लिहैस अउर मैसीडोनिया क चला गवा। ²उ पहुँटा स होइके उ जात्रा किहैस अउर हुवाँ क मनइयन क उछाह क बचन बोलेस। फिन उ यूनान आइ गवा। ³उ हुवाँ तीन महीना रुका अउर काहेकि यहूदी लोग ओकरे खिलाफ एक

षडयन्त्र रचे रहेन जब उ पानी क मारग स सीरिया क जाइवाला रहा कि उ निश्चय किहेस कि उ मैसीडोनिया क लौटि जाइ।⁴ बिरीया क पुरुस क बेटवा, थिस्सलनीकिया क बसइया लोग अरिस्तार्खुस अउर सिकुन्दुस, दिरबे क निवासी गयूस अउर तीमुथियुस अउर एसिया क पहँटा क तुखिकुस अउर त्रुफिमस ओकरे साथ रहेन।⁵ इ पचे पहिले चला ग रहेन अउर त्रोआस मँ हमका जोहत रहेन।⁶ बे खमीर क रोटी क दिनन क पाछे हम पचे फिलिप्पी स नाउ स चेलन अउर पाँच दिना क पाछे त्रोआस मँ ओनसे जाइ भेटेन। हुवाँ हम सात दिना तक उठरेन।

त्रोआस क पौलुस क आखिरी जात्रा

⁷हप्ता क पहिले दिना जब हम पचे रोटी क तोड़इ बरे आपुस मँ बटुरेन तउ पौलुस ओनसइ बतियाइ लाग। ओका भियान ही चला जाइ क रहा तउ उ आधी राति तलक बातचीत करत रहा।⁸ सीडी क ऊपर क खोली मँ जहाँ हम पचे बटुरा रहेन, हुवाँ देर क दिया धरा रहेन।⁹ हुवाँ यतुखुस नाउँ क एक नौजवान खिड़की प बइठा रहा। ओका गहिर नींद चौपे रही। काहेकि पौलुस देर बेला स बोलतइ चला जात रहा तउ ओका गहिर नींद आइ गइ। एहसे उ तीसरी मंजिल स तरखाले भहराइ पड़ा अउर जब ओका उठावा गवा तउ उ गुजर चुका रहा।¹⁰ पौलुस तरखाले उतरा अउर ओह पड़ि निहुरा। ओका आपन कोरा मँ लइके उ कहेस, “जिन घबराअ काहेकि ओकर प्राण उहइ मँ बा।”

¹¹फिन उ ऊपर चला गवा अउर उ रोटी क तोरि के बाँटिस अउर खाएस। उ ओनकइ देर देर तलक, भिन्सारे ताई बतियात रहा। फिन उ ओनसे बिदा लिहेस।¹² उ जिअत मनई क उ पचे घरे लइ आएन। एहसे ओनका बहोत चइन मिला।

त्रोस स मिलेतुस क जात्रा

¹³हम जहाजे प पहिले पहाँचेन अउर अस्सुस कइँती चल दिहेन। हुवाँ पौलुस क हम पचेन क जहाज प बइठावइ क रहा। उ अइसी ही योजना बनए रहा। उ खुन पैदर आवइ चाहत रहा।¹⁴ उ जब अस्सुस मँ हम पचन स भेंटा तउ हम पचे ओका जहाजे प बइठावा अउर हम सबइ मितुलेने कइँती चल पड़ें।¹⁵ दूसर दिन हम हुवाँ स चलिके खियुस क समन्वा जाइ पहाँचेन अउर दूसर दिन ओह पार सामोस आइ गएन। फिन ओकरे एक दिन पाछे हम मिलेतुस आइ पहाँचेन।

¹⁶काहेकि पौलुस जहाँ तलक होइ सका पिन्तेकुस्त क दिन तलक यरूसलेम पहुँच जाइ क हाली करत रहा, तउ उ ठान लिहेस कि उ इफिसुस मँ बे रुके भए अगवा चला जाइ जेहँसे ओका एसिया मँ समइ जिआदा न बितावइ पड़इ।

पौलुस क इफिसुस क पूर्वजन स बात-चीत

¹⁷उ मिलेतुस स इफिसुस क बुजुर्ग अउर कलीसिया क सदेसा पठइके आपन लगे बोलाएस।¹⁸ ओनकइ आए प पौलुस ओनसे कहेस, “इ तू सबइ जानत ह कि एसिया पहुँचइ क बाद पहिले दिन स ही हर समइ मइँ तोहरे संग कइसे रहत हउँ¹⁹ अउर बड़ा दीन होइके आँसू टपकाइ टपकाइके यहूदी लोगन्क कुचाल क कारण मोह प कइउ परीच्छा मँ भी मइँ दीनता पूर्वक पभू क सेवा करत रहेउँ।²⁰ तू पचे जानत बाट्या कि मइँ तोहका तोहरे भलाई क कउनो बाते स बतावइ मँ कबहुँ हिचकिचाएउँ नाहीं। अउर मँ तोहका ओन बातन क सबहिँ मनइयन क बीच अउर घरे घरे जाइके उपदेस देइ मँ कबहुँ नाहीं झिझक्यो।²¹ यहूदियन अउर यूनानियन क मइँ बराबर क भाव स मनफिराव बरे, परमेस्सर कइँती मोड़इ बरे मँ कहत रहेउँ ह अउर हमार पभू ईसू मँ बिसवास बरे ओनका चिताउनी दिहेउँ ह।²² अउर अब पवित्तर आतिमा क अधीन मँ मइँ यरूसलेम जात अहउँ मइँ नाहीं जानत हउँ हुआँ मोरे संग का कछू घटी।²³ मइँ तउ सिरिफ एँतना जानत हउँ कि हर सहर मँ पवित्तर आतिमा इ कहत भइ मोका चउकन्ना करत रहत ही कि जेल अउर घोर संकट मोका जोहत बाटेन।²⁴ मुला मोरे बरे प्राण क कउनो कीमत नाहीं बा। मइँ तउ बस उ दौड़ धूप अउर उ सेवा क पूरा करइ चाहत हउँ जेका मइँ पभू ईसू स ग्रहण करेउँ ह-परमेस्सर क अनुग्रह क सुसमाचार क साच्छी देब।

²⁵ अउर अहँ जानत हउँ कि तोहमँ स कउनो भी, जेनकइ बचि मँ मइँ परमेस्सर क राज्य क प्रचार करत घूमेउँ ह, मोर मुँह अगवा कबहुँ न लखि पाइ।²⁶ यह बरे आजु मइँ तोहरे समन्वा गोहराइ के कहत हउँ कि तू सबन मँ स कउनो मँ स कोइ खोवाय जाइ त ओकर दोखी मइँ नाहीं अहउँ।²⁷ काहेकि मइँ परमेस्सर क पूरी इच्छा क तोहका बतावइ क मँ मइ कबहुँ हिचकिचाएउँ नाहीं।²⁸ आपन अउर आपन जात बिरादरी क देख भाल करत रहा। पवित्तर आतिमा ओहमँ स तोहका ओन प चउकसी करइ बरे बनएस ह जेहसे तू परमेस्सर क कलीसिया क धियान राखा जेहसे उ आपन रक्त क बदले बेसहे रहा।²⁹ मइँ जानत हउँ कि मोरे बिदा होइ जाए क पाछे सिकारी बिगवा तोहरे बीच अइहीं अउर उ पचे इ भोला भाला झुंड क न छोरीहीं।³⁰ हिआँ तलक कि तोहरे आपन बीच मँ स ही अइसेन मनई भी उठि जइहीं, जउन चेलन क पाछे लगाइ लेइ बरे बात क घुमाइ फिराइ क कइहीं।³¹ यह बरे होसियार रहया। याद राखा कि मइँ तीन बरिस तलक एक एक क दिन रात रोइ रोइके चिताउनी देब नाहीं तज्योँ रहे।

³² अब मइँ तोहका परमेस्सर अउर ओकर सुसमाचार क अनुग्रह क हाथे अर्पण करत हउँ। उहइ तोहका बनइ सकत ह अउर ओन मनइयन क संग जेनका पवित्तर

कीन्ह गवा अहइ, तोहका बारिस बनइ सकत ह। ³³मई कबहुँ कउनो क सोना-चौंटी या ओढ़ना क नाही ललचाएउँ ह। ³⁴तू सबइ ही जानत ह मोर इ हथवन ही मोर अउर मोरे सगिन की जरूरत क पूरा किहेस ह। ³⁵मई आपन हर करम स तोहका इ देखोवा ह कि करी मेहनत करत भए हमका निर्बल क मदद कउने तरह करइ चाही अउर हमका पर्भू ईसू क बचन याद रखइ चाही जेहसे उ खुद कहे रहा, 'लेइ स देइ मैं जिआदा सुख बा।'"

³⁶इ कहि चुके क पाछे ओन सबन क संग उ घुटना क बल निहुरा अउर उ पराथना किहेस। ³⁷हर कउनो भोंकारा मारिके रोवत रहा। मिलना मिलत भए उ पचे ओका चूमत रहेन। ³⁸उ जउन इ कहे रहा कि पचे ओकर मुंहना फिन कबहुँ न लखिहीं, एहसे मनई जिआदा दुःखी रहेन। फिन उ पचे ओकर रच्छा करत भए जहाजे तलक पहाँचाइ दिहेन।

पौलुस क यरूसलेम जाव

21 फिन ओनसे बिदाइ लइके समुदर मैं हम पचे आपन नइया खेइ दीन्ह अउर सोझ राहे स कास पहाँच गएन अउर भियान रोदुवा। फिन हुवाँ स हम पतरा चला गएन। ²हुवाँ हम एक ठु जहाज लीन्ह जउन फिनीके जात रहा। ³जब साइप्रस लखइ क आइ गवा तउ हम पचे ओका बाई कइँती छोड़िके सीरिया कइँती मुड़ि गएन कहेकि जहाज क सूर मैं माल उतारइ क रहा तउ हम पचे भी हुवाँ उतरि गएन। ⁴हुवाँ हम पचन क अनुयायी मिलेन जेनके संग हम सात दिनों ताई ठहरेन। उ पचे आतिमा क असर स पौलुस क यरूसलेम जाइ स रोक दिहेन। ⁵फिन हुवाँ ठहरइ क आपन समइ बिताइके हम पचे बिदा भएन आपन जात्रा पर निकरि गएन। आपन स्त्रियन अउर बचवन क संग उ पचे सहर क बाहेर तलक हमरे संग आएन। फिन हुवाँ समुदर क किनारे हम पचे घुटना क बल निहुरिके पराथना कीन्ह। ⁶अउर एक दूसर स बिदा होइके हम पचे जहाजे प चढ़ि गएन। अउर उ पचे आपन-आपन घरन क लौटि आएन।

⁷सूर स पानी क रस्ता क जरिए जात्रा करत भए हम पतुलिमथिस मैं उतरेन। हुवाँ भाई लोगन क सुआगत सत्कार करत भए हम पचे ओनकइ संग एक दिन ठहरेन। ⁸दूसर दिन ओनका छोरिके हम कैसरिया आइ गएन। अउर सुसमाचार क प्रचारक फिलिप्पुस, जउन चुना भवा सात सेवकन मैं एक रहा, घर जाइके ओनके संग ठहरेन। ⁹ओकरे चार ठु कुँवारी बिटिया रहिन जउन भविस्सबाणी करत रहिन। ¹⁰हुवाँ हमरे कछू दिनन ठहरे रहइ क पाछे यहूदिया स अगबुस नाउँ क एक नबी आवा। ¹¹हमरे निअरे आवत भवा उ पौलुस क करिहाउँ बाँधके उठाइके ओसे अपनइ ही गोड़ अउर हाथ बाँधवाइ लिहेस अउर बोला, "इ अहइ जउन पवित्र आतिमा कहत बा, 'यानी यरूसलेम मैं यहूदियन, जेकर इ कमर

बाँध अहइ, ओका अइसे ही बाँधके गैर यहूदियन क हाथे सौंपि देइहीं।'"

¹²हम पचे जब इ सुनेन तउ हम हुवाँ क मनइयन ओसे यरूसलेम न आवइ क पराथना किहेन। ¹³यह पइ पौलुस जवाब दिहेस, "इ तरह रोइ रोइके मोर हिरदय तोड़त भए इ तू पचे का करत बाट्या? मई तउ यरूसलेम मैं न सिरिफ बाँधा जाइ बरे बल्कि पर्भू ईसू मसीह क नाउँ प मरइ तलक सन्ध अही।"

¹⁴काहेकि हम ओका मना नाही कइ पाएन। तउ बस एतना कहिके चुप्पी साधि गएन "जइसी पर्भू क इच्छा।"

¹⁵इ दिनन क पाछे फिन हम तइयारी कइके यरूसलेम चला गएन। ¹⁶कैसरिया स कछू चेलन भी हमरे संग होइ गएन। उ पचे हमका साइप्रस क मनसोन नाउँ क एक मनई क हियाँ लइ गएन जउन ईसू का पहिला चेला रहा। हमका उहइ क संग ठहरइ क रहा।

पौलुस क याकूब स भेंट

¹⁷यरूसलेम पहुँचे प भाई लोगन बड़ा उछाइ स हमार सुआगत सत्कार किहेन। ¹⁸दूसर दिन पौलुस हमरे संग याकूब स भेंटइ गवा। हुवाँ सबहिं कलीसिया क अगुआ हाजिर रहेन। ¹⁹पौलुस ओनकइ सुआगत सत्कार किहेस अउर ओन सब कामे क बारे मैं जउन परमेस्सर ओकरे हीला स गैर यहूदियन क बीच करवाए रहा, एक एक कइके कहि सुनाएस। ²⁰तउ उ पचे परमेस्सर क स्तुति करत भए बोलेन, "बंधू तू पचे तउ लखत ही अहा हियाँ केतना ही हजार यहूदी अइसा अहइँ जउन बिसवास ग्रहण लिहे बाटेन। मुला उ पचे सोचत ही मूसा का व्यवस्था क मानब बहुत जरूरी अहइ। ²¹तोहरे बारे मैं ओनसे कहा गवा बाटइ कि तू पचे गैर यहूदियन क बीच रहइवाला सबहिं यहूदी लोगन क मूसा क सिच्छा क तजइ क सीख देत बाट्या। अउर ओनसे कहत ह कि उ पचे न तउ आपन गदेलन क खतना करावई अउर न ही यहूदी रीति रिवाजे प चलइँ।

²²तउ का कीन्ह जाइ? उ पचे इ तउ जरूरी ही सुनिहीं कि तू आवा अहा। ²³यह बरे तू उहइ करा जउन तोहसे हम कहत अही। हमरे संग चार ठु अइसे मनई बाटेन जउन कउनो मन्त मानेन ह। ²⁴इ मनइयन क लइ जा अउर ओनकइ संग सुद्ध होइ क जलसा मैं सामिल होइ जा। ओनकइ खर्जा दइ द्या उ पचे आपन मूँड मुड़वाइ लइ लेइँ। एहसे सब लोग जान लेइहीं कि उ पचे तोहरे बारे मैं जउन सुने अहइँ, ओहमाँ स कउनो सच नाही बाटइ मुला तू तउ खुद ही हमरे व्यवस्था क मुताबिक जिन्गी देत ह।

²⁵हियाँ तलक बिसवास ग्रहण करइवाले गैर यहूदियन क सवाल बा, हम पचे ओनका एक ठु चिट्ठी मैं लिखिके पठएन ह:

‘उ पचे मूरतिन प चढ़ावा प्रसाद, रक्त क भोजन, गटई घोटि के मारे भएन गोरुअन अउर व्यभिचार स आपने को खुद क दूर राखई।”

²⁶इ तरह पौलुस ओन मनइयन क आपन संगे लिहस अउर ओन मनइयन क संग आपन खुद क अगले दिन सुदुध कइ दिहस। फिन उ मंदिर मँ गवा जहाँ उ गोहराइके कहेस कि सुदुध होइके दिन कब पूर होइहीं अउर हम पचन मँ स हर एक बरे चढ़ावा कब चढ़ाइ जाइ।

²⁷जब उ सात दिना पूर होइवाला रहा, एसिया स आए कछू यहूदी लोग ओका मंदिर मँ लखेन। उ पचे भीड़ मँ सबहिं मनइयन क हुस्काइ दिहेन अउर पौलुस क धइ लिहन। ²⁸फिन उ पचे नरियाइके बोलेन, “इग्राएल क मनइयो मदद करा। इ अहइ मनई अहइ जउन हर कहुँ हमारा जनता क, मूसा क व्यवस्था क खिलाफ मनइयन क सिखावत बहकावत बा। अउर अब तउ इ गैर यहूदियन क मंदिर मँ लइ आवा अहइ। अउर इ इ तरह इ पवित्रर स्थान क भरभण्ड कइ दिहे अहइ।” ²⁹उ पचे अइसा यह बरे कहे रहेन कि तुफिमूस नाउँ क एक इफिसी क सहर मँ उ पचे ओकर संग लखिके अइसा सोचेन कि पौलुस ओका मंदिर मँ लइ गवा अहइ।

³⁰तउ सारा सहर खिलाफ उठि खड़ा भवा। मनई भागि भागिके चढ़ बइठेन अउर पौलुस क धइ लिहेन। फिन उ पचे ओका घेरवत भए मंदिर स बाहेर लइ गएन अउर फउरन फाटक बन्द कइ दिहेन। ³¹उ पचे ओका मारइ क जतन करत ही रहेन कि रोमी फऊज क टुकड़ी क नायक क लगे इ सूचना पहोंची कि समूचइ यरूसलेम मँ खलबली मची बा। ³²उ सेनानायक कछू सिपाहियन अउर फउज क अधिकारी क आपन संग लिहस अउर पौलुस प हमला करइवाले यहूदियन कइँती बढा। यहूदियन जब सेना नायक अउर सिपाही लोगन क लखेन तउ उ पचे पौलुस क पीटब बंद किहेन। ³³तब उ सेना नायक पौलुस क लगे गवा अउर ओका बंदी बनाइ लिहस। उ ओका दुइ जंजीरे मँ बाँध लेइ क आदेस दिहस। फिन उ पूछेस, “उ कउन अहइ अउर उ का किहस ह?”

³⁴भिड़िया मँ स कछू मनइयन एक बात कहेन तउ दूसर लोग दूसर बात। इ हो-हल्लइ मँ काहेकि उ इ नाहीं जान पाएस कि सच्चाई का अहइ, यह बरे उ हुकुम दिहस कि ओका छावनी मँ लइ चला जाइ। ³⁵⁻³⁶पौलुस जब सीढ़िन क लगे पहोंचा तउ भिड़िया मँ फइली हिंसा स सिपाहियन क ओका आपन सुरच्छा मँ लइ जाइ पड़ा। काहेकि ओकरे पाछे मनइयन क एक भारी भीड़ इ चिचियात भइ चलत रही, “एँका मारि डावा।”

³⁷जब उ छावनी क भीतर लइ जावा जाइवाला रहा कि पौलुस सेनानायक क कहेस, “का मई तोहसे कछू कहि सकत हउँ?”

सेनानायक बोला, “का तू यूनानी बोलत अहा? ³⁸तउ तू उ मिन्न क मनई तउ नाहीं अहां न जउन पहिले दंगा सुरु कराए रहा अउर जउन हियों रेगिस्तान मँ चार हजार आतंकवादी लोगन क अगुआई करत रहा?”

³⁹पौलुस कहेस, “मई किलिकिया क तरसुस सहर क एक यहूदी मनई हउँ। अउर एक मसहूर सहर क नागरिक हउँ। मई तोहसे चाहत हउँ कि तू मोका इ मनइयन क बीच बोलइ द्या।”

⁴⁰ओसे आग्या पाइके पौलुस सीढ़ी प खड़ा होइके मनइयन कइँती हाथ हिलावत भवा ओनका सांत होइ क कहेस। जब सब सांत होइ गवा तउ पौलुस इब्रानी भाखा मँ मनइयन स कहइ लाग।

पौलुस क भासण

22 पौलुस कहेस, “भाई लोगन अउर बाप क नाई भले मनइयन, मोका आपन बचाव मँ अब जउन कछू कहइ क बाटइ, ओका सुना।” ²उ पचे जब ओका इब्रानी भाखा मँ बोलत भए सुनेन तउ उ पचे जिआदा सांत होइ गएन। फिन पौलुस बोला, ³“मई एक यहूदी मनई हउँ। सिलिकिया क तरसुस सहर मँ जनम भवा रहा अउर मई इहइ सहर मँ पाला पोसा जाइके बाढ़ गएँ ह। गमलिएल* क गोड़वा प बइठिके हमरे पूर्वजन क व्यवस्था क मुताबिक बड़ी कड़ाई स मोर सिच्छा भइ। परमेस्वर बरे मई जिआदा धुन लगावत रहेँ। फुरे वइसे ही जइसे आज तू पचे अहा। ⁴इ ईसू के पंथ क मनइयन क मई एँतना सताएँउ ह कि ओनकइ परान तलक उड़ि गएन। मई पुरुसन अउर स्त्रियन क बंदी बनाएँ ह अउर जेलिया मँ धाँध दिहेँ ह। ⁵खुद महायाजक अउ बुजुर्ग यहूदी नेतन क समूचइ सभा एँका सिद्ध कइ सकत ह। मई दमिस्क मँ एँनकइ भाइयन क नाउँ चिट्ठी भी लिहेँ ह अउर इ पंथ क हुवाँ रहइ वालन क धइके बंदी क रूप मँ यरूसलेम लइ आवइ बरे मई गवा भी रहे रहा ताकि ओनका सजा दीन्ह जाइ सकइ।

पौलुस क मन कइसे बदल गवा

⁶“फिन अइसा भवा कि मई जब जात्रा करत करत दमिस्क क लगे पहोंचा तउ लग भग दुपहरिया क समइ अकास स एकाएक एक जोर क प्रकास चारिहुँ कइँती फइला। ⁷मई भुइयाँ प भहराइ गवा। तबहिं मई एक अवाज सुनेँ जउन मोसे कहत रही ‘साउल, ओ साउल! तू मोका काहे सतावत अहा?’ ⁸तब मई जवाबे मँ कहेँ, ‘पभू, तू कउन अहा?’ उ मोसे कहेस, ‘मई उहइ नासरी ईसू अहउँ जेका तू सतावत बाटया।’ ⁹जउन मोरे संग रहेन, उ सबइ भी उ प्रकास निहारेन मुला उ बाणी क

गमलिएल यहूदी लोगनक एक धरम क खास फरीसी लोगनक एक दु खास धरम-गुरु। (प्रेरित 5:34)

जउन मोका गोहराए रहा, उ पचे समुझि नाहीं पाएन।¹⁰मईं पूछेउँ, 'पभूँ, मईं का कररुँ?' एह पड़ पभूँ मोसे कहेस, 'खड़ाहुवा, अउर दमिस्क क चला जा। हुवाँ तोहका सब कछू बताइ दीन्ह जाइ, जेका करइ बरे तोहका मुकरर कीन्ह गवा बा।'¹¹काहेकि मईं उ जोरदार प्रकास स कछू लखि नाहीं पाएउँ रहा, तउ मोर संगी मोर हथवा धइके मोका लइ चलने अउर मईं दमिस्क पहोंचि गएउँ।

¹²'हुवाँ हनन्याह नाउँ क एक मनई रहा। उ व्यवस्था क पालन करइवाला भगत रहा। हुवाँ क बसइया सबहिं यहूदियन क संग ओकर मेलजोल रहा।¹³उ मोरे लगे आवा अउर मोरे नगिचे खड़ा होइके बोला, 'भाई साउल, फिन स लखइ लगा!' अउर उहइ छिन मईं ओका लखइ क जोय होइ गवा।¹⁴उ कहेस, 'हमरे पूर्वजन क परमेस्सर तोहका चुनि लिहे अहइ कि तू ओकर इच्छा क परखा, ओकरे धरम क सरूप क लखा अउर ओकर बाणी सुना।¹⁵काहेकि तू जउन लख्या ह अउर जउन सुन्या ह, ओकरे बरे सबहिं मनइयन क समन्वा तू ओकर साच्छी होब्या।¹⁶यह बरे अब तू केकर बाट जोहत बाट्या, खड़ा होइ जा बपतिस्मा ग्रहण करा अउर ओकर नाउँ क गोहरावत भए आपन पाप क धोइ डावा।'

¹⁷'फिन अइसा भवा कि जब मईं यरूसलेम लौटिके मंदिर मैं पराधना करत रहेउँ तबहिं मोर समाधि लग गइ¹⁸अउर मईं लखेउँ कि ईसू मोसे कहत अहइ, 'हाली! करा अउर फउरन यरूसलेम स बाहेर जा काहेकि मोरे बारे मैं उ पचे तोहार साच्छी न मनिहीं।'¹⁹तउ मईं कहेउँ, 'पभूँ इ लोग तउ जानत हीं, कि तोह प बिसवास करइया मनइयन क बंदी बनवत भए अउर पीटत भए मईं यहूदी आराधनालय मैं टहरत फिरा हउँ।²⁰अउर तउ अउर जब तोहार साच्छी रिस्तिफनुस क रकत बहावा जात रहा, तब भी मईं आपन समर्थन देत भए हुवाँ खड़ा रहेउँ। जउन ओकर कतल किहे रहेन, गइं ओनकइ ओढ़ना क रखवाली करत रहेउँ।'²¹फिन उ मोसे बोला, 'तू जा, काहेकि गैर यहूदियन क बीच दूर-दूर ताई पठउबा।''

²²इ बात तलक उ पचे सुनत रहेन फिन ऊँच अवाजे मैं चिल्लाइ उठेन, 'अइसे मनइयन क धरती स अजाद करा। इ जिअइ क जोगग नाहीं बा।'²³उ पचे जब चिचियात रहेन अउर आपन ओढ़ना क उतारि उतारिके लोकावत रहेन अउर अकासे मैं धूरि उछारत रहेन,²⁴तबहिं सेनानायक आदेस दिहेस कि पौलुस क जेले मैं लइ जावा जाइ। उ कहेस कि कोड़ा स मारि मारिके ओसे बकरवावा जाइ ताकि मनइयन क पता लागइ कि ओह पड़ मनइयन क चिचियाइ क कारण का बाटइ।²⁵मुला जब उ पचे ओका कोड़ा मारइ बरे बाँधत रहेन तबहिं हुवा खड़ा भवा फऊजीनायक स पौलुस कहेस, 'कउ-नो रोमी नागरिक क, जउन अपराधी न पावा गवा होइ, कोड़ा लगाउब का ओका नीक बा?'

²⁶फऊजीनायक इ सुनिके सेनानायक क निअरे गवा अउर बोला, 'इ आप का करत अहइ? काहेकि इ तउ रोमी नागरिक अहइ।'

²⁷एह पड़ सेनानायक ओकरे लगे आइके पूछेस, 'मोका बतावा, का तू रोमी नागरिक अहा?'
पौलुस जवाब दिहेस, 'हाँ।'

²⁸एह पड़ सेनानायक जवाब दिहेस, 'इ नागरिकता पावइ बरे मोका तउ बेर का धन खर्च करइ पड़ा रहा।'

पौलुस कहेस, 'मुला मईं तउ जनम स रोमी नागरिक हउँ।'²⁹तउ उ पचे जउन ओसे पूछताछ करत रहेन, तुरंत पाछे हटि गएन अउर सेनापति भी इ समुझिके कि उ एक रोमी नागरिक अहइ अउर उ ओका बंदी बनाए अहइ, बहोत डेराइ गवा।

यहूदी नेता क समन्वा पौलुस क भासण

³⁰काहेकि उ सेनानायक इ बात क ठीकठीक पता लगावइ चाहत रहा कि यहूदियन पौलुस प जुर्म काहे लगाएन, यह बरे उ दूसर दिन बंधन खोल दिहेस। फिन मुख्ययाजक अउर सबन त सर्वोच्च यहूदी महासभा क बोलाइ पठएन अउर पौलुस क ओनकइ समन्वा लाइके खड़ा कइ दिहेस। पौलुस यहूदी महासभा प टकटकी लगाइके निहारत

23 भवा कहेस, 'मोर भाइयो, मईं परमेस्सर क समन्वा आजु तलक अन्तः मन स जिनगी बिताएउँ ह।'²एह पड़ महायाजक हनन्याह पौलुस क निअरे खड़ा भए मनइयन क आदेस दिहेस कि उ पचे ओकरे मुँह प थपड़ मारइ।³तब पौलुस ओसे कहेस, 'हे सफेदी स पोती भइ दीवार! परमेस्सर क मार तोह पड़ पड़ी। तू हिआँ व्यवस्था क मुताबिक कइसा निआब करइ बइठा अहा कि तू व्यवस्था क खिलाफ मोका थपड़ मारइ आदेस देत अहा।'

⁴पौलुस क लगे खड़ा भए मनइयन कहेन, 'परमेस्सर क महायाजक क बेजत करइ क हिम्मत तोहका भवा कइसे।'

⁵पौलुस जवाब दिहेस, 'मोका तउ पता नाहीं कि इ महायाजक अहइ। काहेकि लिखा अहइ, 'तोहका आपन प्रजा क राजा बरे कुभाख बोल बोलइ नाहीं चाही। *'

'फिन जब पौलुस क पता चला कि ओहमाँ स आधा मनई सदूकी अहइ अउर आधा फरीसी तउ महासभा क बीच उँच अवाज मैं कहेस, 'भाइ लोगो, मईं फरीसी हउँ एक फरीसी क बेटवा हउँ। मरइ क पाछे फिन स जी उठइ बरे मोरी मान्ता क कारण मोह प मुकदमा चलावा जात अहइ।'⁷ओकरे अइसा कहइ प फरीसियन अउर सदूकियन मैं एक तहतुक उठा अउर सभा क बीच फूटि पड़ गइ।⁸सदूकियन क कहब अहइ कि पुनरुत्थान

नाहीं होत न सरगदूत होत हीं अउर न ही आतिमा। मुला फरीसियन क ऍनके होइ मँ बिसवास करत हीं।⁹हुवाँ बहोत सोरगुल भवा। फरीसियन क दल मँ स कछू धरम सास्त्री उठेन अउर खरी बहस करत भए कहइ लागेन, “इ मनई मँ हम पचे कउनो खोट नाही पावत अही। जदि कउनो आतिमा या कउनो सरगदूत ऍहसे बात किहेन ह तउ ऍहसे का?”

¹⁰काहेकि इ तहतुक हिंसा क रूप लइ चुका रहा, ऍहसे उ सेनानायक डेराइ गवा कि कहुँ उ पचे पौलुस क बोटी बोटी न कइ डवइँ। तउ उ सिपहियन क आदेस दिहसे कि उ पचे खाले जाइके पौलुस क ओनसे अलगाइके छावनी मँ लइ जाईं।

¹¹अगली राति पभूँ पौलुस क नगिचे खड़ा होइके, ओसे कहेस, “हिंमत राखा काहेकि तू जइसे मजबूती क संग यरूसलेम मँ मोर साच्छी दिहा ह, वइसे ही रोम मँ तोहका मोर साच्छी देइ क अहइ!”

¹²फिन दिन निकरा। यहूदी लोगन एक कुचाल चलेन। उ पचे किरिया खाएन कि जब तलक उ पचे पौलुस क मार नाही डइहीं, न कछू खइहीं, न पिइहीं।¹³ओनमाँ स चालीस स भी जियादा मनइयन इ कुचाल चलेन।¹⁴उ पचे मुख्ययाजकन अउर बुजुर्गन क लगे गएन अउर बोलेन, “हम पचे किरिया खावा ह कि हम पचे जब तलक पौलुस क मारि नाहीं डाइत, तब तलक न हम कछू खाब न पिअब।¹⁵तउ अब तू अउर यहूदी महासभा, सेनानायक स बिनती करइ चाहत ह कि उ ओका तोहरे लगे लइ आवइ इ बहाना बनावत भए कि तू ओकरे बारे मँ अउर बारीकी स छानबीन करइ चाहत बाट्या। ऍहसे पहिले कि उ हिआँ पहुँचइ, हम पचे ओका मारि डवइ क तइयार अही।”

¹⁶मुला पौलुस क भैने क इ कुचाल क भनक लग गइ तउ उ छावनी मँ जाइ पहुँचा अउर पौलुस क सब कछू बताइ दिहस।¹⁷ँह पइ पौलुस कउनो एक फऊजीनायक क बोलाइके ओसे कहेस, “इ जवान क सेनानायक क लगे लइ आवा काहेकि ऍहसे कछू कहइ क अहइ।”¹⁸तउ उ ओका सेनानायक क लगे लइ गवा अउर बोला, “बंदी पौलुस मोका बोलाएस अउर मोसे उ जवान क तोहरे लगे पहुँचावइ क कहेस काहेकि इ तोहसे कछू कहइ चाहत ह।”

¹⁹सेनानायक ओकर हथवा धरेस अउर ओका एक कइँती लइ जाइके पूछेस, “बतावा तू मोसे का चाहत बाट्या?”

²⁰जवान बोला, “यहूदी इ बात प एक अउट ग अहइँ कि उ पचे पौलुस स अउर बारीकी स पूछताछ करइ क बहाना महासभा मँ ओका लइ जाइ बरे तोहसे पराथना करइँ।²¹यह बरे ओनकइ जिन सुन्या। काहेकि चालीस स भी जियादा लोग घात लगाइके ओका जोहत अहइँ। उ पचे इ किरिया खाए अहइँ कि जब तलक उ पचे ओका

मारि न डवइँ, ओनका न कछू खाब अहइ, न पिअब। बस अब तोहरे आदेस क जोहत उ पचे तइयार बइठा अहइँ।”

²²फिन सेनानायक जवान क इ आदेस दइके पठएस, “तू इ कउनो क जिन बतावा कि तू मोका एकर खबर दइ दिहे अहा।”

पौलुस क कैसरिया पठवा जाब

²³फिन सेनानायक आपन दुइ फऊजीनायकन क बोलवाइ क कहेस, “दुइ सौ सिपाही, सत्तर घुड़सवार दुइ सौ भालावालन क कैसरिया जाइके तइयार राखा। राति क नउ बजे चलइ बरे तइयार रहा।²⁴पौलुस क सवारी बरे घोड़न क बन्दोबस्त राखा अउर ओका सुरच्छा स राज्यपाल फेलिक्स क लगे लइ जा।”²⁵उ एक ठु चिट्ठी लिखेस जेकर विसय रहा:

²⁶महामहिम राज्यपाल फेलिक्स क क्लौडियुस लूसियस क नमस्ते पहुँचइ।

²⁷इ मनई क यहूदी लोगन धइ लिहेन अउर उ पचे ऍकर कतल करइ क रहेन कि मइँ इ जानिके कि इ एक रोमी नागरिक अहइ, आपन सिपाहियन क संग जाइके एका बचाइ लिहेउँ।²⁸मइँ काहेकि उ कारण क जानइ चाहत रहेउँ जेहँसे उ पचे ओह पइ दोख लगावत रहेन, ओका ओनकइ महा आराधनालय मँ लइ जावा गवा।²⁹मोका पता लाग कि ओनकइ व्यवस्था स जुड़ा भए सवाल क कारण ओह पइ दोख लगावा ग रहा। मुला ओह प कउनो अइसा जुर्म नाहीं रहा जउन ओका मउत क सजा क जोग्ग या बंदी बनावइ जोग्ग साबित होइ।³⁰फिन जब मोका इत्तला मिली कि हुवाँ इ मनई क खिलाफ कउनो षडयन्त्र रचा गवा अहइ तउ मइँ एका तुरंतहि तोहरे लगे पठइ दीन्ह ह। अउर ऍह प जुर्म लगावाइ वालन क इ आदेस दइ दीन्ह ग ह कि एकरे खिलाफ लगावा गवा जुर्म तोहरे अगवा धरइँ।

³¹तउ सिपाहिन इ आग्या क पूरा किहेन अउर उ पचे राति मँ ही पौलुस क अन्तिपत्रिस क लगे लइ गएन।

³²फिन अगले दिना घुड़-सवारन क ओकरे संग अगवा जाइ बरे छोड़िके उ पचे छावनी लौटि आएन।³³जब उ पचे कैसरिया पहुँचने तउ उ पचे राज्यपाल क उ चिट्ठी देत भए पौलुस क ओका सौँपि दिहेन।³⁴राज्यपाल चिट्ठी बाँचेस अउर पौलुस स पूछेस कि उ कउनो पहुँटा क रहवइया बा। जबहिँ ओका पता लाग कि उ किलकिया क बसइया अहइ³⁵तउ उ ओसे कहेस, “तोह पइ जुर्म लगावइ वालन जब आइ जइहीं, मइँ तबहिँ तोर सुनवाइ करबा।” उ आग्या दिहसे कि पौलुस क पहरा क भीतर हेरोदेस क महल मँ रख दीन्ह जाइ।

यहूदियन क जरिए पौलुस प मुकदमा

24 पाचै दिना पाछे महायाजक हनन्याह कछू बुजुर्ग यहूदी नेतन अउर तिरतुल्लुस नाउँ क एक वकील क संग लइके कैसरिया आवा। उ पचे राज्यपाल क समन्वा पौलुस प जर्मु सिद्ध करइ आइ रहेन।² फेलिक्स क समन्वा पौलुस क पेसी होए पइ मुकदमा क सुनवाई सुरु करत भवा तिरतुल्लुस बोला, “महासय, तोहरे कारण हम साँतिस रहत अही तोहार दूरदेस होइ स देस में बहोत जिआदा सुधार भएन ह।³ हे महामहिम फेलिक्स! हम बडे एहसान क साथ एँका हर तरह स हर कहुँ अंगीकार करित ह।⁴ तोहार अउर जिआदा समइ न लेत भए, मोर पराथना अहइ कि कृपा कइके आप थोड़े में हमका सुन लेईं।⁵ बात इ अहइ कि इ मनई क हम एक उत्पाती क रूप में पाएँ ह। सारी दुनिया क यहूदियन में इ दंगा भइकाएस ह। इ नासरी लोगन क पंथ क नेता अहइ।⁶⁻⁸ इ मंदिर क अपवित्र करइ क जतन किहेस ह। हम पचे एँका यह बरे धरा ह। हम यह पइ जउन आरोप लगावत अही, ओन सबन क आप खुद ऐसे पूछि पछोरिके जान सकत ह।” * इ जुर्म में यहूदी भी सामिल होइ गएन। उ पचे जोर दइके कहत रहेन कि इ सब तथ्य पुरि अहईं!”¹⁰ फिन राज्यपाल जब पौलुस क बोलइ क इसारा किहेस तउ उ जवाब देत भवा कहेस, “तू बहोत दिना स इ देस क न्यायाधीस अहा। इ जानत भए मई खुसी क साथ आपन बचाव रखत अहईं।¹¹ तू खुद इ जान सकत ह कि अर्बहि आराधना बरे मोका यरूसलेम गए भए बस बारह दिन बीता बाटेन।¹² हुवाँ मंदिर में मोका न तउ कउनो क संग बहस करत भए पावा गवा अहइ अउर न ही आराधनालय या सहर में कतहूँ अउर मनइयन क दंगा बरे भइकावत भवा¹³ अउर तोहरे समन्वा जउन जुर्म क इ सबइ मोह प लगावत अहइ ओनका सिद्ध नाहीं कइ सकत बाटेन।¹⁴ मुला मई तोहरे समन्वा इ बात क अंगीकार करत हउँ कि मई आपन पूर्वजन क परमेस्सर क आराधना ईसू के पंथ क मुताबिक करत हउँ, जेका इ पचे एक पंथ कहत हीं। मई हर उ बात में बिसवास करत हउँ जेका व्यवस्था बतावत ह अउर जउन नबी लोगन क किताबे में लिखी बाटइ।

¹⁵ अउर मई परमेस्सर में बइसेन ही भरोसा राखत हउँ जइसे खुद ई लोग धरत हीं कि धर्मी अउर विधर्मी दुइनउँ क ही फिन उत्थान होइ।¹⁶ यह बरे मई भी परमेस्सर अउर मनइयन क समन्वा हमेसा आपन अन्तरात्मा क सुद्ध बनाए भए बरे जतन करत रहत हउँ।

पद 6-8 कछू यूनानी प्रतियन पद छ: क आखिरी भाग में 7 अउ 8 क सुरु क भाग भी जोड़ा गवा अहइ: “हम आपन व्यवस्था क मुताबिक एँकर निआव करा चाहित ही। 7 मुला सेनानायक लिसिआस जबरन ओका हमसे झपट लिहिस 8 अउ आपन मनइयन क हुकुम दिहिस कि उ सबइ एँह पर जुर्म लगावइ बरे तोहरे समन्वा लइ आवईं।”

¹⁷ कइउ बरिस तलक यरूसलेम स दूर रहे क पाछे मई आपन रास्टू बरे उपहार लइके अपने मंदिर पर भेंट चढावइ बरे आएँ ह।¹⁸ जब मई इ करत ही रहेउँ रहा उ पचे मोका मंदिर में पाएन, तब में बिधि क मुताबिक सुद्ध रहेउँ रहा न तउ हुवाँ भीड़ रही अउर न कउनो असाँतिस।¹⁹ एसिया स आए कछू यहूदी हुवाँ मौजूद रहेन। अगर मोरे खिलाफ ओनके लगे कछू अहइ तउ उ पचे तोहरे समन्वा हाजिर होइके मोह प जुर्म लगावइ चाही।²⁰ या इ लोग जउन हियाँ अहईं उ सबइ बतावई कि जब मई यहूदी महासभा क समन्वा खड़ा रहा, तब उ पचे मोहे में का खोट पाएन²¹ सिवाय एँकरे कि जब मई ओनकइ बीच में खड़ा रहा तब मई ऊँची अवाज में कहे रहा, ‘मरे भएन में स जी जाइ क बारे में आजु तोहरे जरिए मोर निआव कीन्ह जात अहइ।”

²² फिन फेलिक्स, जउन इ ईसू के पंथ क पूरी जानकारी रखत रहा, मुकदमा क सुनवाई क आगे टारत भवा बोला, “जब सेनानायक लुसियास आइ, मई तबहि तोहरे इ मुकदमे प आपन फेस्ता देब।”²³ फिन उ फऊजीनायक क आदेस दिहिस कि तनिक छूट दइके पौलुस क पहरा क भीतर धरा जाइ अउर ओकरे मीतन क ओकर जरूरत पूरा करइ स न रोका जाइ।

पौलुस क फेलिक्स अउर ओकर स्त्रियन स बातचीत

²⁴ कछू दिना पाछे फेलिक्स आपन पतनी ट्रुसिल्ला क संग हुवाँ आवा। उ एक यहूदी स्त्री रही। फेलिक्स पौलुस क बोलवावइ पठएस अउर मसीह ईसू में बिसवास क बारे में ओसे सुनेस।

²⁵ मुला जब पौलुस नेकी, खुद क संयम में राखइ अउर आवइवाला निआव क बारे में बोलत रहा तउ फेलिक्स डेराइ गवा अउर बाला, “इ समइ तू चला जा, मौका मिले प मई तोहका फिन बोलवाउब।”²⁶ अहइ समइया ओका इ आसा भी रही कि पौलुस ओका कछू धन देइ। यह बरे फेलिक्स पौलुस क बातचीत बरे अक्सर बोलवावइ बरे पठवत रहा।

²⁷ दुइ बरिस अइसे ही बीति जाए क पाछे फेलिक्स क जगइ पुरखिउस फेस्तुस ग्रहण कइ लिहिस। अउर काहेकि, फेलिक्स यहूदियन क खुस रखइ चाहत रहा, यह बरे उ पौलुस क जेल में ही रहइ दिहिस।

पौलुस कैसर स निआव चाहत ह

25 फेस्तुस जब उ प्रदेस में राज्यपाल होइ गवा अउर तीन दिना पाछे उ कैसरिया स यरूसलेम क रवाना होइ गवा।² हुवाँ मुख्ययाजकन अउर यहूदियन क मुखिया लोग पौलुस क खिलाफ लगावा गवा जुर्म ओकरे समन्वा रखेन अउर ओसे पराथना किहेन कि उ पौलुस क यरूसलेम पठवाइके ओनकइ पच्छ लेइ। (उ पचे रस्त में ही ओका मारि डावइ क कुचाल बनाए रहेन।)⁴ फेस्तुस

जवाब दिहिस कि "पौलुस कैसरिया में बंदी अहइ अउर उ जल्दी ही हुवाँ पहोंचइवाला बाटइ।" उ कहेस, "तू आपन कछू मुखिया लोगन क मोरे संग पठइ द्या अउर जदि उ मनई अपराध किहे बा तउ उ पचे हुवाँ मोह प जुर्म लगावइ।"

⁶ओनके संग कछू आठ दस दिन बिताइके फेस्तुस कैसरिया चला गवा। अगले ही दिन अदालत में निआव क आसन प बैठिके उ आदेस दिहिस कि पौलुस क पेस कीन्ह जाइ। ⁷जब उ पेस भवा तउ यरूसलेम स आए भएन यहूदी लोग ओका घेरिके खड़ा होइ गएन। उ पचे ओह प बहुतेरे भारी देख लगाएन मुला उ पचे ओका सिद्ध नाहीं कइ सकेन। ⁸पौलुस खुद आपन बचाव करत भवा कहेस, "मई न तउ यहूदियन क ब्यक्था क खिलाफ कउनो करम किहेउँ ह, न ही मंदिर क खिलाफ अउर न ही कैसर क खिलाफ।"

⁹मुला काहेकि फेस्तुस यहूदी लोगन क खुस करइ चाहत रहा, जवाब में उ पौलुस स कहेस, "तउ का तू यरूसलेम जाइ चाहत ह ताकि मई हुवाँ तोह पइ लगावा गवा जुर्म क निआव कइ सकउँ?"

¹⁰पौलुस कहेस, "इ समइ मई कैसर क अदालत क समन्वा खड़ा हउँ। मोर निआव हिअँ कीन्ह जाइ चाही। मई यहूदियन क संग कछू बुराई नाहीं किहे अही, एँका तू भी बहोत अच्छी तरह जानत ह। ¹¹यदि मई कउनो अपराधे क देखी अहउँ अउर मई कछू अइसा किहे हउँ, जेकर सजा मउत अहइ, तउ मई मरइ स बचब न चाहब, मुला जउन लोग मोह प जउन जुर्म लगावत अहँ, ओहमाँ स कउनो सच नाहीं बा। तउ मोका कउनो भी एँका नाहीं सौपि सकत। इहइ कैसर स मोर पराथना अहइ।"

¹²आपन परिसद स राय लिहे क पाछे फेस्तुस ओका जवाब दिहिस, "तू कैसर स फिन बिचार बरे पराथना किहा ह, यह बरे तोहका कैसर क समन्वा ही लइ लीन्ह जाइ।"

पौलुस क हेरोदेस अग्रिप्या क समन्वा पेसी

¹³कछू दिन पाछे राजा अग्रिप्या अउर बिरनीके फेस्तुस क सुआगत करइ कैसरिया आएन। ¹⁴जब उ पचे हुवाँ कई दिन बिताइ चुकेन तउ फेस्तुस राजा क समन्वा मुकदमा क इ तरह समझाएस, "हिअँ एक अइसा मनई अहइ जेका फेलिक्स बंदी क रूप में छोड़ गवा रहा। ¹⁵जब मई यरूसलेम में रहेउँ, मुख्ययाजकन अउर बुजुर्ग यहूदी नेतन ओकरे खिलाफ मुकदमा दर्ज किहेन अउर माँग किहे रहेन कि ओका सजा दीन्ह जाइ। ¹⁶मई ओनसे कहे रहेउँ, 'रोमी मनइयन में अइसी रीति नाहीं कि कउनो मनइ क, जब तलक वादी प्रतिवादी क आमना समन्वा न कइ दीन्ह जाइ अउर ओह प लगावा भएन जुर्म स ओका बचावइ क मौका न दइ दीन्ह जाइ, ओका

सजा बरे, सौपा जाइ।' ¹⁷तउ उ सबइ मनइयन जब मोरे संग हिअँ आएन तउ मई बिना देर लगाए भए अगले दिना निआव क आसन प बइठिके उ मनई क पेस कीन्ह जाइके हुकुम दिहिस। ¹⁸जब ओह पइ देख लगावइ वालन बोलइ खड़ा भएन तउ उ पचे ओह पइ अइसा कउनो देख नाहीं लगाएन जइसा कि मई सोचत रहेउँ। ¹⁹बल्कि ओनकइ आपन धरम क कछू बातन पर भी अउर ईसू नाउँ क एक मनई प जउन मर चुका बा, ओनमाँ कछू बिचार मँ अलगौड़ा रहा। तउ भी पौलुस क दावा अहइ कि उ जिअत अहइ। ²⁰मई समुझ नाहीं पावत हउँ कि इ बिसयन क छानबीन कइसे कीन्ह जाइ, यह बरे मई ओसे पूछेउँ कि का उ आपन इ जुर्मन क निआव करावइ बरे यरूसलेम जाइ क तइयार अहइ? ²¹मुला पौलुस जब पराथना किहेस कि ओका सम्राट क बरे ही हुवाँ रखा जाइ, तउ मई हुकुम दिहेउँ, कि मई जब तलक ओका कैसर क लगे न पठइ देउँ, ओका हिअँ रखा जाइ।"

²²एँह पइ अग्रिप्या फेस्तुस स कहेस, "इ मनई क सुनवाई मई खुद करइ चाहत हउँ।"

फेस्तुस कहेस, "तू ओका भियान सुन लिहा!"

²³तउ भियान भए प राजा अग्रिप्या अउर बिरनीके बड़ा सजधज क साथ आएन अउर उ पचे फऊजीनायकन अउर सहर क प्रमुख मनइयन क संग सभाभवन में घुसा। फेस्तुस हुकुम दिहिस अउर पौलुस क हुवाँ लइ आवा गवा। ²⁴फिन फेस्तुस बोला, "महाराजा अग्रिप्या अउर सज्जन लोगो जउन हिअँ अहा! तू पचे इ मनई क निहारत अहा जेकरे बारे में समूचा यहूदी समाज, यरूसलेम में अउर हिअँ, मोसे चिचिआइ चिचिआइके माँग करत अहइ कि एँका अब अउर जिन्दा नाहीं रहइ देइ चाही। ²⁵मुला मई जाँच लिहेउँ ह कि इ अइसा कछू नाहीं किहेस ह कि एँका मउत क सजा दीन्ह जाइ अउर काहेकि इ खुद सम्राट कैसर स फिन बिचार करइके पराथना किहेस ह कि यह बरे मई एँका हुवाँ पठवइ क निर्णय लिहेउँ ह। ²⁶मुला एँकरे बारे में सम्राट कैसर क लगे लिखिके पठवइ क मोरे लगे कउनो तय कीन्ह भइ बात नाहीं अहइ। मई एँका यह बरे आप सबन क समन्वा, अउर खास रूप स हे महाराजा अग्रिप्या, तोहरे समन्वा लइ आएउँ ह ताकि इ जाँच पड़ताल क पाछे लिखइ क मोरे लगे कछू होइ। ²⁷कछू भी होइ मोका कउनो बंदी क ओकर अभियाग पत्र बगैरे तइयार किए हुअँ पठउब संगत नाहीं जान पड़त।"

पौलुस राजा अग्रिप्या क समन्वा

26 अग्रिप्या पौलुस स कहेस, "तोहका खुद आपन कइती स बोलइ क अनुमति बाटइ।" एँह पइ पौलुस आपन हाथ उठाएस अउर आपन बचाव मँ बोलब सुरु किहेस, ²⁸हे राजा अग्रिप्या, मई आपन क भाग्यवान

समुझत हउँ कि यहूदियन मोह पइ जउन जुर्म लगाए बाटेन, ओन सब बातन क बचाउ में, तोहरे अगवा बोलइ जात हउँ।³ खास तरह स इ यह बरे सच अहइ कि तोहका सबहिं यहूदी रीति रिवाज अउर ओनके विवाद क गियान अहइ। यह बरे मई तोहसे पराथना करत हउँ कि धीरज क साथ मोर बात सुनी जाइ।

⁴“सबहिं यहूदी जानत हीं कि सुरु स ही खुद आपन देस में अउर यरूसलेम में भी बचपन स ही मई कइसा जिन्नगी जिए अहइ।⁵ उ पचे मोका बहोत समइ स जानत हीं अउर जदि उ पचे चाहई तउ इ बात क साच्छी दइ सकत हीं मई आपन धरम क एक सबसे जिआदा कट्टर पंथ क मुताबिक एक फरीसी क रूप में जिन्नगी बिताएउँ ह।⁶ अउर अब इ मुकदमा क सफाई क हालत में खड़ा भए मोका उ बचन क भरोसा अहइ जउन परमेस्सर हमरे पूर्वजन क दिहे रहा।⁷ इ उहइ बचन अहइ जेका हमार बारहु जालिन रात दिन मन लगाइके परमेस्सर क सेवा करत भए, पावइ क भरोसा रखत हीं हे राजन! इहइ भरोसा क कारण मोह प यहूदियन क जरिए जुर्म लगावा जात अहइ।⁸ तू पचन में स कउनो क भी इ बात बिसवास क जोगग काहे नाहीं लागत बा कि परमेस्सर मरे भए क जिआइ देत ह।

⁹“मई भी सोचत रहेउँ नासरी ईसू क नाउँ क खिलाफत करइ क लिए जउन भी बन पड़इ, उ बहोत कछु करौं।¹⁰ अउर अइसा ही मई यरूसलेम में किहेउँ भी। मई परमेस्सर क बहोत स भगतन क जेलि में धाँध दिहेउँ काहेकि मुख्ययाजक लोगन स एँकरे बरे मोका हक मिला रहा। अउर जब ओनका मारा गवा तउ मई आपन मत ओनकइ खिलाफ दिहेउँ।¹¹ आराधनालय में स मई ओनका अक्सर सजा देत रहेउँ अउर ईसू क निन्दा करइ बरे ओन पइ दबाव डावइ क जतन करत रहेउँ। ओनकइ बरे मोर किरोध एँतना जिआदा रहा कि ओनका सतावइ बरे मई बाहेर क सहर तलक गएउँ।

पौलुस क जरिए ईसू क दर्शन क बारे में बताउव

¹²अइसी ही एक जात्रा क मौके प जब मई मुख्ययाजक स आग्या पाइके दमिस्क जात रहेउँ,¹³ तबहिं दुपहरिया क जब मई अबहिं राहे में रहेउँ ही कि मई हे राजन, सरग स एक प्रकास उतरत भवा लखेउँ। ओकर तेज सूरज स भी जिआदा रहा। उ मोरे अउर मोरे संग क मनइयन क चारिहूँ कइँती चमचमान।¹⁴ हम पचे धरती प बहराइ गएन, फिन मोका एक बानी सुनाइ दिहिस। उ इब्रानी भाखा में मोसे कहत रही, ‘साउल, अरे ओ साउल, तू मोपर अत्याचार करत अहा? इ तू अहा जो मोरे विरुद्ध लड़ कर मोका सतावत अहा। धार क नोंक प लाल मारब तेरे बस क बात नाहीं अहइ।¹⁵ फिन मई पूछेउँ, ‘हे पभूँ तू कउन अहा?’ पभूँ जवाब दिहिस, ‘मई ईसू हउँ जेका तू यातना देत बाट्या।¹⁶ मुला अब तू उठा

अउर आपन गोड़े प खड़ा हवा। मई तोहरे अगवा यह बरे परगट भएउँ ह कि तोहका एक सेवक क रूप भतीं करउँ अउर जउन कछू मई तोहका देखाउव, ओकर तू साच्छी रह्या।¹⁷ मई जउन यहूदियन अउर गैर यहूदियन क लगे¹⁸ ओकर आँखी खोलइ, ओनका आँधियारा स प्रकास कइँती लावइ अउर सइतान क सक्ती स परमेस्सर कइँती मोड़इ बरे, तोहका पठवत हउँ, ओनसे तोहार रच्छा करत रहबा। एँहसे उ पचे पापन स छमा पइहीं अउर ओन मनइयन क बीच ठउर पइहीं जउन मोहे मँ बिसवास धरइ क कारण पवित्तर भएन ह।’

पौलुस क कारज

¹⁹“हे राजन अग्रिप्या, यह बरे तबहिं स उ दर्सन क आग्या क कबहुँ भी न उल्लंघन किए भए²⁰ बल्कि ओकरे खिलाफ मई पहिले ओनका दमिस्क में, फिन यरूसलेम में अउर यहूदिया क समूचइ पहुँटा मँ उपदेस देत रहा। अउर गैर यहूदियन क मनफिराव बरे, परमेस्सर कइँती मोड़इ अउर मनफिराव क मुताबिक करम करइ बरे कहत रहा।²¹ इहइ कारण जब मई हिआँ मंदिर मँ रहा, यहूदी लोग मोका धइ लिहेन अउर मोर कतल क जतन किहेन।²² मुला आनु तलक मोका परमेस्सर क मदद मिलत रही ह अउर यह बरे मई हिआँ छोट अउर बड़कवा सबहिं लोगन क समन्वा साच्छी देइ बरे खड़ा हउँ। मई बस ओन बातन क तजिके अउर कछू नवा नाहीं कहत जउन नबियन अउर मूसा क मुताबिक होइ क रही²³ कि मसीह क यातना भोगइ क होइ अउर उहइ मरे भएन मँ पहिला जी जाइवाला होइ अउर उ यहूदियन अउर गैर यहूदियन क जोति क संदेसा देइ।”

पौलुस क जरिए अग्रिप्या क भरम दूर करइ क जतन

²⁴उ आपन बचाउ मँ जब इ बातन क कहत ही रहाकि फेस्तुस चिल्लाईके कहेस, “पौलुस तोहार दिमाग खराब होइ ग अहइ। तोहार जिआदा पढ़ाई तोहका पगलाइ देति अहइ।”²⁵ पौलुस कहेस, “हे परमगुनी फेस्तुस, मई पागल नाहीं अहउँ बल्कि जउन बातन क मई कहत रहेउँ ह उ सच अहइ अउर संगत भी अहइ।²⁶ खुद राजा इ बातन क जानत बा अउर मई अजादी क मन स ओसे कहि सकत हउँ। मोर निस्चय अहइ कि एनमाँ स कउनो बात ओकरी आँखिन स, ओझल नाहीं बाटइ। मई अइसा यह बरे कहत हउँ कि इ बात कउनो कोने में नाहीं कही गइ।²⁷ हे राजन अग्रिप्या, नबियन जउन लिखे अहइ का तू ओहमाँ बिसवास रखत ह? मई जानत हउँ कि तोहार बिसवास अहइ।”²⁸ एँह पइ अग्रिप्या पौलुस स कहेस, “का तू इ सोचत ह कि एँती असांनी स तू मोका मसीही बनवइ क मनाइ लेब्या?”

²⁹पौलुस जवाब दिहिस, “तनिक समइ मँ, चाहे जिआदा समइ मँ, परमेस्सर स मोर पराथना अहइ कि न सिरिफ

तू बल्कि उ पचे भी, जउन आजु मोका सुनत बाटेन, वइसा ही होइ जाई, जइसा मई हउँ, सिवाय इ जंजीरन का।”

³⁰फिन राजा खड़ा होइ गवा अउर ओकरे संग ही राज्यपाल बिरनिके अउर साथ मँ बइठा भए लोग भी उठिके खड़ा होइ गएन। ³¹हुवाँ स बाहरे निकरिके उ पचे आपुस मँ बात करत भए कहइ लागेन, “इ मनई तउ अइसा कछू नाहीं किहे बा, जेहसे ऐंका मउत क सजा या जेल मिल सकइ।” ³² अग्रिपपा फेस्तुस स कहेस, “जदि इ कैसर क समन्वा फिन स बिचार क पराथना न होत, तउ इ मनई क छोड़ जाइ सकत रहा।”

पौलुस क रोम पठउब

27 जब इ तय होइ गवा कि हमका जहाज स इटली जाइ क अहइ तउ पौलुस अउर कछू दूसर बंदी मनइयन क सम्राट क फउज क यूलियुस नाउँ क एक फऊजीनायक क सौंपि दीन्ह गवा। ²अद्रमुत्तियुम स हम पचे एक जहाजे प सवार भए जउन एसिया क तट क पहुँटा स होइके जाइवाला रहा अउर समुदर क जात्रा प निकरेन। थिस्सलुनीके बसइया एक मैसीडोन, जेकर नाउँ अरिस्तर्खुस रहा, भी हमरे संग रहा। ³अगले दिन हम सैदा मँ उतरे। हुवाँ यूलियुस पौलुस क संग नीक विउहार किहेस अउर मोका ओकरे मीतन स मिलन बरे क अनुमति दइ दीन्ह गइ जेहसे उ ओकर देखभाल कर सकइ। ⁴हुवाँ स हम समुदर-रस्ता स फिन चल पड़ेन। हम पचे साइप्रस क ओटे ओटे चलत रहे काहेकि हवा हमरे खिलाफ बहत रही। ⁵फिन हम पचे किलिकिया अउर पंफूलिया क समुदर क पार करत भए लूसिया क मूरा पहुँचेन ⁶हुवाँ फऊजीनायक क सिकन्दरिया क इटली जाइवाला एक तु जहाज मिला। हम पचे ओह पइ सवार भएन।

⁷कइउ दिन तलक हम पचे धीमे धीमे आगे बढ़त भए बड़ी तकलीफे स कनिदुस क समन्वा पहुँचेन मुला काहेकि हवा आपन राहे प नहीं रहइ देइ चाहत रही, तउ हम सबइ सलभौने क समन्वा क्रीत क ओट मँ आपन नाउ बढ़ावइ लागे। ⁸क्रीत क किनारे-किनारे बड़ी तकलीफे स नाउ क अगवा अगवा खेवत भए एक अइसे ठउर प पहुँचेन जेकर नाउ रहा सुरच्छित बंदरगाह। हिआँ स लसया नगर लगे ही रहा।

⁹समइ बहोत बीति चुका रहा अउर नाउ क आगे बढ़ाउब भी संकट स भरा रहा काहेकि तब तलक उपवास क दिन* बीत चुका रहा। यह बरे पौलुस चिताउनी देत भए ओनसे कहेस, ¹⁰“अरे मनइयो, मोका लगत ह कि

उपवास क दिन हिआँ उपवासे क दिन स मतलब परिसोधन क उपवास क दिन स अहइ। बरिस क आखिर मँ इ यहूदियन क एक खास पवित्र दिन होत रहा। जाड़ा क इ दिना मँ समुदर मँ खौफनाक तूफान क अइसा रहत रहा।

हमार इ सागर जात्रा नास कइ देइ, न सिरिफ माल असबाब अउर जहाजे बरे बल्कि हमरे परान बरे भी।”

¹¹मुला पौलुस जउन कहे रहा ओका सुनइ क सिवाय उ फऊजीनायक, जहाज क मालिक अउर कप्तान क बातन प जिआदा बिसवास करत रहा। ¹²अउर काहेकि उ बन्दरगाह सीत रितु बरे चउचक नाहीं रहा, यह बरे जिआदातर मनइयन, जदि होइ सकइ तउ फीनिक्स पहुँचइ क जतन करने क ही ठान लिहेन। अउर जाड़ा हुवाँ काटइ क निस्चय किहेन। फीनिक्स क्रीत क अइसा बन्दरगाह अहइ जेकर मुँह दक्खिन पच्छिम अउर उत्तर पच्छिम दुइनुँ क समन्वा पड़त ह।

तूफान

¹³जब तनिक तनिक दक्खिनी हवा बहइ लाग तउ उ पचे सोचेन कि जइसा उ पचे चाहे रहेन, वइसा ही ओनका मिलि गवा अहइ। तउ उ पचे लंगर उठाइ लिहन अउर क्रीत क किनारे किनारे जहाज अगवा खेवइ लागेन। ¹⁴मुला अबहिँ कउनो जिआदा समइ नाहीं बीता रहा कि द्वीप क एक कइँती स एक भयानक आँधी उठी अउर आरपार लपेटत चली गइ। इ “उत्तर पूरब” क आँधी कही जात रही। ¹⁵जहाज तूफान मँ घिरि गवा। उ आँधी क फाड़िके अगवा नाहीं बड़ सकत रहा तउ हम पचे ओका यों ही छोड़िके हवा क रुख चलइ दीन्ह।

¹⁶हम क्लोदा नाउँ क एक छोटा स द्वीप क ओटे मँ बहत भए बड़ी तकलीफे स रच्छा नाउ क पाइ सकेन। ¹⁷फिन जीवन रच्छा-नाउ क उठाए क पाछे जहाज क रस्सा क लपेटे कि बाँध दीन्ह गवा अउर कहीं सुरतिस क ऊथल पानी मँ धँस न जाइ, इ डर स उ पचे जहाज क पाल उतारेन अउर जहाज क बहइ दिहेन। ¹⁸दूसरे दिन तूफान क घातक थपेड़ा खात भए उ पचे जहाज स माल-असबाब लोकावइ लागेन। ¹⁹अउर तीसर दिन उ पचे आपन ही हाथन स जहाजे प धरा औजार फेंक दिहेन। ²⁰फिन बहोत दिना तलक जब न सूरज देखान, न तारा अउर तूफान आपन घातक थपेड़ा मारत ही रहा तउ हमरे बच पावइ क आसा पूरी तरह खतम होइ गइ।

²¹बहोत दिना स कउनो कछू खाएउ नाहीं रहा। तब पौलुस ओनकइ बीच खड़ा होइके कहेस, “अरे मनइयो, अगर क्रीत स रवाना न होइके मोर सलाह मान लिहे होत्या तउ तू पचे इ बिनास अउर हानि स बच जात्या। ²²मुला मई तोहसे अबुँह तोहसे हठ करत हउँ कि आपन हिम्मत बाँधे रहा। काहेकि तू सबन मँ स कउनो क प्राण नाहीं खोवइ क अहइ। हाँ, बस इ जहाज क नास होइ जाइ ²³काहेकि पिछली रात उ परमेस्सर क एक सरगदूत, जेकर मई अहउँ अउर जेकर सेवा करत हउँ, मोरे लगे आइके खड़ा भवा। ²⁴अउर बोला, ‘पौलुस, जिन डेराआ। मोका निहचय ही कैसर क समन्वा खड़ा होइ क बाटइ अउर ओन सबन क जउन तोहरे संग जात्रा करत अहई,

परमेस्वर तोहका दइ दिहे अहइ।²⁵तउ मनइयन, आपन हिम्मत बनाइ राखा काहेकि परमेस्वर मँ मोर बिसवास अहइ, यह बरे जइसा मोका बतावा ग अहइ ठीक वइसेन घटी।²⁶किन्तु हम कउनो टापू क ऊथल पानी मँ जरूर जाइ धँसवा।”

²⁷फिन जब चउदहवीं रात आइ हम अद्रिया क समुद्दर मँ थपेड़ा खात रहे रहेन तबहिं आधी रातिक लगे जहाज क चालकन क लाग जइसे कउनो किनारा नगिचे अहइ।²⁸उ पचे सुद्दर क गहिराइ नपेन तउ पाएन कि हुवाँ कउनो अस्सी हाथ गहिराई रही। तनिक बेर क पाछे उ पचे गहिराई क फिन टोहेन अउर पाएन कि अब गहिराई साठ हाथ रहि गइ रही।²⁹इ डर स कि उ पचे कतँहु कउनो चट्टानी ऊथल किनारा मँ न फँसि जाई, उ सबइ जहाज क पिछले हींसा स चार ठु लंगर बहाएन अउर पराथना करइ लागेन कि कउनो तरह दिन निकरि आवइ।³⁰ओहर जहाज क चलावइ वाला जहाज स पराइ क जतन करत रहेन। उ पचे इ हीला बनावत भए कि उ पचे जहाज क अगले हींसा स कछू लंगर बहावइ जात अहइ, जीवन रच्छा नाउ क समुद्दर मँ उतारि दिहेन।³¹तबहिं फऊजीनायक स पौलुस कहेस, “जदि इ सबइ जहाज प नाहीं थामेन तउ तू पचे भी नाहीं बच पउब्या।”³²तउ सिपाहियन रस्सा क काटिके जीवन रच्छा नाउ तरखाले गिराइ दिहेन।³³भोर होइ स तनिक पहिले पौलुस इ कहत भए सब मनइयन स तनिक खइया खाइके हठ किहेस, “चौदह दिन बीति चुका अहइ अउर तू पचे लगातर फिकरि क कारण भूखा बाट्या। तू पचे कछू भी नाहीं खाए बाट्या।³⁴मई तोहसे कछू खाइके यह बरे हठ करत अही कि तोहरे जिअइ बरे इ जरुरी अहइ। काहेकि तू पचन मँ स कउनो क मूँडे क एक बार तलक बाँका नाहीं होइ क बा।”³⁵एतना कहि चुके क पाछे उ तनिक रोटी लिहेस अउर सबन क समन्वा परमेस्वर क धन्यवाद दिहेस। फिन रोटी क तोरेस अउर खाइ लाग।³⁶एहसे ओन सबन क हिम्मत बाढ़ी अउर उ सबइ भी थोड़ा स खाना क खाएन।³⁷जहाज प कुल बटोरिके हम सबइ दुइ सौ छिहत्तर मनई रहेन।³⁸पूरा खाना खइ चुकइ क पाछे उ पचे समुद्दर मँ अनाज बहाइके जहाज क हल्का कइ दिहेन।

जहाज क टूटब

³⁹जबहिं दिन क प्रकास भवा तउ उ पचे धरती क पहिचान नाहीं पाएन मुला ओनका लाग कि जइसे हुवाँ कउनो किनारा बाली खाड़ी बाटइ। उ पचे तय किहेन कि अगर होइ सकइ तउ जहाज क ठहराइ देई।⁴⁰तउ उ पचे लंगर काटिके ढील दइ दिहेन अउर ओ सबन क समुद्दर मँ तरखाले भहराइ दिहेन। उहइ समइ उ पचे पतवारे स बाँधा रस्सा क ढीला कइ दिहेन; फिन जहाज क अगला पतवार चढ़ाइके किनारे कईती बड़इ लागेन।

⁴¹अउर ओनकइ जहाज रेत मँ टकराइ गवा। जहाज क अगला हींसा ओहमाँ फँसिके जाम होइ गवा। अउर सक्तीवाली लहरन क थपेड़न स जहाज क पिछला हींसा टूटइ फाटइ लाग।

⁴²तबहिं सिपाही लोग कैदियन क मारि डावइ क कुचाल रचेन ताकि ओहमाँ स कउनो भी तैरके बच न पावइ।⁴³मुला फऊजीनायक पौलुस क बचावा चाहत रहा, यह बरे उ ओनका ओनकइ कुचाल क पूर होइ स रोक दिहेस। उ हुकुम दिहेस कि जउन भी तैर सकत हीं, उ पचे पहिले ही किनारे पहुँच जाईं⁴⁴अउर बाकी मनई तख्तम या जहाजे क दूसर टुकड़न क सहारे चला जाईं। इ तरह हर एक सुच्छा स किनारे आइ पहुँचा।

माल्टा द्वीप प पौलुस

28 इ सब कछू स सुरच्छा क साथ बच निकरे क पाछे हम सबन क पता लाग कि उ द्वीप क नाउँ माल्टा रहा।²हुवाँ क मूल-निवासियन हमरे संग असाधारण रूप स नीक बियूहार किहेन। काहेकि जाड़ा रहा अउर बरखा होइ लाग, यह बरे उ पचे आगी बारेन अउर हम सबन क सुआगत किहेन।³पौलुस लकड़ी क गठरा बनाएस अउर जब उ आगी प लकड़ियन क धरत रहा तबहिं गर्मी लागे स एक बिख स भरा नाग बाहेर निकरा अउर उ ओकरे हाथ क डस लिहेस।⁴हुवाँ क निवासी जब उ जंतु क ओकरे हाथ स लटकत भवा निहारेन तउ उ पचे आपुस मँ कहइ लागेन, “सचमुच ही इ मनई हत्तियारा अहइ। जदि अपि इ सागर स बचिके निकरा अहइ मुला दिब्व निआव * एँका जिअइ देत नाहीं बा।”⁵मुला पौलुस उ नाग क आगी मँ ही पटकेस। पौलुस क कउने तरह क हानि नाहीं भइ।⁶मनइयन सोचत रहेन कि उ या तउ सूजि जाइ या फिन बरबस धरती प भहराइ के मरि जाइ। मुला बहोत देर तलक जोहे क पाछे अउर लखिके ओका असाधारण रूप स कछू नाहीं भवा अहइ, उ पचे आपन बिचार बदल दिहेन अउर बोलेन, “इ तउ कउनो देवता अहइ।”

⁷उ ठउर क नगिचे ही उ द्वीप क प्रधान मनई पुबलियुस की खेत रहा। उ आपन घरे लइ जाइके हमार सुआगत-सत्कार किहेस। बड़ा खुला मन स तीन दिना तलक उ हमार मेहमानदारी करत रहा।⁸पुबलियुस क बाप बिस्तरा प ओलरा रहा। ओका बोखार अउर पेचिस होत रही। पौलुस ओसे भेंडइ भितरे गवा। फिन पराथना करइ क पाछे उ ओह पार आपन हाथ धरेस अउर उ नीक होइ गवा।⁹इ घटना क बाद उ द्वीप क बाकी सबहिं बेरमियन हुवाँ आएन अउर उ पचे नीक होइ गएन।¹⁰कहइ उपहार स हमार मान बढ़ाएन अउर जब हम

निआव मनई सोचत रहेन कि निआव नाउँ क एक देवता होत रहा जउन खोट मनइयन क सजा देत रहा।

हुवाँ स नाउ प आगे चलें तउ उ पचे सब जरूरी चीज क लइ आइके हमका दइ दिहें।

पौलुस क रोम जाव

¹¹तीन महीना पाछे सिकन्दरिया क एक जहाज स हम चल पड़ेन। इ द्वीप प जहाज जाड़ा भरे क बरे रुका जहाज क आगे क हींसा मँ जुड़वा भाइयन क चीन्हा* बना रहा। ¹²फिन हम पचे सरकुसा जाइ पहोंचेन जहाँ हम तीन दिना तलक ठहरेन। ¹³हुवाँ स जहाज स हम सबइ रेगियुम पहोंचेन अउर फिन अगले ही दिन दखिनाई हवा चली। तउ अगले दिन हम पुतियुली पहोंचेन। ¹⁴हुवाँ हमका कछू बंधु मिलेन अउर उ पचे हमका हुवाँ सात दिना ठहरइ क कहेन अउर इ तरह हम रोम पहोंचि आएन। ¹⁵जब हुवाँ क भाइ लोगन क हमार सूचना मिली तउ उ पचे अप्पियुस क बजार अउर तीन सराय* तलक हम पचन स भेंटइ आएन। पौलुस जब ओनका लखेस तु परमेस्सर क धन्यवाद दइके आपना दाढ़स बढ़ाएस।

पौलुस क रोम आउब

¹⁶जब हम सबइ रोम पहोंचेन तउ एक ठु सिपाही क देखेरेख मँ पौलुस क अपने आप अलग रहइ क अनुमति दीन्ह गइ। ¹⁷तीन बरिस पाछे पौलुस यहूदी नेतन क बोलाएस अउर ओनकइ बटुर जाए प उ ओनसे बोला, “भाइयो, चाहे मई आपन रास्ट या आपन पूर्वजन क व्यवस्था क खिलाफ कछू भी नाहीं किहेउँ ह, तउ भी यरूसलेम मँ मोका बंदी क रूप मँ रोमी लोगन क हवाले कइ दीन्ह गवा रहा। ¹⁸उ पचे मोर जाँच पड़ताल किहेन अउर मोका छोड़इ चाहेन काहेकि अइसा कछू मई किहेउँ ही नाहीं रहा जउन मउत क सजा क काबिल होत ¹⁹मुला जब यहूदी लोगन एतराज किहेन तउ मई कैसर स फिन बिचार करइ क पराथना करइ क बेबस होइ गएउँ। यह बरे कि नाहीं कि मई आपन ही लोगन प कउनो दोख लगावइ चाहत रहेउँ। ²⁰इहइ कारण अहइ जेहसे मई तोहसे मिलइ अउर बातचीत करइ चाहत रहेउँ काहेकि इम्राएल क उ भरोसा ही बाटइ जेकरे कारण मई जंजीर मँ बंधा अहउँ।”

²¹यहूदी नेतन पौलुस स कहेन, “तोहरे बारे मँ यहूदिया स न तउ कउनो चिट्ठी ही मिली बाटइ, अउर न ही हुवाँ

स आवइवाला कउनो भी भाई तोहार कउनो खबर दिहेंस अउर तोहरे बारे मँ कउनो बुरी बात कहेस। ²²मुला तोहार का बिचार अहइ, इ हम तोहसे सुनइ चाहित ह काहेकि हम जानित ह कि लोग सब कछू पंथ क खिलाफ बोलत रहत हीं।”

²³तउ उ पचे ओकरे साथ एक दिन ठहराएन। अउर फिन जहाँ उ ठहरा रहा, बड़ी गनती मँ ओइके उ लोग बटुर गएन। मूसा क व्यवस्था अउर नबी लोगन क किताबन स ईसू क बारे मँ ओनका समझावइ क जतन करत भए उ परमेस्सर क राज्य क बारे मँ आपन साच्छी दिहेंस अउर समुझाएस। ²⁴उ जउन कछू कहे रहा, ओहसे कछू मिला तउ बात मान गएन मुला कछू बिसवास नाहीं किहेन।

²⁵फिन आपुस मँ एक दूसर स असहमत होत भएन उ पचे हुवाँ स जाइ लागेन। तब पौलुस एक बात अउर कहेस, “यसायाह नबी क जरिया पवित्तर आतिमा तोहरे पूर्वजन स केतना ठीक कहे रहा,

²⁶ ‘जाइके इन लोगन स कहि द्या: तू पचे सुनब्या, पर न बुझब्या कबहुँ। लखत ही लखत बस तू रहब्या पर न बुझब्या कबहुँ भी!

²⁷ काहेकि ऐनकइ हिरदय मूर्खपन स गवा भरि कान ऐनकइ मुस्किल स सुनत हीं अउर कइ लिहन मूँद आँखी आपन इ सबइ, काहेकि अइसा न होइ जाइ कि इ सबइ आँखिन स लखइँ, सुनइँ अउर कान स आपन अउर समुझइँ हिरदय मँ, लौटइँ साइद अउर करइ पड़ब मोका चंगा ओनका।’

यसायाह 6:9-10

²⁸“यह बरे तोहका जान लेइ चाही कि परमेस्सर क इ उद्धार बिधर्मियन क लगे पठइ दीन्ह ग अहइ। उ पचे एँका सुनिहीं।” ²⁹*

³⁰हुआँ किराये के आपन मकान मँ पौलुस पूरा दुइ बरिस तलक ठहरा। जउन कउनो भी ओसे मिलइ आवत, उ ओकर सुआगत करत। ³¹उ परमेस्सर क राज्य क प्रचार करत रहत अउर पभू ईसू मसीह क बारे मँ उपदेस देत। उ इ कारज क पूरा बेडर होइके अउर बगेरे कउनो बाधा क मानत भवा करत रहत रहा।

जुड़वा भाइयन यूनान क पुराण क देवता यानी केस्टर अउ पौलकस क मूरत।

तीन सराय दुइनउँ रोम क नगिचे क कस्बन क नाउँ अहइ। पहिला रोम स 27 मील प अउ दूसर 30 मील प रहा।

पद 29 कछू यूनानी प्रतिबन्धन मँ पद 29 मिलत हय: “जब पौलुस इ बातन कहि चुका तउ आपुस मँ चर्चा परिचर्चा करत भए यहूदी हुवाँ स चला गएन।”

License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at distribution@wbtc.com.

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: info@wbtc.com

WBTC's web site – World Bible Translation Center's web site: <http://www.wbtc.org>

Order online – To order a copy of our texts online, go to: <http://www.wbtc.org>

Current license agreement – This license is subject to change without notice. The current license can be found at: <http://www.wbtc.org/downloads/biblelicense.htm>

Trouble viewing this file – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

Viewing Chinese or Korean PDFs – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>